

Namo tassa bhagavato arahato sammāsambuddhassa

Khuddakanikāye

Suttanipātapāḷi

1. Urugavaggo

1. Urugasuttaṃ

1. Yo [yo ve (syā.)] uppatitaṃ vineti kodhaṃ, viṣaṭaṃ sappaviṣaṃva osadhehi [osadhebbhi (ka.)];
So bhikkhu jahāti orapāraṃ, urago jīṇṇamivattacaṃ [jīṇṇamiva tacāṃ (sī. syā. kaṃ. pī.),
jīṇṇamivā tacāṃ (?)] purāṇaṃ.
2. Yo rāgamudacchidā asesāṃ, bhisapupphaṃva saroruhaṃ [sareruhaṃ (ka.)] vigayha;
So bhikkhu jahāti orapāraṃ, urago jīṇṇamivattacaṃ, purāṇaṃ.
3. Yo taṇhamudacchidā asesāṃ, saritaṃ sīghasaraṃ visosayitvā;
So bhikkhu jahāti orapāraṃ, urago jīṇṇamivattacaṃ purāṇaṃ.
4. Yo mānamudabbadhī asesāṃ, naḷasetuṃva sudubbalaṃ mahogho;
So bhikkhu jahāti orapāraṃ, urago jīṇṇamivattacaṃ purāṇaṃ.
5. Yo nājjhagamā bhavesu sāraṃ, vicinaṃ pupphamiva [pupphamiva (bahūsu)] udumbaresu;
So bhikkhu jahāti orapāraṃ, urago jīṇṇamivattacaṃ purāṇaṃ.
6. Yassantarato na santi kopā, itibhavābhavatañca [itibbhavābhavatañca (ka.)] vītivatto;
So bhikkhu jahāti orapāraṃ, urago jīṇṇamivattacaṃ purāṇaṃ.
7. Yassa vitakkā vidhūpitā, ajjhattaṃ suvikappitā asesā;
So bhikkhu jahāti orapāraṃ, urago jīṇṇamivattacaṃ purāṇaṃ.
8. Yo nāccasārī na paccasārī, sabbaṃ accagamā imaṃ papañcaṃ;
So bhikkhu jahāti orapāraṃ, urago jīṇṇamivattacaṃ purāṇaṃ.
9. Yo nāccasārī na paccasārī, sabbaṃ vitathamidanti ñatvā [utvā (syā. pī. ka.)] loke;
So bhikkhu jahāti orapāraṃ, urago jīṇṇamivattacaṃ purāṇaṃ.
10. Yo nāccasārī na paccasārī, sabbaṃ vitathamidanti vītalobho;
So bhikkhu jahāti orapāraṃ, urago jīṇṇamivattacaṃ purāṇaṃ.
11. Yo nāccasārī na paccasārī, sabbaṃ vitathamidanti vītarāgo;
So bhikkhu jahāti orapāraṃ, urago jīṇṇamivattacaṃ purāṇaṃ.
12. Yo nāccasārī na paccasārī, sabbaṃ vitathamidanti vītadoso;
So bhikkhu jahāti orapāraṃ, urago jīṇṇamivattacaṃ purāṇaṃ.
13. Yo nāccasārī na paccasārī, sabbaṃ vitathamidanti vītamoho;
So bhikkhu jahāti orapāraṃ, urago jīṇṇamivattacaṃ purāṇaṃ.

14. Yassānusayā na santi keci, mūlā ca akusalā samūhatāse;
So bhikkhu jahāti orapāraṃ, urago jīṇṇamivattacaṃ purāṇaṃ.
15. Yassa darathajā na santi keci, oraṃ āgamanāya paccayāse;
So bhikkhu jahāti orapāraṃ, urago jīṇṇamivattacaṃ purāṇaṃ.
16. Yassa vanathajā na santi keci, vinibandhāya bhavāya hetukappā;
So bhikkhu jahāti orapāraṃ, urago jīṇṇamivattacaṃ purāṇaṃ.
17. Yo nīvaraṇe pahāya pañca, anigho tiṇṇakathaṃkatho visallo;
So bhikkhu jahāti orapāraṃ, urago jīṇṇamivattacaṃ purāṇaṃ.

Uragasuttaṃ paṭhamaṃ niṭṭhitaṃ.

2. Dhaniyasuttaṃ

18. “Pakkodano duddhakhīrohamasmi, (iti dhaniyo gopo)
Anutīre mahiyā samānavāso;
Channā kuṭi āhito gini, atha ce patthayasī pavassa deva”.
19. “Akkodhano vigatakhilohamasmi [[vigatakhīlohamasmi \(sī. pī.\)](#)], (iti bhagavā)
Anutīre mahiyekarattivāso;
Vivaṭā kuṭi nibbuto gini, atha ce patthayasī pavassa deva”.
20. “Andhakamakasā na vijjare, (iti dhaniyo gopo)
Kacche rūḷhatiṇe caranti gāvo;
Vuṭṭhimpī saheyyumāgataṃ, atha ce patthayasī pavassa deva”.
21. “Baddhāsi bhisī susaṅkhatā, (iti bhagavā)
Tiṇṇo pāragato vineyya oghaṃ;
Attho bhisiyā na vijjati, atha ce patthayasī pavassa deva”.
22. “Gopī mama assavā alolā, (iti dhaniyo gopo)
Dīgharattaṃ [[dīgharatta \(ka.\)](#)] saṃvāsīyā manāpā;
Tassā na suṇāmi kiñci pāpaṃ, atha ce patthayasī pavassa deva”.
23. “Cittaṃ mama assavaṃ vimuttaṃ, (iti bhagavā)
Dīgharattaṃ paribhāvitaṃ sudantaṃ;
Pāpaṃ pana me na vijjati, atha ce patthayasī pavassa deva”.
24. “Attavetanabhatohamasmi, (iti dhaniyo gopo)
Puttā ca me samāniyā arogā;
Tesaṃ na suṇāmi kiñci pāpaṃ, atha ce patthayasī pavassa deva”.
25. “Nāhaṃ bhatakosmi kassaci, (iti bhagavā)
Nibbiṭṭhena carāmi sabbaloke;
Attho bhatiyā na vijjati, atha ce patthayasī pavassa deva”.
26. “Atthi vasā atthi dhenupā, (iti dhaniyo gopo)
Godharaṇiyo paveniyopi atthi;
Usabhopi gavampatīdha atthi, atha ce patthayasī pavassa deva”.

27. “Natthi vasā natthi dhenupā, (iti bhagavā)
Godharaṇiyo paveṇiyopi natthi;
Usabhopi gavampatīdha natthi, atha ce patthayasī pavassa deva”.
28. “Khilā nikhātā asampavedhī, (iti dhaniyo gopo)
Dāmā muñjamayā navā susaṅṭhānā;
Na hi sakkhinti dhenupāpi chettuṃ [chetuṃ (ka.)], atha ce patthayasī pavassa deva”.
29. “Usabhoriva chetva [chetvā (syā. ka.)] bandhanāni, (iti bhagavā)
Nāgo pūtilataṃva dālayitvā [pūtilataṃ padālayitvā (syā. ka.)];
Nāhaṃ punupessaṃ [puna upessaṃ (sī. syā. kaṃ. pī.), punupeyya (ka.)] gabbhaseyyaṃ, atha
ce patthayasī pavassa deva”.
30. “Ninnañca thalañca pūrayanto, mahāmegho pavassi tāvadeva;
Sutvā devassa vassato, imamattaṃ dhaniyo abhāsatha.
31. “Lābhā vata no anappakā, ye mayaṃ bhagavantaṃ addasāma;
Saraṇaṃ taṃ upema cakkhuma, sathā no hohi tuvaṃ mahāmuni.
32. “Gopī ca ahañca assavā, brahmacariyaṃ [brahmacariya (ka.)] sugate carāmase;
Jātimaraṇassa pāragū [pāragā (sī. syā. kaṃ. pī.)], dukkhassantakarā bhavāmase”.
33. “Nandati puttehi puttimā, (iti māro pāpimā)
Gomā [gomiko (sī. pī.), gopiko (syā. kaṃ.), gopiyo (ka.)] gohi tatheva nandati;
Upadhī hi narassa nandanā, na hi so nandati yo nirūpadhi”.
34. “Socati puttehi puttimā, (iti bhagavā)
Gopiyo gohi tatheva socati;
Upadhī hi narassa socanā, na hi so socati yo nirūpadhi”’ti.

Dhaniyasuttaṃ dutiyaṃ niṭṭhitaṃ.

3. Khaggavisāṇasuttaṃ

35. Sabbesu bhūtesu nidhāya daṇḍaṃ, aviheṭṭhayaṃ aññatarampi tesam;
Na puttamiccheyya kuto sahāyaṃ, eko care khaggavisāṇakappo.
36. Saṃsaggajātassa bhavanti snehā, snehanvayaṃ dukkhamidaṃ pahoti;
Ādīnavaṃ snehajaṃ pekkhamāno, eko care khaggavisāṇakappo.
37. Mitte suhajje anukampamāno, hāpeti atthaṃ paṭibaddhacitto;
Etaṃ bhayaṃ santhave [sandhave (ka.)] pekkhamāno, eko care khaggavisāṇakappo.
38. Vaṃso visālova yathā visatto, puttesu dāresu ca yā apekkhā;
Vaṃsakaḷīrova [vaṃsakaḷīrova (sī.), vaṃsakaḷīrova (syā. kaṃ. pī.), vaṃsekaḷīrova (niddesa)]
sajjamāno, eko care khaggavisāṇakappo.
39. Migo araṇṇamhi yathā abaddho [abandho (syā. kaṃ.)], yenicchakaṃ gacchati gocarāya;
Viññū naro seritaṃ pekkhamāno, eko care khaggavisāṇakappo.
40. Āmantanā hoti sahāyamajjhe, vāse ṭhāne gamane cārikāya;
Anabhijjhitaṃ seritaṃ pekkhamāno, eko care khaggavisāṇakappo.

41. Khiḍḍā ratī hoti sahāyamajjhe, puttesu ca vipulaṃ hoti pemaṃ;
Piyavippayogaṃ vijigucchamaṇo, eko care khaggavisāṇakappo.
42. Cātuddiso appaṭigho ca hoti, santussamaṇo itarītarena;
Parissayānaṃ sahitā achambhī, eko care khaggavisāṇakappo.
43. Dussaṅgahā pabbajitāpi eke, atho gahaṭṭhā gharamāvasantā;
Appossukko paraputtesu hutvā, eko care khaggavisāṇakappo.
44. Oropayitvā gihibyañjanāni [gihivyañjanāni (syā. kaṃ. pī.)], sañchinnapatto [saṃsīnapatto (sī.)] yathā koviḷāro;
Chetvāna vīro gihibandhanāni, eko care khaggavisāṇakappo.
45. Sace labhetha nipakaṃ sahāyaṃ, saddhiṃ caraṃ sādhuviḥāridhīraṃ;
Abhibhuyya sabbāni parissayāni, careyya tenattamaṇo satīmā.
46. No ce labhetha nipakaṃ sahāyaṃ, saddhiṃ caraṃ sādhuviḥāridhīraṃ;
Rājāva raṭṭhaṃ vijitaṃ pahāya, eko care mātaṅgaraññeva nāgo.
47. Addhā pasamsāma sahāyasampadaṃ, seṭṭhā samā sevitabbā sahāyā;
Ete aladdhā anavajjabhojī, eko care khaggavisāṇakappo.
48. Disvā suvaṇṇassa pabhassarāni, kammāraputtana suniṭṭhitāni;
Saṅghaṭṭamānāni duve bhujasmiṃ, eko care khaggavisāṇakappo.
49. Evaṃ dutiyena [dutyena (sabbattha)] sahā mamaṃsa, vācābhilāpo abhisajjanā vā;
Etaṃ bhayaṃ āyatim pekkhamaṇo, eko care khaggavisāṇakappo.
50. Kāmā hi citrā madhurā manoramā, virūparūpena mathenti cittaṃ;
Ādīnaṃ kāmagaṇesu disvā, eko care khaggavisāṇakappo.
51. Ītī ca gaṇḍo ca upaddavo ca, rogo ca sallaṅca bhayaṅca metaṃ;
Etaṃ bhayaṃ kāmagaṇesu disvā, eko care khaggavisāṇakappo.
52. Sītaṅca uṇhaṅca khudaṃ pipāsaṃ, vātātape ḍaṃsasarīsape [ḍaṃsasiriṃsape (sī. syā. kaṃ. pī.)]
ca;
Sabbānipetāni abhisambhavitvā, eko care khaggavisāṇakappo.
53. Nāgo va yūthāni vivajjayitvā, sañjātakhandho padumī uḷāro;
Yathābhiraṇaṃ viharaṃ [vihare (sī. pī. niddesa)] araññe, eko care khaggavisāṇakappo.
54. Aṭṭhānataṃ saṅgaṇikāratassa, yaṃ phassaye [phussaye (syā.)] sāmāyikaṃ vimuttiṃ;
Ādiccabandhussa vaco nisamma, eko care khaggavisāṇakappo.
55. Diṭṭhivīsūkāni upātivatto, patto niyāmaṃ paṭiladdhamaggo;
Uppannañāṇomhi anaññāneyyo, eko care khaggavisāṇakappo.
56. Nillolupo nikkhuho nippipāso, nimmakkho niddhantakasāvamoho;
Nirāsayo [nirāsāso (ka.)] sabbaloke bhavitvā, eko care khaggavisāṇakappo.
57. Pāpaṃ sahāyaṃ parivajjayetha, anattadassim visame nivittṭhaṃ;
Sayaṃ na seve pasutaṃ pamattaṃ, eko care khaggavisāṇakappo.

58. Bahussutaṃ dhammadharaṃ bhajetha, mittaṃ uḷāraṃ paṭibhānavantaṃ;
Aññāya atthāni vineyya kaṅkhaṃ, eko care khaggavisāṇakappo.
59. Khiddaṃ ratiṃ kāmasukhañca loke, analaṅkaritvā anapekkhamāno;
Vibhūsaṇaṭṭhānā virato saccavādī, eko care khaggavisāṇakappo.
60. Puttañca dāraṃ pitarañca mātaraṃ, dhanāni dhaññāni ca bandhavāni [[bandhavāni ca \(pī.\)](#)];
Hitvāna kāmāni yathodhikāni, eko care khaggavisāṇakappo.
61. Saṅgo eso parittamettha sokhyaṃ, appassādo dukkhamettha bhiyyo;
Gaḷo eso itī ñatvā mutimā [[matimā \(syā. ka.\)](#)], eko care khaggavisāṇakappo.
62. Sandālayitvāna [[padālayitvāna \(ka.\)](#)] saṃyojanāni, jālaṃva bhettvā salilambucārī;
Aggīva daḍḍhaṃ anivattamāno, eko care khaggavisāṇakappo.
63. Okkhittacakkhū na ca pādalo, guttindriyo rakkhitamānasāno;
Anavassuto aparīḍayhamāno, eko care khaggavisāṇakappo.
64. Ohārayitvā gihibyañjanāni, sañchannapatto [[sañchinnapatto \(syā. pī.\)](#), [pacchinnapatto \(ka.\)](#)]
yathā pārīchatto;
Kāsāyavatto abhinikkhamitvā, eko care khaggavisāṇakappo.
65. Rasesu gedhaṃ akaraṃ alolo, anaññaposī sapadānacārī;
Kule kule appaṭibaddhacitto [[appaṭibandhacitto \(ka.\)](#)], eko care khaggavisāṇakappo.
66. Pahāya pañcāvaraṇāni cetaso, upakkilese byapanujja sabbe;
Anissito chetva [[chetvā \(syā. pī. ka.\)](#)] sinehadosaṃ [[snehadosaṃ \(ka.\)](#)], eko care
khaggavisāṇakappo.
67. Vipīṭṭhikatvāna sukhaṃ dukhañca, pubbeva ca somanassadomanassaṃ;
Laddhānupekkhaṃ samathaṃ visuddhaṃ, eko care khaggavisāṇakappo.
68. Āraddhavīriyo paramatthapattiyā, alīnacitto akusītavutti;
Daḷhanikkamo thāmabalūpapanno, eko care khaggavisāṇakappo.
69. Paṭisallānaṃ jhānamariñcamāno, dhammesu niccaṃ anudhammacārī;
Ādīnaṃ sammāsītā bhavesu, eko care khaggavisāṇakappo.
70. Taṇhakkhayaṃ patthayamappamatto, anelaṃūgo [[anelamūgo \(syā. pī. ka.\)](#)] sutavā satīmā;
Saṅkhātadhammo niyato padhānavā, eko care khaggavisāṇakappo.
71. Sīhova saddesu asantasanto, vātova jālamhi asajjamāno;
Padumaṃva toyena alippamāno [[alimpamāno \(sī. syā. ka.\)](#)], eko care khaggavisāṇakappo.
72. Sīho yathā dāṭhabalī pasayha, rājā migānaṃ abhibhuyya cārī;
Sevetha pantāni senāsanāni, eko care khaggavisāṇakappo.
73. Mettaṃ upekkhaṃ karuṇaṃ vimuttiṃ, āsevamāno muditañca kāle;
Sabbena lokena avirujjhamāno, eko care khaggavisāṇakappo.
74. Rāgañca dosañca pahāya moham, sandālayitvāna saṃyojanāni;
Asantaṃ jīvitasaṅkhayaṃ, eko care khaggavisāṇakappo.

75. Bhajanti sevanti ca kārāṇatthā, nikkāraṇā dullabhā ajja mittā;
Attaṭṭhapaññā asucī manussā, eko care khaggavisāṇakappo.

Khaggavisāṇasuttaṃ tatiyaṃ niṭṭhitam.

4. Kasibhāradvājasuttaṃ

Evam me sutam – ekaṃ samayaṃ bhagavā magadhesu viharati dakkhiṇāgirismim [\[dakkhiṇāgirismim \(ka.\)\]](#) ekanāḷāyaṃ brāhmaṇagāme. Tena kho pana samayena kasibhāradvājassa brāhmaṇassa pañcamattāni naṅgalasatāni payuttāni honti vappakāle. Atha kho bhagavā pubbaṅhasamayaṃ nivāsetvā pattacīvaramādāya yena kasibhāradvājassa brāhmaṇassa kammanto tenupasaṅkami. Tena kho pana samayena kasibhāradvājassa brāhmaṇassa parivesanā vattati. Atha kho bhagavā yena parivesanā tenupasaṅkami; upasaṅkamitvā ekamantaṃ aṭṭhāsi.

Addasā kho kasibhāradvājo brāhmaṇo bhagavantam piṇḍāya ṭhitam. Disvāna bhagavantam etadavoca – “ahaṃ kho, samaṇa, kasāmi ca vapāmi ca; kasitvā ca vapitvā ca bhuñjāmi. Tvampi, samaṇa, kasassu ca vapassu ca; kasitvā ca vapitvā ca bhuñjassū”ti.

“Ahampi kho, brāhmaṇa, kasāmi ca vapāmi ca; kasitvā ca vapitvā ca bhuñjāmi”ti. “Na kho pana mayam [\[na kho pana samaṇa \(syā.\)\]](#) passāma bhoto gotamassa yugam vā naṅgalam vā phālam vā pācanam vā balibadde [\[balivadde \(sī. pī.\)\]](#), [\[balībadde \(?\)\]](#) vā. Atha ca pana bhavam gotamo evamāha – ‘ahampi kho, brāhmaṇa, kasāmi ca vapāmi ca; kasitvā ca vapitvā ca bhuñjāmi’”ti.

Atha kho kasibhāradvājo brāhmaṇo bhagavantam gāthāya ajjhabhāsi –

76. “Kassako paṭijānāsi, na ca passāma te kasim;
Kasim no pucchito brūhi, yathā jānemu te kasim”.
77. “Saddhā bījam tapo vuṭṭhi, paññā me yuganaṅgalam;
Hirī isā mano yottam, satī me phālapācanam.
78. “Kāyagutto vacīgutto, āhāre udare yato;
Saccam karomi niddānam, soraccam me pamocanam.
79. “Vīriyam me dhuradhorayham, yogakkhemādhivāhanam;
Gacchati anivattantam, yattha gantvā na socati.
80. “Evamesā kasī kaṭṭhā, sā hoti amatapphalā;
Etaṃ kasim kasitvāna, sabbadukkhā pamuccatī”ti.

Atha kho kasibhāradvājo brāhmaṇo mahatīyā kaṃsapātiyā pāyasam [\[pāyāsam \(sabbattha\)\]](#) vaḍḍhetvā bhagavato upanāmesi – “bhuñjatu bhavam gotamo pāyasam. Kassako bhavam; yam hi bhavam gotamo amatapphalam [\[amatapphalampi \(sam. ni. 1.197\)\]](#) kasim kasatī”ti.

81. “Gāthābhigītam me abhojaneyyam, sampassatam brāhmaṇa nesa dhammo;
Gāthābhigītam panudanti buddhā, dhamme satī brāhmaṇa vuttiresā.
82. “Aññena ca kevalinam mahesim, khīṇāsavam kukkuccavūpasantam;
Annena pānena upaṭṭhahassu, khettam hi tam puññaapekkhassa hotī”ti.

“Atha kassa cāham, bho gotama, imam pāyasam dammī”ti? “Na khvāham tam, brāhmaṇa,

passāmi sadevake loke samārake sabrahmake sassamaṇabrāhmaṇiyā pajāya sadevamanussāya, yassa so pāyaso bhutto sammā pariṇāmaṃ gaccheyya, aññatra tathāgatassa vā tathāgatasāvakassa vā. Tena hi tvam, brāhmaṇa, taṃ pāyasaṃ appaharite vā chaḍḍehi appāṇake vā uduke opilāpehi”ti.

Atha kho kasibhāradvājo brāhmaṇo taṃ pāyasaṃ appāṇake uduke opilāpesi. Atha kho so pāyaso uduke pakkhitto ciccīṭayati ciṭṭīṭayati sandhūpāyati sampadhūpāyati [sandhūmāyati sampadhūmāyati (syā.)]. Seyyathāpi nāma phālo divasaṃ santatto [divasasantatto (sī. syā. kaṃ. pī.)] uduke pakkhitto ciccīṭayati ciṭṭīṭayati sandhūpāyati sampadhūpāyati; evameva so pāyaso uduke pakkhitto ciccīṭayati ciṭṭīṭayati sandhūpāyati sampadhūpāyati.

Atha kho kasibhāradvājo brāhmaṇo saṃviggo lomahaṭṭhajāto yena bhagavā tenupasaṅkami; upasaṅkamitvā bhagavato pādesu sirasā nipatitvā bhagavantaṃ etadavoca – “abhikkantaṃ, bho gotama, abhikkantaṃ, bho gotama! Seyyathāpi, bho gotama, nikkujjitaṃ vā ukkujjeyya, paṭicchannaṃ vā vivareyya, mūlhasa vā maggaṃ ācikkheyya, andhakāre vā telapajjotaṃ dhāreyya, cakkhumanto rūpāni dakkhantīti [dakkhintīti (sī. syā. kaṃ. pī.)]; evamevaṃ bhotā gotamena anekapariyāyena dhammo pakāsito. Esāhaṃ bhavantaṃ gotamaṃ saraṇaṃ gacchāmi dhammaṅca bhikkhusaṅghaṅca, labheyyāhaṃ bhoto gotamassa santike pabbajjaṃ, labheyyaṃ upasampada”nti.

Alattha kho kasibhāradvājo brāhmaṇo bhagavato santike pabbajjaṃ, alattha upasampadaṃ. Acirūpasampanno kho panāyasmā bhāradvājo eko vūpakaṭṭho appamatto ātāpī pahitatto viharanto nacirasava – yassatthāya kulaputtā sammadeva agārasmā anagāriyaṃ pabbajanti, tadanuttaraṃ – brahmacariyapariyosānaṃ diṭṭheva dhamme sayamaṃ abhiññā sacchikatvā upasampajja vihāsi. “Khīṇā jāti, vusitaṃ brahmacariyaṃ, kataṃ karaṇiyaṃ, nāparaṃ itthattāyā”ti abbhāññāsi. Aññataro ca [aññataro ca kho (sī. pī.), aññataro kho (syā. kaṃ. ka.)] panāyasmā bhāradvājo arahataṃ ahoṣīti.

Kasibhāradvājasuttaṃ catutthaṃ niṭṭhitaṃ.

5. Cundasuttaṃ

83. “Pucchāmi muniṃ pahūtapaññaṃ, (iti cundo kammāraputto)
Buddhaṃ dhammassāmiṃ vītataṇhaṃ;
Dvipaduttamaṃ [dīpaduttamaṃ (sī. syā. kaṃ. pī.)] sārathīnaṃ pavaraṃ, kati loke samaṇā
tadīṅha brūhi”.
84. “Caturō samaṇā na pañcamatthi, (cundāti bhagavā)
Te te āvikaromi sakkhipuṭṭho;
Maggajīno maggadesako ca, magge jīvati yo ca maggadūsī”.
85. “Kaṃ maggajīnaṃ vadanti buddhā, (iti cundo kammāraputto)
Maggakkhāyī kathaṃ atulyo hoti;
Magge jīvati me brūhi puṭṭho, atha me āvikarohi maggadūsīṃ” [maggadūsī (ka.)].
86. “Yo tiṇṇakathaṃkatho visallo, nibbānābhirato anānugiddho;
Lokassa sadevakassa netā, tādiṃ maggajīnaṃ vadanti buddhā.
87. “Paramaṃ paramanti yodha ñatvā, akkhāti vibhajate idheva dhammaṃ;
Taṃ kaṅkhachidaṃ muniṃ anejaṃ, dutiyaṃ bhikkhunamāhu maggadesiṃ.
88. “Yo dhammapade sudesite, magge jīvati saññato satīmā;
Anavajjapadāni sevamāno, tatiyaṃ bhikkhunamāhu maggajīviṃ.
89. “Chadanaṃ katvāna subbatānaṃ, pakkhandī kuladūsako pagabbho;
Māyāvī asaññato palāpo, patirūpena caraṃ sa maggadūsī.

90. “Ete ca paṭivijjhi yo gahaṭṭho, sutavā ariyasāvako sapañño;
Sabbe netādisāti [sabbe ne tādīsāti (sī. syā. pī.)] ñatvā, iti disvā na hāpeti tassa saddhā;
Kathaṃ hi duṭṭhena asampaduṭṭhaṃ, suddhaṃ asuddhena samaṃ kareyyā”ti.

Cundasuttaṃ pañcamaṃ niṭṭhitaṃ.

6. Parābhavasuttaṃ

Evamaṃ me suttaṃ – ekaṃ samayaṃ bhagavā sāvatthiyaṃ viharati jetavane anāthapiṇḍikassa ārāme.
Atha kho aññatarā devatā abhikkantāya rattiyā abhikkantavaṇṇā kevalakappaṃ jetavanaṃ obhāsetvā
yena bhagavā tenupasaṅkami; upasaṅkamtvā bhagavantaṃ abhivādetvā ekamantaṃ aṭṭhāsī. Ekamantaṃ
ṭhitā kho sā devatā bhagavantaṃ gāthāya ajjhabhāsī –

91. “Parābhavantaṃ purisaṃ, mayaṃ pucchāma gotama [gotamaṃ (sī. syā.)];
Bhagavantaṃ [bhavantaṃ (syā. ka.)] puṭṭhumāgamma, kiṃ parābhavato mukhaṃ”.
92. “Suvijāno bhavaṃ hoti, suvijāno [duvijāno (syā. ka.)] parābhavo;
Dhammakāmo bhavaṃ hoti, dhammadessī parābhavo”.
93. “Iti hettaṃ vijānāma, paṭhama so parābhavo;
Dutiyaṃ bhagavā brūhi, kiṃ parābhavato mukhaṃ”.
94. “Asantassa piyā honti, sante na kurute piyaṃ;
Asattaṃ dhammaṃ roceti, taṃ parābhavato mukhaṃ”.
95. “Iti hettaṃ vijānāma, dutiyo so parābhavo;
Tatiyaṃ bhagavā brūhi, kiṃ parābhavato mukhaṃ”.
96. “Niddāsīlī sabhāsīlī, anuṭṭhātā ca yo naro;
Alaso kodhapaññaṇo, taṃ parābhavato mukhaṃ”.
97. “Iti hettaṃ vijānāma, tatiyo so parābhavo;
Catutthaṃ bhagavā brūhi, kiṃ parābhavato mukhaṃ”.
98. “Yo mātaraṃ [yo mātaraṃ vā (sī. syā. kaṃ. pī.)] pitaraṃ vā, jīṇṇakaṃ gatayobbanam;
Pahu santo na bharati, taṃ parābhavato mukhaṃ”.
99. “Iti hettaṃ vijānāma, catuttho so parābhavo;
Pañcamaṃ bhagavā brūhi, kiṃ parābhavato mukhaṃ”.
100. “Yo brāhmaṇaṃ [yo brāhmaṇaṃ vā (sī. syā. kaṃ. pī.)] samaṇaṃ vā, aññaṃ vāpi vanibbakaṃ;
Musāvādena vañceti, taṃ parābhavato mukhaṃ”.
101. “Iti hettaṃ vijānāma, pañcama so parābhavo;
Chaṭṭhamaṃ bhagavā brūhi, kiṃ parābhavato mukhaṃ”.
102. “Pahūtavitto puriso, sahirañño sabhojano;
Eko bhujjati sādūni, taṃ parābhavato mukhaṃ”.
103. “Iti hettaṃ vijānāma, chaṭṭhama so parābhavo;
Sattamaṃ bhagavā brūhi, kiṃ parābhavato mukhaṃ”.

104. “Jātitthaddho dhanatthaddho, gottatthaddho ca yo naro;
Saññātīṃ atimaññēti, taṃ parābhavato mukhaṃ”.
105. “Iti hetamaṃ vijānāma, sattamo so parābhavo;
Aṭṭhamaṃ bhagavā brūhi, kiṃ parābhavato mukhaṃ”.
106. “Itthidhutto surādutto, akkhadhutto ca yo naro;
Laddhaṃ laddhaṃ vināseti, taṃ parābhavato mukhaṃ”.
107. “Iti hetamaṃ vijānāma, aṭṭhama so parābhavo;
Navamaṃ bhagavā brūhi, kiṃ parābhavato mukhaṃ”.
108. “Sehi dārehi asantuṭṭho [dārehyasantuṭṭho (ka.)], vesiyāsu padussati [padissati (sī.)];
Dussati [dissati (sī. pī.)] paradāresu, taṃ parābhavato mukhaṃ”.
109. “Iti hetamaṃ vijānāma, navamo so parābhavo;
Dasamaṃ bhagavā brūhi, kiṃ parābhavato mukhaṃ”.
110. “Atītayobbano poso, āneti timbarutthaniṃ;
Tassā issā na supati, taṃ parābhavato mukhaṃ”.
111. “Iti hetamaṃ vijānāma, dasamo so parābhavo;
Ekādasamaṃ bhagavā brūhi, kiṃ parābhavato mukhaṃ”.
112. “Itthiṃ soṇḍiṃ vikiraṇiṃ, purisaṃ vāpi tādisaṃ;
Issariyasmīṃ ṭhapeti [ṭhāpeti (sī. pī.), thapeti (ka.)], taṃ parābhavato mukhaṃ”.
113. “Iti hetamaṃ vijānāma, ekādasamo so parābhavo;
Dvādasamaṃ bhagavā brūhi, kiṃ parābhavato mukhaṃ”.
114. “Appabhogo mahātaṇho, khattiye jāyate kule;
So ca rajjamaṃ patthayati, taṃ parābhavato mukhaṃ”.
115. “Ete parābhave loke, paṇḍito samavekkhiya;
Ariyo dassanasampanno, sa lokamaṃ bhajate siva’’nti.

Parābhavasuttaṃ chaṭṭhamaṃ niṭṭhitaṃ.

7. Vasalasuttaṃ

Evamaṃ me sutamaṃ – ekaṃ samayaṃ bhagavā sāvattiyamaṃ viharati jetavane anāthapiṇḍikassa ārāme. Atha kho bhagavā pubbaṇhasamayaṃ nivāsetvā pattacīvaramādāya sāvattimīṃ piṇḍāya pāvīsi. Tena kho pana samayena aggikabhāradvājassa brāhmaṇassa nivesane aggi pajjalito hoti āhuti paggahitā. Atha kho bhagavā sāvattiyamaṃ sapadānaṃ piṇḍāya caramāno yena aggikabhāradvājassa brāhmaṇassa nivesanaṃ tenupasaṅkami.

Addasā kho aggikabhāradvājo brāhmaṇo bhagavantaṃ dūratova āgacchantaṃ. Disvāna bhagavantaṃ etadavoca – “tatreva [atreva (syā. ka.)], muṇḍaka; tatreva, samaṇaka; tatreva, vasalaka tiṭṭhāhi’’ti.

Evamaṃ vutte, bhagavā aggikabhāradvājaṃ brāhmaṇamaṃ etadavoca – “jānāsi pana tvamaṃ, brāhmaṇa,

vasalaṃ vā vasalakaraṇe vā dhamme’’ti? ‘‘Na khvāhaṃ, bho gotama, jānāmi vasalaṃ vā vasalakaraṇe vā dhamme; sādhu me bhavaṃ gotamo tathā dhammaṃ desetu, yathāhaṃ jāneyyaṃ vasalaṃ vā vasalakaraṇe vā dhamme’’ti. ‘‘Tena hi, brāhmaṇa, suṇāhi, sādhukaṃ manasi karohi; bhāsissāmi’’ti. ‘‘Evaṃ, bho’’ti kho aggikabhāradvājo brāhmaṇo bhagavato paccassosi. Bhagavā etadavoca –

116. ‘‘Kodhano upanāhī ca, pāpamakkhī ca yo naro;
Vipannadiṭṭhi māyāvī, taṃ jaññā vasalo iti.
117. ‘‘Ekajaṃ vā dvijaṃ [dijaṃ (pī.)] vāpi, yodha pāṇaṃ vihiṃsati;
Yassa pāṇe dayā natthi, taṃ jaññā vasalo iti.
118. ‘‘Yo hanti parirundhati [uparundheti (syā.), uparundhati (ka.)], gāmāni nigamāni ca;
Niggāhako [nigghātako (?)] samaññāto, taṃ jaññā vasalo iti.
119. ‘‘Gāme vā yadi vā raññe, yaṃ paresaṃ mamāyitaṃ;
Theyyā adinnamādeti [adinnaṃ ādiyati (sī. pī.)], taṃ jaññā vasalo iti.
120. ‘‘Yo have iṇamādāya, cujjaṃāno [bhuñjamāno (?)] palāyati;
Na hi te iṇamatthīti, taṃ jaññā vasalo iti.
121. ‘‘Yo ve kiñcikkhakamyatā, panthasmiṃ vajantaṃ jaṇaṃ;
Hantvā kiñcikkhamādeti, taṃ jaññā vasalo iti.
122. ‘‘Attahetu parahetu, dhanahetu ca [dhanahetu va (ka.)] yo naro;
Sakkhipuṭṭho musā brūti, taṃ jaññā vasalo iti.
123. ‘‘Yo ñātīnaṃ sakhīnaṃ vā, dāresu paṭidissati;
Sāhasā [sahasā (sī. syā.)] sampiyena vā, taṃ jaññā vasalo iti.
124. ‘‘Yo mātaraṃ pitaraṃ vā, jiṇṇakaṃ gatayobbanāṃ;
Pahu santo na bharati, taṃ jaññā vasalo iti.
125. ‘‘Yo mātaraṃ pitaraṃ vā, bhātaraṃ bhaginiṃ sasumaṃ;
Hanti roseti vācāya, taṃ jaññā vasalo iti.
126. ‘‘Yo atthaṃ pucchito santo, anattamanusāsati;
Paṭicchannena manteti, taṃ jaññā vasalo iti.
127. ‘‘Yo katvā pāpakaṃ kammaṃ, mā maṃ jaññāti icchati [vibha. 894 passitabbaṃ];
Yo paṭicchannakammanto, taṃ jaññā vasalo iti.
128. ‘‘Yo ve parakulaṃ gantvā, bhutvāna [sutvā ca (syā. ka.)] sucibhojanaṃ;
Āgataṃ nappaṭipūjeti, taṃ jaññā vasalo iti.
129. ‘‘Yo brāhmaṇaṃ samaṇaṃ vā, aññaṃ vāpi vanibbakaṃ;
Musāvādena vañceti, taṃ jaññā vasalo iti.
130. ‘‘Yo brāhmaṇaṃ samaṇaṃ vā, bhattakāle upaṭṭhite;
Roseti vācā na ca deti, taṃ jaññā vasalo iti.
131. ‘‘Asataṃ yodha pabrūti, mohena paliguṇṭhito;

Kiñcikkhaṃ nijigīsāno [nijigimsāno (sī. syā. kaṃ. pī.)], taṃ jaññā vasalo iti.

132. “Yo cattānaṃ samukkaṃse, pare ca mavajānāti [mavajānāti (sī. syā. pī.)];
Nihīno sena mānena, taṃ jaññā vasalo iti.
133. “Rosako kadariyo ca, pāpiccho maccharī saṭho;
Ahiriko anottappī, taṃ jaññā vasalo iti.
134. “Yo buddhaṃ paribhāsati, atha vā tassa sāvakaṃ;
Paribbājaṃ [paribbajam (ka.), paribbājakaṃ (syā. kaṃ.)] gahaṭṭhaṃ vā, taṃ jaññā vasalo iti.
135. “Yo ve anaraḥaṃ [anarahā (sī. pī.)] santo, araḥaṃ paṭijānāti [paṭijānāti (sī. syā. pī.)];
Coro sabrahmake loke, eso kho vasalādhamo.
136. “Ete kho vasalā vuttā, mayā yete pakāsītā;
Na jaccā vasalo hoti, na jaccā hoti brāhmaṇo;
Kammunā [kammanā (sī. pī.)] vasalo hoti, kammunā hoti brāhmaṇo.
137. “Tadamināpi jānātha, yathāmedaṃ [yathāpedaṃ (ka.)] nidassanaṃ;
Caṇḍālaputto sopāko [sapāko (?)], mātaṅgo iti vissuto.
138. “So yasaṃ paramaṃ patto [so yasapparamappatto (syā. ka.)], mātaṅgo yaṃ sudullabhaṃ;
Āgacchuṃ tassupaṭṭhānaṃ, khattiyā brāhmaṇā bahū.
139. “Devayānaṃ abhiruyha, virajaṃ so mahāpathaṃ;
Kāmarāgaṃ virājetvā, brahmalokūpago ahu;
Na naṃ jāti nivāresi, brahmalokūpapattiyā.
140. “Ajjhāyakakule jātā, brāhmaṇā mantabandhavā;
Te ca pāpesu kammesu, abhiṇṇhamupadissare.
141. “Diṭṭheva dhamme gārayhā, samparāye ca duggati;
Na ne jāti nivāreti, duggatyā [duggaccā (sī. syā. kaṃ. pī.)] garahāya vā.
142. “Na jaccā vasalo hoti, na jaccā hoti brāhmaṇo;
Kammunā vasalo hoti, kammunā hoti brāhmaṇo”’ti.

Evamaṃ vutte, aggikabhāradvājo brāhmaṇo bhagavantaṃ etadavoca – “abhikkantaṃ, bho gotama... pe... upāsakaṃ maṃ bhavaṃ gotamo dhāretu ajjatagge pāṇupetaṃ saraṇaṃ gata”’nti.

Vasalasuttaṃ sattamaṃ niṭṭhitaṃ.

8. Mettasuttaṃ

143. Karaṇīyamatthakusalena, yanta santaṃ padaṃ abhisamecca;
Sakko ujū ca suhujū [sūjū (sī.)] ca, sūvaco cassa mudu anatimānī.
144. Santussako ca subhāro ca, appakicco ca sallahukavutti;
Santindriyo ca nipako ca, appagabbho kulesvananugiddho.
145. Na ca khuddamācare kiñci, yena viññū pare upavadeyyuṃ;

Sukhino va khemino hontu, sabbasattā [sabbe sattā (sī. syā.)] bhavantu sukhittattā.

146. Ye keci pāṇabhūtatti, tasā vā thāvarā vanavasesā;
Dīghā vā ye va mahantā [mahanta (?)], majjhimā rassakā aṇukathulā.
147. Diṭṭhā vā ye va adiṭṭhā [adiṭṭha (?)], ye va [ye ca (sī. syā. kaṃ. pī.)] dūre vasanti avidūre;
Bhūtā va sambhavesī va [bhūtā vā sambhavesī vā (syā. kaṃ. pī. ka.)], sabbasattā bhavantu sukhittattā.
148. Na paro paraṃ nikubbetha, nātimaññetha katthaci na kañci [naṃ kañci (sī. pī.), naṃ kiñci (syā.), na kiñci (ka.)];
Byārosanā paṭighasaññā, nāññamaññassa dukkhamiccheyya.
149. Mātā yathā niyaṃ puttamāyusā ekaputtamanurakkhe;
Evampi sabbabhūtesu, mānasam bhāvaye aparimāṇam.
150. Mettañca sabbalokasmi, mānasam bhāvaye aparimāṇam;
Uddham adho ca tiriyañca, asambādham averamasapattam.
151. Tiṭṭham caraṃ nisinno va [vā (sī. syā. kaṃ. pī.)], sayāno yāvatāssa vitamiddho [vigatamiddo (bahūsu)];
Etaṃ satim adhiṭṭheyya, brahmametaṃ vihāramidhamāhu.
152. Diṭṭhiñca anupaggamma, sīlavā dassanena sampanno;
Kāmesu vinaya [vineyya (sī. syā. pī.)] gedham, na hi jātuggabbhaseyya punareṭṭi.

Mettasuttaṃ aṭṭhamam niṭṭhitam.

9. Hemavatasuttaṃ

153. “Aṃṃa pannaraso uposatho, (iti sātāgiro yakkho)
Dibbā [dibbyā (sī. syā. kaṃ. pī.)] ratti upaṭṭhitā;
Anomanāmaṃ satthāraṃ, handa passāma gotamaṃ”.
154. “Kacci mano supaṇihito, (iti hemavato yakkho)
Sabbabhūtesu tādino;
Kacci iṭṭhe aniṭṭhe ca, saṅkappassa vasīkatā”.
155. “Mano cassa supaṇihito, (iti sātāgiro yakkho)
Sabbabhūtesu tādino;
Atho iṭṭhe aniṭṭhe ca, saṅkappassa vasīkatā”.
156. “Kacci adinnaṃ nādiyati, (iti hemavato yakkho)
Kacci pāṇesu saññato;
Kacci ārā pamādamhā, kacci jhānaṃ na riñcati”.
157. “Na so adinnaṃ ādiyati, (iti sātāgiro yakkho)
Atho pāṇesu saññato;
Atho ārā pamādamhā, buddho jhānaṃ na riñcati”.
158. “Kacci musā na bhaṇati, (iti hemavato yakkho)
Kacci na khīṇabyappatho;

Kacci vebhūtiyaṃ nāha, kacci samphaṃ na bhāsati”.

159. “Musā ca so na bhaṇati, (iti sātāgiro yakkho)
Atho na khīṇabyappaṭho;
Atho vebhūtiyaṃ nāha, mantā atthaṃ ca [atthaṃ so (sī. pī. ka.)] bhāsati”.
160. “Kacci na rajjati kāmesu, (iti hemavato yakkho)
Kacci cittaṃ anāvilāṃ;
Kacci mohāṃ atikkanto, kacci dhammesu cakkhumā”.
161. “Na so rajjati kāmesu, (iti sātāgiro yakkho)
Atho cittaṃ anāvilāṃ;
Sabbamoḥāṃ atikkanto, buddho dhammesu cakkhumā”.
162. “Kacci vijjāya sampanno, (iti hemavato yakkho)
Kacci saṃsuddhacāraṇo;
Kaccissa āsavā khīṇā, kacci natthi punabbhavo”.
163. “Vijjāya ceva sampanno, (iti sātāgiro yakkho)
Atho saṃsuddhacāraṇo;
Sabbassa āsavā khīṇā, natthi tassa punabbhavo”.
164. “Sampannaṃ munino cittaṃ, kammunā byappaṭhena ca;
Vijjācaraṇasampannaṃ, dhammato naṃ pasamsati”.
165. “Sampannaṃ munino cittaṃ, kammunā byappaṭhena ca;
Vijjācaraṇasampannaṃ, dhammato anumodasi”.
166. “Sampannaṃ munino cittaṃ, kammunā byappaṭhena ca;
Vijjācaraṇasampannaṃ, handa passāma gotamaṃ.
167. “Eṇijaṅghaṃ kisaṃ vīraṃ [dhīraṃ (syā.)], appāhāraṃ alolupaṃ;
Muniṃ vanasmiṃ jhāyantaṃ, ehi passāma gotamaṃ.
168. “Sīhaṃvekacaraṃ nāgaṃ, kāmesu anapekkhinaṃ;
Upasaṅkamma pucchāma, maccupāsappamaṇaṃ.
169. “Akkhātāraṃ pavattāraṃ, sabbadhammāna pāraguṃ;
Buddhaṃ verabhayātītaṃ, mayaṃ pucchāma gotamaṃ”.
170. “Kismiṃ loko samuppanno, (iti hemavato yakkho)
Kismiṃ kubbaṭi santhavaṃ [sandhavaṃ (ka.)];
Kissa loko upādāya, kismiṃ loko vihaññati”.
171. “Chasu [chassu (sī. pī.)] loko samuppanno, (hemavatāti bhagavā)
Chasu kubbaṭi santhavaṃ;
Chanameva upādāya, chasu loko vihaññati”.
172. “Katamaṃ taṃ upādānaṃ, yattha loko vihaññati;
Niyyānaṃ pucchito brūhi, kathaṃ dukkhā pamuccati” [pamuñcati (syā.)].
173. “Pañca kāmaguṇā loke, manochaṭṭhā paveditā;

Ettha chandaṃ virājetvā, evaṃ dukkhā pamuccati.

174. “Etaṃ lokassa niyyānaṃ, akkhātaṃ vo yathātathaṃ;
Etaṃ vo ahamakkhāmi, evaṃ dukkhā pamuccati”.
175. “Ko sūḍha tarati oghaṃ, kodha tarati aṇṇavaṃ;
Appatiṭṭhe anālambe, ko gambhīre na sīdati”.
176. “Sabbadā sīlasampanno, paññavā susamāhito;
Ajjhatacintī [ajjhattasaññī (syā. kaṃ. ka.)] satimā, oghaṃ tarati duttaraṃ.
177. “Virato kāmasaññāya, sabbasaṃyojanātigo;
Nandībhavaparikkhīno, so gambhīre na sīdati”.
178. “Gabbhīrapaññaṃ nipuṇatthadassiṃ, akiñcanaṃ kāmabhava asattaṃ;
Taṃ passatha sabbadhi vippamuttaṃ, dibbe pathe kamamānaṃ mahesiṃ.
179. “Anomanāmaṃ nipuṇatthadassiṃ, paññādadamaṃ kāmālaye asattaṃ;
Taṃ passatha sabbaviduṃ sumedhaṃ, ariye pathe kamamānaṃ mahesiṃ.
180. “Sudiṭṭhaṃ vata no ajja, suppaḥhātaṃ suhuṭṭhitaṃ;
Yaṃ addasāma sambuddhaṃ, oghatiṇṇamanāsavaṃ.
181. “Ime dasasatā yakkhā, iddhimanto yasassino;
Sabbe taṃ saraṇaṃ yanti, tvaṃ no satthā anuttaro.
182. “Te mayaṃ vicarissāma, gāmā gāmaṃ nagā nagaṃ;
Namassamānā sambuddhaṃ, dhammassa ca sudhammata”nti.

Hemavatasuttaṃ navamaṃ niṭṭhitaṃ.

10. Ālavakasuttaṃ

Evaṃ me suttaṃ – ekaṃ samayaṃ bhagavā ālaviyaṃ viharati ālavakassa yakkhassa bhavane. Atha kho ālavako yakkho yena bhagavā tenupasaṅkami; upasaṅkamitvā bhagavantaṃ etadavoca – “nikkhama, samaṇā”ti. “Sādhāvuso”ti bhagavā nikkhami. “Pavisa, samaṇā”ti. “Sādhāvuso”ti bhagavā pāvīsi.

Dutiyampi kho...pe... tatiyampi kho ālavako yakkho bhagavantaṃ etadavoca – “nikkhama, samaṇā”ti. “Sādhāvuso”ti bhagavā nikkhami. “Pavisa, samaṇā”ti. “Sādhāvuso”ti bhagavā pāvīsi.

Catutthampi kho ālavako yakkho bhagavantaṃ etadavoca – “nikkhama, samaṇā”ti. “Na khvāhaṃ taṃ, āvuso, nikkhamissāmi. Yaṃ te karaṇīyaṃ, taṃ karohī”ti.

“Pañhaṃ taṃ, samaṇa, pucchissāmi. Sace me na byākarissasi, cittaṃ vā te khipissāmi, hadayaṃ vā te phālessāmi, pādesu vā gahetvā pāraṅgāya khipissāmi”ti.

“Na khvāhaṃ taṃ, āvuso, passāmi sadevake loke samārake sabrahmake sassamaṇabrāhmaṇiyā pajāya sadevamanussāya yo me cittaṃ vā khipeyya hadayaṃ vā phāleyya pādesu vā gahetvā pāraṅgāya khipeyya. Api ca tvaṃ, āvuso, puccha yadākaṅkhasī”ti. Atha kho ālavako yakkho bhagavantaṃ gāthāya ajjhabhāsi –

183. “Kiṃ sūḍha vittaṃ purisassa seṭṭhaṃ, kiṃ su suciṇṇaṃ sukhamāvahāti;
Kiṃ su [kiṃ sū (sī.)] have sādutaraṃ rasānaṃ, kathaṃ jīviṃ jīvitamāhu seṭṭhaṃ”.
184. “Saddhīdha vittaṃ purisassa seṭṭhaṃ, dhammo suciṇṇo sukhamāvahāti;
Saccaṃ have sādutaraṃ rasānaṃ, paññājīviṃ jīvitamāhu seṭṭhaṃ”.
185. “Kathaṃ su tarati oghaṃ, kathaṃ su tarati aṇṇavaṃ;
Kathaṃ su dukkhamacceti, kathaṃ su parisujjhati”.
186. “Saddhā tarati oghaṃ, appamādena aṇṇavaṃ;
Vīriyena [viriyena (sī. syā. kaṃ. pī.)] dukkhamacceti, paññāya parisujjhati”.
187. “Kathaṃ su labhate paññaṃ, kathaṃ su vindate dhanaṃ;
Kathaṃ su kittiṃ pappoti, kathaṃ mittāni ganthati;
Asmā lokā paraṃ lokāṃ, kathaṃ pecca na socati”.
188. “Saddahāno arahataṃ, dhammaṃ nibbānapattiyā;
Sussūsaṃ [sussūsā (sī. pī.)] labhate paññaṃ, appamatto vicakkhaṇo.
189. “Patirūpakārī dhuravā, utṭhātā vindate dhanaṃ;
Saccena kittiṃ pappoti, dadaṃ mittāni ganthati.
190. “Yassete caturo dhammā, saddhassa gharamesino;
Saccaṃ dhammo [damo (?)] dhiti cāgo, sa ve pecca na socati.
191. “Ingha aññepi pucchassu, puthū samaṇabrāhmaṇe;
Yadī saccā damā cāgā, khantiyā bhīyyodha vijjati”.
192. “Kathaṃ nu dāni puccheyyaṃ, puthū samaṇabrāhmaṇe;
Yohaṃ [sohaṃ (sī. pī.)] ajja pajānāmi, yo attho samparāyiko.
193. “Atthāya vata me buddho, vāsāyālavimāgamā;
Yohaṃ [atṭhinhārūhi saṃyutto (syā. ka.)] ajja pajānāmi, yattha dinnāṃ mahapphalaṃ.
194. “So ahaṃ vicarissāmi, gāmā gāmaṃ purā puraṃ;
Namassamāno sambuddhaṃ, dhammassa ca sudhammata”’nti.

Āḷavakasuttaṃ dasamaṃ niṭṭhitaṃ.

11. Vijayasuttaṃ

195. Caram vā yadī vā tiṭṭhaṃ, nisinno uda vā sayamaṃ;
Samiñjeti pasāreti, esā kāyassa iñjanā.
196. Atṭhinahārusaṃyutto, tacamaṃsāvalepano;
Chaviyā kāyo paṭicchanno, yathābhūtaṃ na dissati.
197. Antapūro udarapūro, yakanapeḷassa [yakapeḷassa (sī. syā.)] vatthino;
Hadayassa papphāsassa, vakkassa pihakassa ca.
198. Siṅghānikāya kheḷassa, sedassa ca medassa ca;
Lohitassa lasikāya, pittassa ca vasāya ca.

199. Athassa navahi sotehi, asucī savati sabbadā;
Akkhīmhā akkhigūthako, kaṇṇamhā kaṇṇagūthako.
200. Singhāṇikā ca nāsato, mukhena vamatekadā;
Pittaṃ semhañca vamaṭi, kāyamhā sedajallikā.
201. Athassa susiraṃ sīsaṃ, matthaluṅgassa pūritaṃ;
Subhato naṃ maññati, bālo avijjāya purakkhato.
202. Yadā ca so mato seti, uddhumāto vinīlako;
Aparaiddho susānasmīṃ, anapekkhā honti ñātayo.
203. Khādanti naṃ suvānā [supāṇā (pī.)] ca, siṅgālā [sigālā (sī. syā. kaṃ. pī.)] vakā kimī;
Kākā gijjhā ca khādanti, ye caññe santi paṇino.
204. Sutvāna buddhavacanaṃ, bhikkhu paññāṇavā idha;
So kho naṃ parijānāti, yathābhūtañhi passati.
205. Yathā idaṃ tathā etaṃ, yathā etaṃ tathā idaṃ;
Ajjhattaṅca bahiddhā ca, kāye chandaṃ virājaye.
206. Chandarāgaviratto so, bhikkhu paññāṇavā idha;
Ajjhagā amataṃ santiṃ, nibbānaṃ padamaccutaṃ.
207. Dvipādakoyaṃ [dipādakoyaṃ (sī. syā. kaṃ. pī.)] asuci, duggandho parihārati [parihārati (sī. syā. kaṃ. pī.)];
Nānakuṇapaparipūro, vissavanto tato tato.
208. Etādisena kāyena, yo maññe uṇṇametave [unnametave (?)];
Paraṃ vā avajāneyya, kimaññatra adassanāti.

Vijayasuttaṃ ekādasamaṃ niṭṭhitaṃ.

12. Munisuttaṃ

209. Santhavāto [sandhavato (ka.)] bhayaṃ jātaṃ, nīketā jāyate rajo;
Anīketamasanthavaṃ, etaṃ ve munidassanaṃ.
210. Yo jātamucchiṇṇa na ropayeyya, jāyantamassa nānuppavecche;
Tamāhu ekaṃ muninaṃ carantaṃ, addakkhi so santipadaṃ mahesi.
211. Saṅkhāya vatthūni pamāya [pahāya (ka. sī. ka.), samāya (ka.) pa + mī + tvā = pamāya, yathā nissāyātīpadaṃ] bījaṃ, sinehamassa nānuppavecche;
Sa ve munī jātikhayantadassī, takkaṃ pahāya na upeti saṅkhaṃ.
212. Aññāya sabbāni nivesanāni, anikāmayamaññatarampi tesamaṃ;
Sa ve munī vītagedho agiddho, nāyūhatī pāragato hi hoti.
213. Sabbābhibhuṃ sabbaviduṃ sumedhaṃ, sabbesu dhammesu anūpalittaṃ;
Sabbāñjahaṃ taṇhakkhaye vimuttaṃ, taṃ vāpi dhīrā muni [munī (sī. pī.)] vedayanti.
214. Paññābalaṃ sīlavatūpapannaṃ, samāhitaṃ jhānaraṃ saṭīmaṃ;

Saṅgā pamuttaṃ akhilaṃ anāsavaṃ, taṃ vāpi dhīrā muni vedayanti.

215. Ekam carantaṃ munimappamattaṃ, nindāpasamsāsu avedhamānaṃ;
Sīhaṃva saddesu asantantaṃ, vātaṃva jālamhi asajjamaṇaṃ;
Padmaṃva [padumaṃva (sī. syā. pī.)] toyena alippamaṇaṃ [alimpamaṇaṃ (syā. ka.)],
netāramaññesamaññaneyyaṃ;
Taṃ vāpi dhīrā muni vedayanti.
216. Yo ogahaṇe thambhorivābhijāyati, yasmim pare vācāpariyantaṃ [vācaṃ pariyantaṃ (ka.)]
vadanti;
Taṃ vītarāgaṃ susamāhitindriyaṃ, taṃ vāpi dhīrā muni vedayanti.
217. Yo ve ʒhitatto tasaraṃva ujju, jigucchati kammehi pāpakehi;
Vīmaṃsamāno visamaṃ samañca, taṃ vāpi dhīrā muni vedayanti.
218. Yo saññatatto na karoti pāpaṃ, daharo majjhimo ca muni [daharo ca majjho ca munī (sī. syā.
kaṃ. pī.)] yatatto;
Arosaneyyo na so roseti kañci [na roseti (syā.)], taṃ vāpi dhīrā muni vedayanti.
219. Yadaggato majjhato sesato vā, piṇḍaṃ labhetha paradattūpajīvī;
Nālaṃ thutaṃ nopi nipaccavādī, taṃ vāpi dhīrā muni vedayanti.
220. Munim carantaṃ virataṃ methunasmā, yo yobbane nopanibajjhate kvaci;
Madappamādā virataṃ vippamuttaṃ, taṃ vāpi dhīrā muni vedayanti.
221. Aññāya lokaṃ paramatthadassiṃ, oghaṃ samuddaṃ atitariya tādiṃ;
Taṃ chinnaṃthaṃ asitaṃ anāsavaṃ, taṃ vāpi dhīrā muni vedayanti.
222. Asamā ubho dūravihāravuttino, gihī [gihi (ka.)] dāraposī amamo ca subbato;
Parapānarodhāya gihī asaññato, niccaṃ munī rakkhati pāṇine [pāṇino (sī.)] yato.
223. Sikhī yathā nīlagīvo [nīlagīvo (syā.)] vihaṅgamo, haṃsassa nopeti javaṃ kudācanaṃ;
Evaṃ gihī nānukaroti bhikkhuno, munino vivittassa vanamhi jhāyatoti.

Munisuttaṃ dvādasamaṃ niṭṭhitaṃ.

Uragavaggo paṭhamo niṭṭhito.

Tassuddānaṃ –

Urago dhaniyo ceva, visāṇaṇca tathā kasi;
Cundo parābhavo ceva, vasalo mettabhāvanā.

Sātāgiro ālavako, vijayo ca tathā muni;
Dvādasatāni suttāni, uragavaggoti vuccatīti.

2. Cūlavaggo

1. Ratanasuttaṃ

224. Yānīdha bhūtāni samāgatāni, bhummāni [bhūmāni (ka.)] vā yāni va antalikkhe;
Sabbeva bhūtā sumanā bhavantu, athopi sakkacca suṇantu bhāsitaṃ.
225. Tasmā hi bhūtā nisāmetha sabbe, mettaṃ karotha mānusiya pajāya;
Divā ca ratto ca haranti ye balim, tasmā hi ne rakkhatha appamattā.
226. Yaṃ kiñci vittaṃ idha vā huram vā, saggesu vā yaṃ ratanaṃ paṇītaṃ;
Na no samaṃ atthi tathāgatena, idampi buddhe ratanaṃ paṇītaṃ;
Etena saccena suvatthi hotu.
227. Khayaṃ virāgaṃ amataṃ paṇītaṃ, yadajjhagā sakyamunī samāhito;
Na tena dhammena samatthi kiñci, idampi dhamme ratanaṃ paṇītaṃ;
Etena saccena suvatthi hotu.
228. Yaṃ buddhasettḥo parivaṇṇayī sucim, samādhimānantarikaññamāhu;
Samādhinā tena samo na vijjati, idampi dhamme ratanaṃ paṇītaṃ;
Etena saccena suvatthi hotu.
229. Ye puggalā aṭṭha satam pasatthā, cattāri etāni yugāni honti;
Te dakkhiṇeyyā sugatassa sāvaka, etesu dinnāni mahapphalāni;
Idampi saṅhe ratanaṃ paṇītaṃ, etena saccena suvatthi hotu.
230. Ye suppayuttā manasā daḷhena, nikkāmino gotamasāsanamhi;
Te pattipattā amataṃ vigayha, laddhā mudhā nibbutim [nibbuti (ka.)] bhuñjamānā;
Idampi saṅhe ratanaṃ paṇītaṃ, etena saccena suvatthi hotu.
231. Yathindakhīlo pathavissito [padavissito (ka. sī.), paṭhaviṃ sito (ka. sī. syā. kaṃ. pī.)] siyā,
catubbhi vātehi asampakampiyo;
Tathūpamaṃ sappurisaṃ vadāmi, yo ariyasaccāni avecca passati;
Idampi saṅhe ratanaṃ paṇītaṃ, etena saccena suvatthi hotu.
232. Ye ariyasaccāni vibhāvayanti, gambhīrapaññena sudesitāni;
Kiñcāpi te honti bhusaṃ pamattā, na te bhavaṃ aṭṭhamamādiyanti;
Idampi saṅhe ratanaṃ paṇītaṃ, etena saccena suvatthi hotu.
233. Sahāvassa dassanasampadāya [sahāvasaddassanasampadāya (ka.)], tayassu dhammā jahitā
bhavanti;
Sakkāyadiṭṭhi vicikicchitañca, sīlabbataṃ vāpi yadatthi kiñci.
234. Catūhapāyehi ca vippamutto, chaccābhiṭṭhānāni [cha cābhiṭṭhānāni (sī. syā.)] bhabba kātuṃ
[abhabbo kātuṃ (sī.)];
Idampi saṅhe ratanaṃ paṇītaṃ, etena saccena suvatthi hotu.
235. Kiñcāpi so kamma [kammaṃ (sī. syā. kaṃ. pī.)] karoti pāpakaṃ, kāyena vācā uda cetasā vā;
Abhabba [abhabbo (bahūsu)] so tassa paṭicchadāya [paṭicchādāya (sī.)], abhabbatā
diṭṭhapadassa vuttā;
Idampi saṅhe ratanaṃ paṇītaṃ, etena saccena suvatthi hotu.
236. Vanappagumbe yatha [yathā (sī. syā.)] phussitagge, gimhānamāse paṭhamasmiṃ [paṭhamasmi
(?)] gimhe;
Tathūpamaṃ dhammavaraṃ adesayi [adesayī (sī.)], nibbānagāmiṃ paramaṃ hitāya;
Idampi buddhe ratanaṃ paṇītaṃ, etena saccena suvatthi hotu.

237. Varo varaññū varado varāharo, anuttaro dhammavaraṃ adesayi;
Idampi buddhe ratanaṃ paṇītaṃ, etena saccena suvatthi hotu.
238. Khīṇaṃ purāṇaṃ nava natthi sambhavaṃ, virattacittāyatike bhavasmiṃ;
Te khīṇabījā avirūhichandā, nibbantntti dhīrā yathāyaṃ [yathayaṃ (ka.)] padīpo;
Idampi saṅghe ratanaṃ paṇītaṃ, etena saccena suvatthi hotu.
239. Yānīdha bhūtāni samāgatāni, bhummāni vā yāni va antalikkhe;
Tathāgataṃ devamanussapūjitaṃ, buddhaṃ namassāma suvatthi hotu.
240. Yānīdha bhūtāni samāgatāni, bhummāni vā yāni va antalikkhe;
Tathāgataṃ devamanussapūjitaṃ, dhammaṃ namassāma suvatthi hotu.
241. Yānīdha bhūtāni samāgatāni, bhummāni vā yāni va antalikkhe;
Tathāgataṃ devamanussapūjitaṃ, saṅghaṃ namassāma suvatthi hotūti.

Ratanasuttaṃ paṭhamamaṃ niṭṭhitaṃ.

2. Āmagandhasuttaṃ

242. “Sāmākaciṅgūlakacīnakāni ca, pattapphalaṃ mūlaphalaṃ gavippphalaṃ;
Dhammena laddhaṃ satamasnamānā [satamasamānā (sī. pī.), satamassamānā (syā. kaṃ.)], na
kāmakāmā alikaṃ bhaṇanti.
243. “Yadasnamāno sukataṃ suniṭṭhitaṃ, parehi dinnamaṃ payataṃ paṇītaṃ;
Sālīnamannaṃ paribhuñjamaṃ, so bhuñjasī kassapa āmagandhaṃ.
244. “Na āmagandho mama kappatīti, icceva tvaṃ bhāsasi brahmabandhu;
Sālīnamannaṃ paribhuñjamaṃ, sakuntamaṃsehi susaṅkhatehi;
Pucchāmi taṃ kassapa etamatthaṃ, kathaṃ pakāro tava āmagandho”.
245. “Pāṇātipāto vadhachedabandhanaṃ, theyyaṃ musāvādo nikativañcanāni ca;
Ajjenakuttaṃ [ajjhena kujjaṃ (sī. pī.)] paradārasevanā, esāmagandho na hi maṃsabhojanaṃ.
246. “Ye idha kāmesu asaṇṇatā janā, rasesu gidhā asucibhāvamassitā [asucīkamissitā (sī. syā.
kaṃ. pī.)];
Natthikadiṭṭhī visamā durannayā, esāmagandho na hi maṃsabhojanaṃ.
247. “Ye lūkhasā dāruṇā piṭṭhimaṃsikā [ye lūkharasā dāruṇā parapiṭṭhimaṃsikā (ka.)], mittadduno
nikkaruṇātimānino;
Adānasīlā na ca denti kassaci, esāmagandho na hi maṃsabhojanaṃ.
248. “Kodho mado thambho paccupaṭṭhāpanā [paccuṭṭhāpanā ca (sī. syā.), paccuṭṭhāpanā (pī.)],
māyā usūyā bhassasamussayo ca;
Mānātimāno ca asabbhi santhavo, esāmagandho na hi maṃsabhojanaṃ.
249. “Ye pāpasīlā iṇaghātasūcakā, vohārakūṭā idha pāṭirūpikā [pāṭirūpikā (?)];
Narādhamā yedha karonti kibbisamaṃ, esāmagandho na hi maṃsabhojanaṃ.
250. “Ye idha pāṇesu asaṇṇatā janā, paresamādāya vihesamuyyutā;
Dussīlaluddā pharusā anādarā, esāmagandho na hi maṃsabhojanaṃ.

251. “Etesu giddhā viruddhātipātino, niccuyyutā pecca tamaṃ vajanti ye;
Patanti sattā nirayaṃ avamaṃsirā, esāmagandho na hi maṃsabhojanaṃ.
252. “Na macchamaṃsānāmanāsakattaṃ [na macchamaṃsaṃ na anāsakattaṃ (sī. aṭṭha mūlapāṭho), na maṃcchamaṃsānānāsakattaṃ (syā. ka.)], na naggiyaṃ na muṇḍiyaṃ jaṭājallaṃ;
Kharājīnāni nāggihuttassupasevanā, ye vāpi loke amarā bahū tapā;
Mantāhutī yaññamutūpasevanā, sodhenti maccaṃ avitiṇṇakaṅkhaṃ.
253. “Yo tesu [sotesu (sī. pī.)] gutto veditindriyo care, dhamme ṭhito ajjavamaddave rato;
Saṅgātigo sabbadukkhappahīno, na lippati [na limpati (syā. kaṃ ka.)] diṭṭhasutesu dhīro”.
254. Icchetamattaṃ bhagavā punappunaṃ, akkhāsi naṃ [taṃ (sī. pī.)] vedayi mantapāragū;
Citrāhi gāthāhi munī pakāsayaī, nirāmagandho asito durannayo.
255. Sutvāna buddhassa subhāsitaṃ padaṃ, nirāmagandhaṃ sabbadukkhappanūdanaṃ;
Nīcamano vandi tathāgatassa, tattheva pabbajjamarocayitthāti.

Āmagandhasuttaṃ dutiyaṃ niṭṭhitaṃ.

3. Hirisuttaṃ

256. Hirim tarantaṃ vijigucchamaṇaṃ, tavāhamasmi [sakhāhamasmi (sī. syā. kaṃ. pī.)] iti bhāsamaṇaṃ;
Sayhāni kammāni anādiyaṃtaṃ, neso mamanti iti naṃ vijaññā.
257. Ananvayaṃ [atthanvayaṃ (ka.)] piyaṃ vācaṃ, yo mittesu pakubbati;
Akarontaṃ bhāsamaṇaṃ, pariṇānanti paṇḍitā.
258. Na so mitto yo sadā appamatto, bhedāsaṅkī randhamevānupassī;
Yasmiṅca seti urasīva putto, sa ve mitto yo parehi abhejjo.
259. Pāmujjakaraṇaṃ ṭhānaṃ, pasamaṃsāvahanaṃ sukhaṃ;
Phalānisamaṃso bhāveti, vahanto porisaṃ dhuraṃ.
260. Pavivekaraṃsaṃ pitvā, rasaṃ upasamassa ca;
Niddaro hoti nippāpo, dhammapīrasaṃ pivanti.

Hirisuttaṃ tatiyaṃ niṭṭhitaṃ.

4. Maṅgalasuttaṃ

Evamaṃ me suttaṃ – ekaṃ samayaṃ bhagavā sāvatthiyaṃ viharati jetavane anāthapiṇḍikassa ārāme.
Atha kho aññatarā devatā abhikkantāya rattiyā abhikkantavaṇṇā kevalakappaṃ jetavanaṃ obhāsetvā
yena bhagavā tenupasaṅkami; upasaṅkamitvā bhagavantaṃ abhivādetvā ekamantaṃ aṭṭhāsi. Ekamantaṃ
ṭhitā kho sā devatā bhagavantaṃ gāthāya ajjhābhāsi –

261. “Bahū devā manussā ca, maṅgalāni acintayaṃ;
Ākaṅkhamānā sothānaṃ, brūhi maṅgalamuttamaṃ”.
262. “Asevanā ca bālānaṃ, paṇḍitānaṃca sevanā;

Pūjā ca pūjaneyyānaṃ [pūjanīyānaṃ (sī. syā. kaṃ. pī.)], etaṃ maṅgalamuttamaṃ.

263. “Patirūpadesavāso ca, pubbe ca katapuññatā;
Attasammāpaṇidhi [attasammāpaṇidhī (katthaci)] ca, etaṃ maṅgalamuttamaṃ.
264. “Bāhusaccaṅca sippaṅca, vinayo ca susikkhito;
Subhāsītā ca yā vācā, etaṃ maṅgalamuttamaṃ.
265. “Mātāpitu upaṭṭhānaṃ, puttadārassa saṅgaho;
Anākulā ca kammantā, etaṃ maṅgalamuttamaṃ.
266. “Dānaṅca dhammacariyā ca, ñātakānaṅca saṅgaho;
Anavajjāni kammāni, etaṃ maṅgalamuttamaṃ.
267. “Āratī viratī pāpā, majjapānā ca saṃyamo;
Appamādo ca dhammesu, etaṃ maṅgalamuttamaṃ.
268. “Gāravo ca nivāto ca, santuṭṭhi ca kataññutā;
Kālena dhammassavanaṃ [dhammasavaṇaṃ (katthaci), dhammasavanaṃ (sī. ka.)], etaṃ maṅgalamuttamaṃ.
269. “Khantī ca sovacassatā, samaṇānaṅca dassanaṃ;
Kālena dhammasākacchā, etaṃ maṅgalamuttamaṃ.
270. “Tapo ca brahmacariyaṅca, ariyasaccāna dassanaṃ;
Nibbānasacchikiriyā ca, etaṃ maṅgalamuttamaṃ.
271. “Phuṭṭhassa lokadhammehi, cittaṃ yassa na kampati;
Asokaṃ virajaṃ khemaṃ, etaṃ maṅgalamuttamaṃ.
272. “Etādisāni katvāna, sabbatthamaparājītā;
Sabbattha sotthiṃ gacchanti, taṃ tesam maṅgalamuttama”nti.

Maṅgalasuttaṃ catutthaṃ niṭṭhitaṃ.

5. Sūcilomasuttaṃ

Evamaṃ me suttaṃ – ekaṃ samayaṃ bhagavā gayāyaṃ viharati ṭaṅkitamaṅca sūcilomassa yakkhassa bhavane. Tena kho pana samayena kharo ca yakkho sūcilomo ca yakkho bhagavato avidūre atikkamanti. Atha kho kharo yakkho sūcilomaṃ yakkhaṃ etadavoca – “eso samaṇo”ti. “Neso samaṇo, samaṇako eso. Yāvāhaṃ jānāmi [yāva jānāmi (sī. pī.)] yadī vā so samaṇo [yadī vā samaṇo (syā.)], yadī vā so samaṇako”ti [yadī vā samaṇakoti (sī. syā. pī.)].

Atha kho sūcilomo yakkho yena bhagavā tenupasaṅkami; upasaṅkamtivā bhagavato kāyaṃ upanāmesi. Atha kho bhagavā kāyaṃ apanāmesi. Atha kho sūcilomo yakkho bhagavantaṃ etadavoca – “bhāyasi maṃ, samaṇā”ti? “Na khvāhaṃ taṃ, āvuso, bhāyāmi; api ca te sapphasso pāpako”ti.

“Pañhaṃ taṃ, samaṇa, pucchissāmi. Sace me na byākarissasi, cittaṃ vā te khipissāmi, hadayaṃ vā te phālessāmi, pādesu vā gahetvā pāragaṅgāya khipissāmi”ti.

“Na khvāhaṃ taṃ, āvuso, passāmi sadevake loke samārake sabrahmake sassamaṇabrāhmaṇiyā

pajāya sadevamanussāya yo me cittaṃ vā khipeyya hadayaṃ vā phāleyya pādesu vā gahetvā pāraṅgāya khipeyya. Api ca tvaṃ, āvuso, pucchā yadākaṅkhasī’’ti. Atha kho sūcilomo yakkho bhagavantam gāthāya ajjhabhāsi –

273. ‘‘Rāgo ca doso ca kutonidānā, aratī ratī lomahaṃso kutojā;
Kuto samuṭṭhāya manovitakkā, kumārakā dhaṅkamivossajanti’’.
274. ‘‘Rāgo ca doso ca itonidānā, aratī ratī lomahaṃso itojā;
Ito samuṭṭhāya manovitakkā, kumārakā dhaṅkamivossajanti.
274. ‘‘Snehajā attasambhūtā, nigrodhasseva khandhajā;
Puthū visattā kāmesu, mālurvāva vitatāvane.
275. ‘‘Ye naṃ pajānanti yatonidānaṃ, te naṃ vinodenti suṇohi yakkha;
Te duttaraṃ oghamimaṃ taranti, atinṇapubbaṃ apunabbhavāyā’’ti.

Sūcilomasuttaṃ pañcamaṃ niṭṭhitam.

6. Dhammacariyasuttaṃ

276. Dhammacariyaṃ brahmacariyaṃ, etadāhu vasuttamaṃ;
Pabbajitopi ce hoti, agārā anagāriyaṃ.
277. So ce mukharajātiko, vihesābhirato mago;
Jivitaṃ tassa pāpiyo, rajaṃ vaḍḍheti attano.
278. Kalahābhirato bhikkhu, mohadhammena āvuto;
Akkhātampi na jānāti, dhammaṃ buddhena desitaṃ.
279. Vihesaṃ bhāvitattānaṃ, avijjāya purakkhato;
Saṃkilesaṃ na jānāti, maggaṃ nirayaḡāminam.
280. Vinipātaṃ samāpanno, gabbhā gabbhaṃ tamā tamaṃ;
Sa ve tādīsako bhikkhu, pecca dukkhaṃ nigacchati.
281. Gūthakūpo yathā assa, sampuṇṇo gaṇavassiko;
Yo ca evarūpo assa, dubbisodho hi sāṅgaṇo.
282. Yaṃ evarūpaṃ jānātha, bhikkhavo gehanissitaṃ;
Pāpicchaṃ pāpasāṅkappaṃ, pāpācāragocaraṃ.
283. Sabbe samaggā hutvāna, abhinibbajjiyātha [[abhinibbajjayātha \(sī. pī. a. ni. 8.10\)](#)] naṃ;
Kāraṇḡavaṃ [[kāraṇḡam va \(syā. ka.\) a. ni. 8.10](#)] niddhamatha, kasambuṃ apakassatha
[[avakassatha \(sī. syā. ka.\)](#)].
284. Tato palāpe [[palāse \(ka.\)](#)] vāhetha, assamaṇe samaṇamānine;
Niddhamitvāna pāpicche, pāpācāragocare.
285. Suddhā suddhehi saṃvāsaṃ, kappayavho patissatā;
Tato samaggā nipakā, dukkhassantaṃ karissathāti.

Dhammacariyasuttaṃ [kapilasuttaṃ (aṭṭha.)] chaṭṭhaṃ niṭṭhitaṃ.

7. Brāhmaṇadhammikasuttaṃ

Evamaṃ me suttaṃ – ekaṃ samayaṃ bhagavā sāvatthiyaṃ viharati jetavane anāthapiṇḍikassa ārāme. Atha kho sambahulā kosalakā brāhmaṇamahāsālā jiṇṇā vuḍḍhā mahallakā addhagatā vayoanuppattā yena bhagavā tenupasaṅkamimṃsu; upasaṅkamitvā bhagavatā saddhiṃ sammodimṃsu. Sammodanīyaṃ kathaṃ sāraṇīyaṃ vītisāretvā ekamantaṃ nisīdimṃsu. Ekamantaṃ nisinnā kho te brāhmaṇamahāsālā bhagavantaṃ etadavocaṃ – “sandissanti nu kho, bho gotama, etarahi brāhmaṇā porāṇānaṃ brāhmaṇānaṃ brāhmaṇadhamme”’ti? “Na kho, brāhmaṇā, sandissanti etarahi brāhmaṇā porāṇānaṃ brāhmaṇānaṃ brāhmaṇadhamme”’ti. “Sādhu no bhavaṃ gotamo porāṇānaṃ brāhmaṇānaṃ brāhmaṇadhammaṃ bhāsatu, sace bhoto gotamassa agarū”’ti. “Tena hi, brāhmaṇā, suṇātha, sādhukaṃ manasi karotha, bhāsissāmī”’ti. “Evaṃ, bho”’ti kho te brāhmaṇamahāsālā bhagavato paccassosumaṃ. Bhagavā etadavoca –

286. “Isayo pubbakā āsumaṃ, saññatattā tapassino;
Pañca kāmagaṇe hitvā, attadatthamacārisumaṃ.
287. “Na pasū brāhmaṇānāsumaṃ, na hiraññaṃ na dhāniyaṃ;
Sajjhāyadhanadhaññāsumaṃ, brahmaṃ nidhimapālayumaṃ.
288. “Yaṃ nesaṃ pakataṃ āsi, dvārabhattaṃ upaṭṭhitaṃ;
Saddhāpakatamesānaṃ, dātave tadamaññisumaṃ.
289. “Nānārattehi vatthehi, sayanehāvasathehi ca;
Phītā janapadā raṭṭhā, te namassimṃsu brāhmaṇe.
290. “Avajjhā brāhmaṇā āsumaṃ, ajeyyā dhammarakkhitā;
Na ne koci nivāresi, kuladvāresu sabbaso.
291. “Aṭṭhacattālīsaṃ vassāni, (komāra) brahmacariyaṃ carimṃsu te;
Vijjācaraṇapariyeṭṭhiṃ, acarumaṃ brāhmaṇā pure.
292. “Na brāhmaṇā aññaṃagamumaṃ, napi bhariyaṃ kiṇimṃsu te;
Sampiyleneva saṃvāsaṃ, saṅgantvā samarocayumaṃ.
293. “Aññaṃtra tamhā samayā, utuveramaṇiṃ pati;
Antarā methunaṃ dhammaṃ, nāssu gacchanti brāhmaṇā.
294. “Brahmacariyañca sīlañca, ajjavaṃ maddavaṃ tapaṃ;
Soraccaṃ avihimṃsañca, khantiñcāpi avaṇṇayumaṃ.
295. “Yo nesaṃ paramo āsi, brahmā dalhaparakkamo;
Sa vāpi methunaṃ dhammaṃ, supinantepi nāgamā.
296. “Tassa vattamanusikkhantā, idheke viññujātikā;
Brahmacariyañca sīlañca, khantiñcāpi avaṇṇayumaṃ.
297. “Taṇḍulaṃ sayanaṃ vatthaṃ, sappitelañca yāciya;
Dhammena samodhānetvā, tato yaññaṃmakappayumaṃ.

298. “Upaṭṭhitasmim̐ yaññasim̐, nāssu gāvo haniṃsu te;
Yathā mātā pitā bhātā, aññe vāpi ca ñātakā;
Gāvo no paramā mittā, yāsu jāyanti osadhā.
299. “Annadā baladā cetā, vaṇṇadā sukhadā tathā [sukhadā ca tā (ka.)];
Etamatthavasam̐ ñatvā, nāssu gāvo haniṃsu te.
300. “Sukhumālā mahākāyā, vaṇṇavanto yasassino;
Brāhmaṇā sehi dhammehi, kiccākiccesu ussukā;
Yāva loke avattiṃsu, sukhamedhitthayaṃ pajā.
301. “Tesaṃ āsi vipallāso, disvāna aṇuto aṇuṃ;
Rājino ca viyākāraṃ, nāriyo samalaṅkatā.
302. “Rathe cājaññasamyutte, sukate cittasibbane;
Nivesane nivese ca, vibhatte bhāgaso mite.
303. “Gomaṇḍalaparibyūlhaṃ, nārīvaragaṇāyutaṃ;
Uḷāraṃ mānusaṃ bhogaṃ, abhijjhāyimsu brāhmaṇā.
304. “Te tattha mante ganthetvā, okkākaṃ tadupāgamuṃ;
Pahūtadhanadhaññosi, yajassu bahu te vittaṃ;
Yajassu bahu te dhanam̐.
305. “Tato ca rājā saññatto, brāhmaṇehi rathesabho;
Assamedham̐ purisamedham̐, sammāpāsaṃ vājapeyyaṃ niraggaḷaṃ;
Ete yāge yajitvāna, brāhmaṇānamadā dhanam̐.
306. “Gāvo sayanañca vatthañca, nāriyo samalaṅkatā;
Rathe cājaññasamyutte, sukate cittasibbane.
307. “Nivesanāni rammāni, suvibhattāni bhāgaso;
Nānādhaññassa pūretvā, brāhmaṇānamadā dhanam̐.
308. “Te ca tattha dhanam̐ laddhā, sannidhiṃ samarocayuṃ;
Tesaṃ icchāvatiṇṇānaṃ, bhiyyo taṇhā pavaḍḍhatha;
Te tattha mante ganthetvā, okkākaṃ punamupāgamuṃ.
309. “Yathā āpo ca pathavī ca, hiraññaṃ dhanadhāniyaṃ;
Evaṃ gāvo manussānaṃ, parikkhāro so hi pāṇinaṃ;
Yajassu bahu te vittaṃ, yajassu bahu te dhanam̐.
310. “Tato ca rājā saññatto, brāhmaṇehi rathesabho;
Nekā satahassiya, gāvo yaññe aghātayi.
311. “Na pādā na visāṇena, nāssu hiṃsanti kenaci;
Gāvo eḷakasamānā, soratā kumbhadūhanā;
Tā visāṇe gahetvāna, rājā satthena ghātayi.
312. “Tato devā pitaro ca [tato ca devā pitaro (sī. syā.)], indo asurarakkhasā;
Adhammo iti pakkanduṃ, yaṃ sattham̐ nipatī gave.

313. “Tayo rogā pure āsuṃ, icchā anasanaṃ jarā;
Pasūnañca samārambhā, aṭṭhānavutimāgamuṃ.
314. “Eso adhammo daṇḍānaṃ, okkanto purāṇo ahu;
Adūsikāyo haññanti, dhammā dhaṃsanti [dhaṃsenti (sī. pī.)] yājakā.
315. “Evameso aṇudhammo, porāṇo viññugarahito;
Yattha edisakaṃ passati, yājakaṃ garahatī [garahī (ka.)] jano.
316. “Evaṃ dhamme viyāpanne, vibhinnā suddavessikā;
Puthū vibhinnā khattiyā, patim bhariyāvamaññatha.
317. “Khattiyā brahmabandhū ca, ye caññe gottarakkhitā;
Jātivādaṃ niraṃkatvā [nirākatvā (?) yathā anirākatajjhānoti], kāmānaṃ vasamanvagu’’nti.

Evam vutte, te brāhmaṇamahāsālā bhagavantaṃ etadavocuṃ – “abhikkantaṃ, bho gotama...pe. ... upāsake no bhavaṃ gotamo dhāretu ajjatagge pāṇupete saraṇaṃ gate’’ti.

Brāhmaṇadhammikasuttaṃ sattamaṃ niṭṭhitaṃ.

8. Nāvāsuttaṃ

318. Yasmā hi dhammaṃ puriso vijaññā, indaṃva naṃ devatā pūjayeyya;
So pūjito tasmi pasannacitto, bahussuto pātukaroti dhammaṃ.
319. Tadaṭṭhikatvāna nisamma dhīro, dhammānudhammaṃ paṭipajjamāno;
Viññū vibhāvī nipuṇo ca hoti, yo tādisaṃ bhajati appamatto.
320. Khuddaṅca bālaṃ upasevamāno, anāgatattaṅca usūyakaṅca;
Idheva dhammaṃ avibhāvayitvā, avitiṇṇakaṅkho maraṇaṃ upeti.
321. Yathā naro āpagamotaritvā, mahodakaṃ salilaṃ sīghasotaṃ;
So vuyhamāno anusotagāmī, kiṃ so pare sakkhati tārayetuṃ.
322. Tattheva dhammaṃ avibhāvayitvā, bahussutānaṃ anisāmayatthaṃ;
Sayam ajānaṃ avitiṇṇakaṅkho, kiṃ so pare sakkhati nijjhapetuṃ.
323. Yathāpi nāvaṃ daḥhamāruhitvā, phiyena [piyena (sī. syā.)] rittena samaṅgibhūto;
So tāraye tattha bahūpi aññe, tatrūpayaññū kusalo muṭimā [maṭimā (syā. ka.)].
324. Evampi yo vedagu bhāvitatto, bahussuto hoti avedhadhammo;
So kho pare nijjhapaye pajānaṃ, sotāvadhānūpanisūpappanne.
325. Tasmā have sappurisaṃ bhajetha, medhāvinañceva bahussutaṅca;
Aññāya atthaṃ paṭipajjamāno, viññātadhammo sa sukhaṃ [so sukhaṃ (sī.)] labhethāti.

Nāvāsuttaṃ aṭṭhamaṃ niṭṭhitaṃ.

9. Kiṃsīlasuttaṃ

326. “Kiṃsīlo kiṃsamācāro, kāni kammāni brūhayaṃ;

Naro sammā nivīṭṭhassa, uttamatthañca pāpuṇe’’.

327. ‘‘Vuḍḍhāpacāyī anusūyako siyā, kālaññū [kālaññū (sī. syā.)] cassa garūnaṃ [garūnaṃ (sī.)] dassanāya;
Dhammiṃ kathaṃ erayitaṃ khaṇaṇñū, suṇeyya sakkacca subhāsītāni.
328. ‘‘Kālena gacche garūnaṃ sakāsaṃ, thambhaṃ niraṃkatvā [nirākatvā (?) ni + ā + kara + tvā] nivātavutti;
Atthaṃ dhammaṃ saṃyamamaṃ brahmacariyaṃ, anussare ceva samācare ca.
329. ‘‘Dhammārāmo dhammarato, dhamme ṭhito dhammavinicchayaññū;
Nevācare dhammasandosavādaṃ, tacchehi nīyetha subhāsītehi.
330. ‘‘Hassaṃ jappaṃ paridevaṃ padosaṃ, māyākataṃ kuhanaṃ giddhi mānaṃ;
Sārambhaṃ kakkasaṃ kasāvañca mucchaṃ [sārambha kakkassa kasāva mucchaṃ (syā. pī.)],
hitvā care vītamado ṭhitatto.
331. ‘‘Viññātasārāni subhāsītāni, sutañca viññātasamādhisāraṃ;
Na tassa paññā ca sutañca vaḍḍhati, yo sāhaso hoti naro pamatto.
332. ‘‘Dhamme ca ye ariyapavedite ratā,
Anuttarā te vacasā manasā kammunā ca;
Te santisoraccasamādhisaṅṭhitā,
Sutassa paññāya ca sāramajjhagū’’ti.

Kiṃsīlasuttaṃ navamaṃ niṭṭhitaṃ.

10. Uṭṭhānasuttaṃ

333. Uṭṭhahatha nisīdatha, ko attho supitena vo;
Āturānañhi kā niddā, sallaviddhāna ruppataṃ.
334. Uṭṭhahatha nisīdatha, daḷhaṃ sikkhatha santiyā;
Mā vo pamatte viññāya, maccurājā amohayittha vasānuge.
335. Yāya devā manussā ca, sitā tiṭṭhanti atthikā;
Tarathetaṃ visattikaṃ, khaṇo vo [khaṇo ve (pī. ka.)] mā upaccagā;
Khaṇātītā hi socanti, nirayamhi samappitā.
336. Pamādo rajo pamādo, pamādānupatito rajo;
Appamādena vijjāya, abbahe [abbūḷhe (syā. pī.), abbuhe (ka. aṭṭha.)] sallamattanoti.

Uṭṭhānasuttaṃ dasamaṃ niṭṭhitaṃ.

11. Rāhulasuttaṃ

337. ‘‘Kacci abhiṇhasaṃvāsā, nāvajānāsi paṇḍitaṃ;
Ukkādhāro [okkādhāro (syā. ka.)] manussānaṃ, kacci apacito tayā’’ [tava (sī. aṭṭha.)].
338. ‘‘Nāhaṃ abhiṇhasaṃvāsā, avajānāmi paṇḍitaṃ;
Ukkādhāro manussānaṃ, niccaṃ apacito mayā’’.

339. “Pañca kāmagaṇe hitvā, piyarūpe manorame;
Saddhāya gharā nikkhamma, dukkhassantakaro bhava.
340. “Mitte bhajassu kalyāṇe, pantañca sayanāsanam;
Vivittam appanigghosam, mattaññū hohi bhojane.
341. “Cīvare piṇḍapāte ca, paccaye sayanāsane;
Etesu taṇham mākāsi, mā lokam punarāgami.
342. “Saṃvuto pātimokkhasmiṃ, indriyesu ca pañcasu;
Sati kāyagatāyatthu, nibbidābahulo bhava.
343. “Nimittam parivajjehi, subham rāgūpasañhitam;
Asubhāya cittaṃ bhāvehi, ekaggam susamāhitam.
344. “Animittañca bhāvehi, mānānusayamujjaha;
Tato mānābhisamayā, upasanto carissatī’”ti.

Ittham sudaṃ bhagavā āyasmantaṃ rāhulaṃ imāhi gāthāhi abhiṇham ovadatīti.

Rāhulasuttaṃ ekādasamaṃ niṭṭhitam.

12. Nigrodhakappasuttaṃ

Evaṃ me sutam – ekaṃ samayaṃ bhagavā ālavīyaṃ viharati aggāḷave cetiye. Tena kho pana samayena āyasmato vaṅgīsassa upajjhāyo nigrodhakappo nāma thero aggāḷave cetiye acirapariniibbuto hoti. Atha kho āyasmato vaṅgīsassa rahogatassa paṭisallīnassa evaṃ cetaso parivittakko udapādi – “pariniibbuto nu kho me upajjhāyo udāhu no pariniibbuto”’ti? Atha kho āyasmā vaṅgīso sāyanhasamayaṃ paṭisallānā vuṭṭhito yena bhagavā tenupasaṅkami; upasaṅkamitvā bhagavantaṃ abhivādetvā ekamantaṃ nisīdi. Ekamantaṃ nisīno kho āyasmā vaṅgīso bhagavantaṃ etadavoca – “idha mayham, bhante, rahogatassa paṭisallīnassa evaṃ cetaso parivittakko udapādi – ‘pariniibbuto nu kho me upajjhāyo, udāhu no parinibbuto’”’ti. Atha kho āyasmā vaṅgīso uṭṭhāyāsanā ekamsaṃ cīvaraṃ katvā yena bhagavā tenañjalīṃ paṇāmetvā bhagavantaṃ gāthāya ajjhabhāsi –

345. “Pucchāma [pucchāmi (ka.)] satthāramanomaṇṇam, diṭṭheva dhamme yo vicikicchānaṃ chettā;
Aggāḷave kālamakāsi bhikkhu, ñāto yasassī abhinibbutatto.
346. “Nigrodhakappo iti tassa nāmaṃ, tayā kataṃ bhagavā brāhmaṇassa;
So taṃ namassaṃ acari mutyapekkho, āradhāvīriyo dalhadhammadassī.
347. “Taṃ sāvakaṃ sakya [sakka (sī. syā. pī.)] mayampi sabbe, aññātumicchāma samantacakkhu;
Samavaṭṭhitā no savanāya sotā, tuvaṃ no satthā tvamanuttarosi.
348. “Chindeva no vicikiccham brūhi metaṃ, pariniibbutam vedaya bhūripaṇṇa;
Majjheva [majjhe ca (syā. ka.)] no bhāsa samantacakkhu, sakkova devāna sahasanetto.
349. “Ye keci ganthā idha mohamaggā, aññānapakkhā vicikicchathānā;
Tathāgataṃ patvā na te bhavanti, cakkhuñhi etaṃ paramaṃ narānaṃ.
350. “No ce hi jātu puriso kilese, vāto yathā abhadhanaṃ vihāne;

Tamovassa nivuto sabbaloko, na jotimantopi narā tapeyyum.

351. “Dhīrā ca pajjotakarā bhavanti, taṃ taṃ ahaṃ vīra [dhīra (sī. syā.)] tatheva maññe;
Vipassinaṃ jānamupāgamumhā [jānamupagamamhā (sī. syā.)], parisāsu no āvikarohi kappam.
352. “Khippam giram eraya vaggu vaggum, hamsova paggayha saṅkama [saṅim (syā. pī.)] nikūja;
Bindussarena suvikappitena, sabbeva te ujjugatā suṇoma.
353. “Pahīnajātimaṇaṇam asesam, niggayha dhonaṃ [dhotam (sī.)] vadessāmi dhammam;
Na kāmakāro hi puthujjanānam, saṅkheyyakāro ca [saṅkhayyakārova (ka.)] tathāgatānam.
354. “Sampannaveyyākaraṇam tavedam, samujjupañña [samujjapañña (syā. ka.)]
samuggahītam;
Ayamañjalī pacchimo suppaṇāmito, mā mohayī jānamanomapañña.
355. “Parovaram [varāvaram (katthaci)] ariyadhammam viditvā, mā mohayī jānamanomavīra;
Vāriṃ yathā ghammani ghammatatto, vācābhikaṅkhāmi sutam pavassa [sutassa vassa (syā.)].
356. “Yadatthikam [yadatthiyam (pī.), yadatthitam (ka.)] brahmacariyam acarī, kappāyano
kaccissa tam amogham;
Nibbāyi so ādu saupādīseso, yathā vimutto ahu tam suṇoma”.
357. “Acchecchi [achejji (ka.)] taṇham idha nāmarūpe, (iti bhagavā)
Kaṇhassa [taṇhāya (ka.)] sotam dīgharattānusayitam;
Atāri jātim maraṇam asesam,”
Iccabravī bhagavā pañcasetṭho.
358. “Esa sutvā pasīdāmi, vaco te isisattama;
Amogham kira me puṭṭham, na maṃ vañcesi brāhmaṇo.
359. “Yathāvādī tathākārī, ahu buddhassa sāvako;
Acchidā maccuno jālam, tataṃ māyāvino daḷham.
360. “Addasā bhagavā ādim, upādānassa kappiyo;
Accagā vata kappāyano, maccudheyyam suduttara”nti.

Nigrodhakappasuttaṃ dvādasamaṃ niṭṭhitam.

13. Sammāparibbājanīyasuttaṃ

361. “Pucchāmi munim pahūtapaññaṃ,
Tiṇṇam pāraṅgataṃ parinibbutam ṭhitattam;
Nikkamma gharā panujja kāme, katham bhikkhu
Sammā so loke paribbajeyya”.
362. “Yassa maṅgalā samūhatā, (iti bhagavā)
Uppātā supinā ca lakkhaṇā ca;
So maṅgaladosavippahīno,
Sammā so loke paribbajeyya.
363. “Rāgam vinayetha mānusesu, dibbesu kāmesu cāpi bhikkhu;
Atikkamma bhavam samecca dhammam, sammā so loke paribbajeyya.

364. “Vipitthikatvāna pesuṇāni, kodhaṃ kadariyaṃ jaheyya bhikkhu;
Anurodhavirodhavippahāno, sammā so loke paribbajeyya.
365. “Hitvāna piyaṅca appiyaṅca, anupādāya anissito kuhiñci;
Saṃyojaniyehi vippamutto, sammā so loke paribbajeyya.
366. “Na so upadhīsu sārameti, ādānesu vineyya chandarāgaṃ;
So anissito anaññaneyyo, sammā so loke paribbajeyya.
367. “Vacasā manasā ca kammunā ca, aviruddho sammā viditvā dhammaṃ;
Nibbānapadābhipatthayāno, sammā so loke paribbajeyya.
368. “Yo vandati mantī nuṇṇameyya [nunnameyya (?)], akkuṭṭhopi na sandhiyetha bhikkhu;
Laddhā parabhojanaṃ na majje, sammā so loke paribbajeyya.
369. “Lobhaṅca bhavaṅca vippahāya, virato chedanabandhanā ca [chedanabandhanato (sī. syā.)]
bhikkhu;
So tiṇṇakathaṃkatho visallo, sammā so loke paribbajeyya.
370. “Sārappaṃ attano viditvā, no ca bhikkhu himseyya kañci loke;
Yathā tathiyaṃ viditvā dhammaṃ, sammā so loke paribbajeyya.
371. “Yassānusayā na santi keci, mūlā ca [mūlā (sī. syā.)] akusalā samūhatāse;
So nirāso [nirāsayo (sī.), nirāsaso (syā.)] anāsisāno [anāsayaṅno (sī. pī.), anāsasāno (syā.)],
sammā so loke paribbajeyya.
372. “Āsavakhīṇo pahīnamāno, sabbaṃ rāgapathaṃ upātivatto;
Danto parinibbuto t̥hitatto, sammā so loke paribbajeyya.
373. “Saddho sutavā niyāmadassī, vaggagatesu na vaggasāri dhīro;
Lobhaṃ dosaṃ vineyya paṭighaṃ, sammā so loke paribbajeyya.
374. “Saṃsuddhajīno vivaṭṭacchado, dhammesu vasī pāragū anejo;
Saṅkhāranirodhañāṇakusalo, sammā so loke paribbajeyya.
375. “Atītesu anāgatesu cāpi, kappātīto aticcasuddhipañño;
Sabbāyatanehi vippamutto, sammā so loke paribbajeyya.
376. “Aññāya padaṃ samecca dhammaṃ, vivaṭṭaṃ disvāna pahānamāsavānaṃ;
Sabbupadhīnaṃ parikkhayāno [parikkhayā (pī.)], sammā so loke paribbajeyya”.
377. “Addhā hi bhagavā tatheva etaṃ, yo so evaṃvihārī danto bhikkhu;
Sabbasaṃyojanayogavītivatto [sabbasaṃyojaniye ca vītivatto (sī. syā. pī.)], sammā so loke
paribbajeyyā”ti.

Sammāparibbājanīyasuttaṃ terasamaṃ niṭṭhitaṃ.

14. Dhammikasuttaṃ

Evam me sutam – ekaṃ samayaṃ bhagavā sāvattiyam viharati jetavane anāthapiṇḍikassa ārāme.
Atha kho dhammiko upāsako pañcahi upāsakasatehi saddhim yena bhagavā tenupasaṅkami;
upasaṅkamitvā bhagavantaṃ abhivādetvā ekamantaṃ nisīdi. Ekamantaṃ nisīno kho dhammiko

upāsako bhagavantam gāthāhi ajjhabhāsi –

- 378.** “Pucchāmi taṃ gotama bhūripaṇṇa, kathaṃkaro sāvako sādhu hoti;
Yo vā agārā anagārameti, agārino vā panupāsakāse.
- 379.** “Tuvañhi lokassa sadevakassa, gatiṃ pajānāsi parāyaṇaṇca;
Na catthi tulyo nipuṇatthadassī, tuvañhi buddham pavaram vadanti.
- 380.** “Sabbam tuvaṃ ñāṇamavecca dhammam, pakāsesi satte anukampamāno;
Vivaṭṭacchadosi samantacakkhu, virocasi vimalo sabbaloke.
- 381.** “Āgañchi te santike nāgarājā, erāvaṇo nāma jinoti sutvā;
Sopi tayā mantayitvājthagamā, sādhiṭi sutvāna patītarūpo.
- 382.** “Rājāpi taṃ vessavaṇo kuvero, upeti dhammam paripucchamāno;
Tassāpi tvam pucchito brūsi dhīra, so cāpi sutvāna patītarūpo.
- 383.** “Ye kecime titthiyā vādasīlā, ājīvaka vā yadi vā nigaṇṭhā;
Paññāya taṃ nātitaranti sabbe, ṭhito vajantaṃ viya sīghagamim.
- 384.** “Ye kecime brāhmaṇā vādasīlā, vuddhā cāpi brāhmaṇā santi keci;
Sabbe tayi atthabaddhā bhavanti, ye cāpi aññe vādino maññamānā.
- 385.** “Ayañhi dhammo nipuṇo sukho ca, yoyam tayā bhagavā suppvutto;
Tameva sabbepi [sabbe mayam (syā.)] sussūsamānā, taṃ no vada pucchito buddhaseṭṭha.
- 386.** “Sabbepi me bhikkhavo sannisinnā, upāsakā cāpi tatheva sotum;
Suṇantu dhammam vimalenānubuddham, subhāsitaṃ vāsavasseva devā”.
- 387.** “Suṇātha me bhikkhavo sāvayāmi vo, dhammam dhutaṃ taṇca carātha sabbe;
Iriyāpatham pabbajitānulomikaṃ, sevetha naṃ atthadaso mutimā.
- 388.** “No ve vikāle vicareyya bhikkhu, gāme ca piṇḍāya careyya kāle;
Akālacāriṇhi sajanti saṅgā, tasmā vikāle na caranti buddhā.
- 389.** “Rūpā ca saddā ca rasā ca gandhā, phassā ca ye sammadayanti satte;
Etesu dhammesu vineyya chandaṃ, kālena so pavise pātarāsam.
- 390.** “Piṇḍaṇca bhikkhu samayena laddhā, eko paṭikkamma raho nisīde;
Ajjhattacintī na mano bahiddhā, nicchāraye saṅgahitattabhāvo.
- 391.** “Sacepi so sallape sāvakena, aññena vā kenaci bhikkhunā vā;
Dhammam paṇītaṃ tamudāhareyya, na pesuṇam nopi parūpavādam.
- 392.** “Vādañhi eke paṭiseniyanti, na te pasamsāma parittapaññe;
Tato tato ne pasajanti saṅgā, cittañhi te tattha gamenti dūre.
- 393.** “Piṇḍam vihāram sayanāsanaṇca, āpaṇca saṅghāṭirajūpavāhanam;
Sutvāna dhammam sugatena desitaṃ, saṅkhāya seve varapaññasāvako.
- 394.** “Tasmā hi piṇḍe sayanāsane ca, āpe ca saṅghāṭirajūpavāhane;
Etesu dhammesu anūpalitto, bhikkhu yathā pokkhare vāribindu.

395. “Gahaṭṭhavattaṃ pana vo vadāmi, yathākaro sāvako sādhu hoti;
Na hesa [na heso (sī.)] labbhā sapariggahena, phassetuṃ yo kevalo bhikkhudhammo.
396. “Pāṇaṃ na hane [na hāne (sī.)] na ca ghātayeyya, na cānujaññā hanataṃ paresaṃ;
Sabbesu bhūtesu nidhāya daṇḍaṃ, ye thāvarā ye ca tasā santi [tasanti (sī. pī.)] loke.
397. “Tato adinnaṃ parivajjayeyya, kiñci kvaci sāvako bujhamāno;
Na hāraye harataṃ nānujaññā, sabbaṃ adinnaṃ parivajjayeyya.
398. “Abrahmacariyaṃ parivajjayeyya, aṅgārakāsuṃ jalitaṃva viññū;
Asambhuṇanto pana brahmacariyaṃ, parassa dāraṃ na atikkameyya.
399. “Sabhaggato vā parisaggato vā, ekassa veko [ceto (sī. syā.)] na musā bhaṇeyya;
Na bhāṇaye bhaṇataṃ nānujaññā, sabbaṃ abhūtaṃ parivajjayeyya.
400. “Majjañca pānaṃ na samācareyya, dhammaṃ imaṃ rocaye yo gahaṭṭho;
Na pāyaye pivataṃ nānujaññā, ummādanantaṃ iti naṃ viditvā.
401. “Madā hi pāpāni karonti bālā, kārenti caññēpi jane pamatte;
Etaṃ apuññāyatanāṃ vivajjaye, ummādanaṃ mohanaṃ bālakantaṃ.
402. “Pāṇaṃ na hane na cādinnamādiye, musā na bhāse na ca majjapo siyā;
Abrahmacariyā virameyya methunā, rattiṃ na bhuñjeyya vikālabhojanaṃ.
403. “Mālaṃ na dhāre na ca gandhamācare, mañce chamāyaṃ va sayetha santhate;
Etañhi aṭṭhaṅgikamāhuposathaṃ, buddhena dukkhangatunā pakāsitaṃ.
404. “Tato ca pakkhassupavassuposathaṃ, cātuddasiṃ pañcadasiñca aṭṭhamiṃ;
Pāṭihāriyapakkhañca pasannaṃ mānaso, aṭṭhaṅgupetaṃ susamattarūpaṃ.
405. “Tato ca pāto upavutthuposatho, annena pānena ca bhikkhusaṅghaṃ;
Pasannacitto anumodamāno, yathārahaṃ saṃvibhajetha viññū.
406. “Dhammena mātāpitaro bhareyya, payojaye dhammikaṃ so vaṇijjaṃ;
Etaṃ gihī vattayamappamatto, sayampabhe nāma upeti deve’’ti.

Dhammikasuttaṃ cuddasamaṃ niṭṭhitaṃ.

Cūlavaggo dutiyo niṭṭhito.

Tassuddānaṃ –

Ratanāmagandho hiri ca, maṅgalaṃ sūcilomena;
Dhammacariyañca brāhmaṇo [kapilo brāhmaṇopi ca (syā. ka.)], nāvā kiṃsīlamuṭṭhānaṃ.

Rāhulo puna kappo ca, paribbājaniyaṃ tathā;
Dhammikañca viduno āhu, cūlavagganti cuddasāti.

3. Mahāvaggo

1. Pabbajjāsuttaṃ

407. Pabbajjaṃ kittayissāmi, yathā pabbaji cakkhumā;
Yathā vīmaṃsamāno so, pabbajjaṃ samarocayi.
408. Sambādhoyaṃ gharāvāso, rajassāyatanam itī;
Abbhokāsova pabbajjā, itī disvāna pabbaji.
409. Pabbajitvāna kāyena, pāpakammaṃ vivajjayi;
Vacīduccaritaṃ hitvā, ājīvaṃ parisodhayi.
410. Agamā rājagahaṃ buddho, magadhānaṃ giribbajam;
Piṇḍāya abhihāresi, ākiṇṇavaralakkhaṇo.
411. Tamaddasā bimbisāro, pāsādasmiṃ patiṭṭhito;
Disvā lakkhaṇasampannaṃ, imamatthaṃ abhāsatha.
412. “Imaṃ bhonto nisāmetha, abhirūpo brahā suci;
Caraṇena ca sampanno, yugamattañca pekkhati.
413. “Okkhittacakkhu satimā, nāyaṃ nīcakulāmiva;
Rājadūtābhīdhāvantu, kuhiṃ bhikkhu gamissati”.
414. Te pesitā rājadūtā, piṭṭhito anubandhisuṃ;
Kuhiṃ gamissati bhikkhu, kattha vāso bhavissati.
415. Sapaḍānaṃ caramāno, guttadvāro susaṃvuto;
Khippaṃ pattaṃ apūresi, sampajāno paṭissato.
416. Piṇḍacāraṃ caritvāna, nikkhamma nagarā muni;
Paṇḍavaṃ abhihāresi, ettha vāso bhavissati.
417. Disvāna vāsūpagataṃ, tayo [tato (sī. pī.)] dūtā upāvisuṃ;
Tesu ekova [eko ca dūto (sī. syā. pī.)] āgantvā, rājino paṭivedayi.
418. “Esa bhikkhu mahārāja, paṇḍavassa puratthato [purakkhato (syā. ka.)];
Nisanno byagghusabhova, sīhova girigabbhāre”.
419. Sutvāna dūtavacanaṃ, bhaddayānena khattiyo;
Taramānarūpo niyyāsi, yena paṇḍavapabbato.
420. Sa yānabhūmiṃ yāyitvā, yānā oruyha khattiyo;
Pattiko upasaṅkamma, āsajja naṃ upāvisi.
421. Nisajja rājā sammodi, kathaṃ sāraṇīyaṃ tato;
Kathaṃ so vītisāretvā, imamatthaṃ abhāsatha.
422. “Yuvā ca daharo cāsi, paṭhamuppattiko [paṭhamuppattiyā (sī.), paṭhamuppattito (syā.)] susu;
Vaṇṇārohena sampanno, jātimā viya khattiyo.
423. “Sobhayanto anīkaggaṃ, nāgasaṅghapurakkhato;
Dadāmi bhoge bhuñjassu, jātiṃ akkhāhi pucchito”.
424. “Ujjuṃ janapado rāja, himavantassa passato;

Dhanavīriyena sampanno, kosalesu [kosalassa (syā. ka.)] nīketino.

425. “Ādiccā [ādicco (ka.)] nāma gottena, sākiyā [sākiyo (ka.)] nāma jātiyā;
Tamhā kulā pabbajitomi, na kāme abhipatthayaṃ.
426. “Kāmesvādīnaṃ disvā, nekkhammaṃ daṭṭhu khemato;
Padhānāya gamissāmi, ettha me rañjati mano’’ti.

Pabbajjāsuttaṃ paṭhamaṃ niṭṭhitaṃ.

2. Padhānasuttaṃ

427. “Taṃ maṃ padhānapahitattaṃ, nadiṃ nerañjaraṃ pati;
Viparakkamma jhāyantaṃ, yogakkhemassa pattiyā.
428. “Namucī karuṇaṃ vācaṃ, bhāsamāno upāgami;
‘Kiso tvamasi dubbaṇṇo, santike maraṇaṃ tava.
429. “‘Sahassabhāgo maraṇassa, ekaṃso tava jīvitāṃ;
Jīva bho jīvitāṃ seyyo, jīvaṃ puññaṃ kāhasi.
430. “‘Carato ca te brahmacariyaṃ, aggihuttaṅca jūhato;
Pahūtaṃ cīyate puññaṃ, kiṃ padhānena kāhasi.
431. “‘Duggo maggo padhānāya, dukkaro durabhisambhavo’’;
Imā gāthā bhaṇaṃ māro, aṭṭhā buddhassa santike.
432. Taṃ tathāvādinaṃ māraṃ, bhagavā etadabravi;
‘Pamattabandhu pāpima, yenatthena [senatthena (?), attano atthena (aṭṭha. saṃvaṇṇanā)]
idhāgato.
433. “Aṇumattopi [aṇumattenapi (sī. syā.)] puññaṃ, attho mayhaṃ na vijjati;
Yesaṅca attho puññaṃ, te māro vattumarahati.
434. “Atthi saddhā tathā [tato (sī. pī.), tapo (syā. ka.)] vīriyaṃ, paññaṃ ca mama vijjati;
Evaṃ maṃ pahitattampi, kiṃ jīvamanupucchasi.
435. “Nadīnamapi sotāni, ayaṃ vāto visosaye;
Kiṅca me pahitattassa, lohitaṃ nupasussaye.
436. “Lohite sūsamānamhi, pittaṃ semhaṅca sūssati;
Maṃsesu khīyamānesu, bhīyyo cittaṃ pasīdati;
Bhīyyo sati ca paññaṃ ca, samādhī mama tiṭṭhati.
437. “Tassa mevaṃ viharato, pattassuttamavedanaṃ;
Kāmesu [kāme (sī. syā.)] nāpekkhate cittaṃ, passa sattassa suddhataṃ.
438. “Kāmā te paṭhamā senā, dutiyā arati vuccati;
Tatīyā khuppiṇā te, catutthī taṇhā pavuccati.
439. “Pañcamaṃ [pañcamī (sī. pī.)] thinamiddhaṃ te, chaṭṭhā bhīrū pavuccati;
Sattamī vicikicchā te, makkho thambho te aṭṭhamo.

440. “Lābho siloko sakkāro, micchāladdho ca yo yaso;
Yo cattānaṃ samukkaṃse, pare ca avajānati.
441. “Esā namuci te senā, kaṇhassābhīppahārīnī;
Na naṃ asūro jināti, jetvā ca labhate sukhaṃ.
442. “Esa muñjaṃ parihare, dhiratthu mama [ida (ka.)] jīvitam;
Sāngāme me mataṃ seyyo, yaṃ ce jīve parājito.
443. “Pagāḷhettha na dissanti, eke samaṇabrāhmaṇā;
Tañca maggaṃ na jānanti, yena gacchanti subbatā.
444. “Samantā dhajiniṃ disvā, yuttaṃ māraṃ savāhanaṃ;
Yuddhāya paccuggacchāmi, mā maṃ ṭhānā acāvayi.
445. “Yaṃ te taṃ nappasahati, senaṃ loko sadevako;
Taṃ te paññāya bhecchāmi [gacchāmi (sī.), vecchāmi (syā.), vajjhāmi (ka.)], āmaṃ pattamva
asmanā [pakkaṃva amunā (ka.)].
446. “Vasīkaritvā [vasiṃ karitvā (bahūsu)] saṅkappaṃ, satīṇca sūpatiṭṭhitam;
Raṭṭhā raṭṭhaṃ vicarissaṃ, sāvake vinayaṃ puthū.
447. “Te appamattā pahitattā, mama sāsanaṅkārakā;
Akāmassa [akāmā (ka.)] te gamissanti, yattha gantvā na socare”.
448. “Satta vassāni bhagavantaṃ, anubandhiṃ padāpadaṃ;
Otāraṃ nādhigacchissaṃ, sambuddhassa satīmato.
449. “Medavaṇṇaṃva pāsāṇaṃ, vāyaso anupariyaḡā;
Apettha muduṃ [mudu (sī.)] vindema, api assādanā siyā.
450. “Aladdhā tattha assādaṃ, vāyasetto apakkami;
Kākova selamāsajja, nibbijjāpema gotamaṃ”.
451. Tassa sokaparetassa, vīṇā kacchā abhassatha;
Tato so dummano yakkho, tatthevantaradhāyathāti.

Padhānasuttaṃ dutiyaṃ niṭṭhitaṃ.

3. Subhāsitasuttaṃ

Evaṃ me suttaṃ – eka samayaṃ bhagavā sāvattiyaṃ viharati jetavane anāthapiṇḍikassa ārāme.
Tatra kho bhagavā bhikkhū āmantesi – “bhikkhavo”ti. “Bhadante”ti te bhikkhū bhagavato
paccassosum. Bhagavā etadavoca –

“Catūhi, bhikkhave, aṅgehi samannāgatā vācā subhāsītā hoti, na dubbhāsītā, anavajjā ca
ananuvajjā ca viññūnaṃ. Katamehi catūhi? Idha, bhikkhave, bhikkhu subhāsitaṃyeva bhāsati no
dubbhāsitaṃ, dhammaṃyeva bhāsati no adhammaṃ, piyaṃyeva bhāsati no appiyaṃ, saccamaṃyeva
bhāsati no alikaṃ. Imehi kho, bhikkhave, catūhi aṅgehi samannāgatā vācā subhāsītā hoti, no dubbhāsītā,
anavajjā ca ananuvajjā ca viññūna”nti. Idamavoca bhagavā. Idam vatvāna sugato athāparaṃ etadavoca
satthā –

452. “Subhāsitaṃ uttamamāhu santo, dhammaṃ bhaṇe nādhammaṃ taṃ dutiyaṃ;
Piyaṃ bhaṇe nāppiyaṃ taṃ tatiyaṃ, saccaṃ bhaṇe nālikaṃ taṃ catuttha’nti.

Atha kho āyasmā vaṅgīso uṭṭhāyāsanaṃ ekaṃsaṃ cīvaraṃ katvā yena bhagavā tenañjaliṃ paṇāmetvā bhagavantaṃ etadavoca – “paṭibhāti maṃ bhagavā, paṭibhāti maṃ sugatā’nti. “Paṭibhātu taṃ vaṅgīsā’nti bhagavā avoca. Atha kho āyasmā vaṅgīso bhagavantaṃ sammukhā sārūppāhi gāthāhi abhitthavi –

453. “Tameva vācaṃ bhāseyya, yāyattānaṃ na tāpaye;
Pare ca na vihiṃseyya, sā ve vācā subhāsītā.
454. “Piyavācameva bhāseyya, yā vācā paṭinanditā;
Yaṃ anādāya pāpāni, paresaṃ bhāsate piyaṃ.
455. “Saccaṃ ve amatā vācā, esa dhammo sanantano;
Sacce atthe ca dhamme ca, āhu santo paṭiṭṭhitā.
456. “Yaṃ buddho bhāsati vācaṃ, khemaṃ nibbānapattiyā;
Dukkassantakiriyyāya, sā ve vācānamuttamā’nti.

Subhāsitasuttaṃ tatiyaṃ niṭṭhitam.

4. Sundarikabhāradvājasuttaṃ

Evam me suttaṃ – ekaṃ samayaṃ bhagavā kosalesu viharati sundarikāya nadiyā tīre. Tena kho pana samayena sundarikabhāradvājo brāhmaṇo sundarikāya nadiyā tīre aggim juhati, aggihuttaṃ paricarati. Atha kho sundarikabhāradvājo brāhmaṇo aggim juhivā aggihuttaṃ paricaritvā uṭṭhāyāsanaṃ samantā catuddisā anuvilokesi – “ko nu kho imaṃ habyasesaṃ bhuñjeyyā’nti? Addasā kho sundarikabhāradvājo brāhmaṇo bhagavantaṃ avidūre aññatarasmiṃ rukkhamaṇe sasīsaṃ pāruṭaṃ nisinnaṃ; disvāna vāmena hatthena habyasesaṃ gahetvā dakkhiṇena hatthena kamaṇḍaluṃ gahetvā yena bhagavā tenupasaṅkami.

Atha kho bhagavā sundarikabhāradvājassa brāhmaṇassa padasaddena sīsaṃ vivari. Atha kho sundarikabhāradvājo brāhmaṇo – “muṇḍo ayaṃ bhavaṃ, muṇḍako ayaṃ bhava’nti tatova puna nivattitukāmo ahoṣi. Atha kho sundarikabhāradvājassa brāhmaṇassa etadahosi – “muṇḍāpi hi idhekacce brāhmaṇā bhavanti, yaṃnūnāhaṃ upasaṅkamtivā jātiṃ puccheyya’nti. Atha kho sundarikabhāradvājo brāhmaṇo yena bhagavā tenupasaṅkami; upasaṅkamtivā bhagavantaṃ etadavoca – “kimjacco bhava’nti?

Atha kho bhagavā sundarikabhāradvājaṃ brāhmaṇaṃ gāthāhi ajjhabhāsi –

457. “Na brāhmaṇo nomhi na rājaputto, na vessāyano uda koci nomhi;
Gottaṃ pariññāya puthujjanānaṃ, akiñcano manta carāmi loke.
458. “Saṅghāṭivāsī agaho carāmi [agiho (ka. sī. pī.) ageho (katthaci)], nivuttakeso abhinibbutatto;
Alippamāno idha māṇavehi, akallaṃ maṃ brāhmaṇa puchasi gottapañham’nti.
459. “Pucchanti ve bho brāhmaṇā, brāhmaṇebhi saha brāhmaṇo no bhava’nti.
460. “Brāhmaṇo hi ce tvaṃ brūsi, mañca brūsi abrahmaṇaṃ;
Taṃ taṃ sāvittiṃ pucchāmi, tipadaṃ catuvīsatakkharaṃ.

461. “Kim nissitā isayo manujā, khattiyā brāhmaṇā [paṭhamapādanto] devatānaṃ;
Yaññamakappayimsu puthū idha loke [dutyapādanto (sī.)].
462. “Yadantagū vedagū yaññakāle, yassāhutim labhe tassijjheti brūmi”.
463. “Addhā hi tassa hutamijjhe, (itī brāhmaṇo)
Yaṃ tādisaṃ vedagumaddasāma;
Tumhādisānañhi adassanena, añño jano bhuñjati pūraḷasaṃ”.
464. “Tasmātiha tvaṃ brāhmaṇa atthena, atthiko upasaṅkamma puccha;
Santaṃ vidhūmaṃ anīghaṃ nirāsaṃ, appevidha abhivinde sumedhaṃ”.
465. “Yaññe ratohaṃ bho gotama, yaññaṃ yiṭṭhukāmo nāhaṃ pajānāmi;
Anusāsatu maṃ bhavaṃ, yattha hutam ijjhate brūhi me taṃ”.
- “Tena hi tvaṃ, brāhmaṇa, odahassu sotaṃ; dhammaṃ te desessāmi –
466. “Mā jātim pucchī caraṇaṇca puccha, kaṭṭhā have jāyati jātavedo;
Nīcākulīnopi munī dhitīmā, ājāniyo hoti hirīnisedho.
467. “Saccena danto damasā upeto, vedantagū vūsitabrahmacariyo;
Kālena tamhi habyaṃ pavecche, yo brāhmaṇo puññapekko [puññapekho (sī. pī.)] yajetha.
468. “Ye kāme hitvā agahā caranti, susaṇṇatattā tasaraṃva ujjum;
Kālena tesu habyaṃ pavecche, yo brāhmaṇo puññapekko yajetha.
469. “Ye vītarāgā susamāhitindriyā, candova rāhuggahaṇā pamuttā;
Kālena tesu habyaṃ pavecche, yo brāhmaṇo puññapekko yajetha.
470. “Asajjamānā vicaranti loke, sadā satā hitvā mamāyitāni;
Kālena tesu habyaṃ pavecche, yo brāhmaṇo puññapekko yajetha.
471. “Yo kāme hitvā abhibhuyyacārī, yo vedi jāṭimaraṇassa antaṃ;
Parinibbuto udakarahadova sīto, tathāgato arahatī pūraḷasaṃ.
472. “Samo samehi visamehi dūre, tathāgato hoti anantapañño;
Anūpalitto idha vā huram vā, tathāgato arahatī pūraḷasaṃ.
473. “Yamhi na māyā vasatī na māno, yo vītalobho amamo nirāso;
Panuṇṇakodho abhinibbutatto, yo brāhmaṇo sokamalaṃ ahāsi;
Tathāgato arahatī pūraḷasaṃ.
- 474 .
- “Nivesanaṃ yo manaso ahāsi, pariggahā yassa na santi keci;
Anupādiyāno idha vā huram vā, tathāgato arahatī pūraḷasaṃ.
475. “Samāhito yo udatāri oghaṃ, dhammaṃ caññāsi paramāya diṭṭhiyā;
Khīṇāsavo antimadehadhārī, tathāgato arahatī pūraḷasaṃ.
476. “Bhavāsavā yassa vacī kharā ca, vidhūpitā atthagatā na santi;
Sa vedagū sabbadhi vippamutto, tathāgato arahatī pūraḷasaṃ.

477. “Saṅgātigo yassa na santi saṅgā, yo mānasattesu amānasatto;
Dukkhaṃ pariññāya sakhettavatthum, tathāgato arahati pūraḷāsaṃ.
478. “Āsaṃ anissāya vivekadassī, paravediyaṃ diṭṭhimupātivatto;
Ārammaṇā yassa na santi keci, tathāgato arahati pūraḷāsaṃ.
479. “Paroparā [parovarā (sī. pī.)] yassa samecca dhammā, vidhūpitā atthagatā na santi;
Santo upādānakhaye vimutto, tathāgato arahati pūraḷāsaṃ.
480. “Saṃyojanaṃ jātikhayantadassī, yopānudi rāgapathaṃ asesam;
Suddho nidoso vimalo akāco [akāmo (sī. syā.)], tathāgato arahati pūraḷāsaṃ.
481. “Yo attano attānaṃ [attanāttānaṃ (sī. syā.)] nānupassati, samāhito ujjugato ṭhitatto;
Sa ve anejo akhilo akaṅkho, tathāgato arahati pūraḷāsaṃ.
482. “Mohantarā yassa na santi keci, sabbesu dhammesu ca ñāṇadassī;
Sarīraṅca antimam dhāreti, patto ca sambodhimanuttaram sivaṃ;
Ettāvataṃ yakkhassa suddhi, tathāgato arahati pūraḷāsaṃ”.
483. “Hutaṅca [huttaṅca (sī. ka.)] mayhaṃ hutamatthu saccaṃ, yaṃ tādisaṃ vedagunaṃ alatthaṃ;
Brahmā hi sakkhi paṭigaṅhātu me bhagavā, bhuñjatu me bhagavā pūraḷāsaṃ”.
484. “Gāthābhigītaṃ me abhojaneyyaṃ, sampassataṃ brāhmaṇa nesa dhammo;
Gāthābhigītaṃ panudanti buddhā, dhamme satī brāhmaṇa vuttiresā.
485. “Aññena ca kevalinaṃ mahesiṃ, khīṇāsavaṃ kukkuccavūpasantaṃ;
Annena pānena upaṭṭhahassu, khettañhi taṃ puññapekkhassa hoti”.
486. “Sādhāhaṃ bhagavā tathā vijaññaṃ, yo dakkhiṇaṃ bhuñjeyya mādisassa;
Yaṃ yaññaḱāle pariyesamāno, pappuyya tava sāsanaṃ”.
487. “Sārambhā yassa vigatā, cittaṃ yassa anāvilaṃ;
Vippamutto ca kāmehi, thinaṃ yassa panūditam.
488. “Sīmantaṇaṃ vinetāraṃ, jātimaraṇakovidam;
Muniṃ moneyyasampannaṃ, tādisaṃ yaññaṃāgataṃ.
489. “Bhakuṭiṃ [bhūkuṭiṃ (ka. sī.), bhākuṭiṃ (ka. sī., ma. ni. 1.226)] vinayitvāna, pañjalikā
namassatha;
Pūjetha annapānena, evaṃ ijjhanti dakkhiṇā.
490. “Buddho bhavaṃ arahati pūraḷāsaṃ, puññaḱhettamanuttaram;
Āyāgo sabbalokassa, bhoto dinnaṃ mahapphala”nti.

Atha kho sundarikabhāradvājo brāhmaṇo bhagavantaṃ etadavoca – “abhikkantaṃ, bho gotama, abhikkantaṃ, bho gotama! Seyyathāpi, bho gotama, nikkujjitaṃ vā ukkujjeyya, paṭicchannaṃ vā vivareyya, mūḷhassa vā maggaṃ ācikkheyya, andhakāre vā telapajjotaṃ dhāreyya – cakkhumanto rūpāni dakkhantīti; evamevaṃ bhotā gotamena anekapariyāyena dhammo pakāsito. Esāhaṃ bhavantaṃ gotamaṃ saraṇaṃ gacchāmi dhammaṅca bhikkhusaṅghaṅca. Labheyyāhaṃ bhoto gotamassa santike pabbajjaṃ, labheyyaṃ upasampada”nti. Alatta kho sundarikabhāradvājo brāhmaṇo...pe... arahataṃ ahoṣīti.

Sundarikabhāradvājasuttam catuttham niṭṭhitam.

5. Māghasuttam

Evam me sutam – eka samayam bhagavā rājagahe viharati gijjhakūṭe pabbate. Atha kho māgho māṇavo yena bhagavā tenupasaṅkami; upasaṅkamitvā bhagavatā saddhiṃ sammodi. Sammodaniyam katham sāraṇiyam vītisāretvā ekamantaṃ nisīdi. Ekamantaṃ nisinno kho māgho māṇavo bhagavantaṃ etadavoca –

“Ahañhi, bho gotama, dāyako dānapati vadaññū yācayogo; dhammena bhoge pariyesāmi; dhammena bhoge pariyesitvā dhammaladdhehi bhogehi dhammādhigatehi ekassapi dadāmi dvinnampi tiṇṇampi catunnampi pañcannampi channampi sattannampi aṭṭhannampi navannampi dasannampi dadāmi, vīsāyapi tiṃsāyapi cattālīsāyapi paññāsāyapi dadāmi, satassapi dadāmi, bhīyyopi dadāmi. Kaccāham, bho gotama, evaṃ dadanto evaṃ yajanto bahum puññaṃ pasavāmī”ti?

“Taggha tvam, māṇava, evaṃ dadanto evaṃ yajanto bahum puññaṃ pasavasi. Yo kho, māṇava, dāyako dānapati vadaññū yācayogo; dhammena bhoge pariyesati; dhammena bhoge pariyesitvā dhammaladdhehi bhogehi dhammādhigatehi ekassapi dadāti...pe... satassapi dadāti, bhīyyopi dadāti, bahum so puññaṃ pasavati”ti. Atha kho māgho māṇavo bhagavantaṃ gāthāya ajjhabhāsi –

491. “Pucchāmaṃ gotamaṃ vadaññum, (iti māgho māṇavo)
Kāsāyavāsīm agahaṃ [agīhaṃ (sī.), agehaṃ (pī.)] carantaṃ;
Yo yācayogo dānapati [dānapatī (sī. syā. pī.)] gahaṭṭho, puññaṭṭhiko [puññapekko (sī. pī. ka.)]
yajati puññapekko;
Dadaṃ paresaṃ idha annapānaṃ, kathaṃ hutam yajamānassa sujje”.
492. “Yo yācayogo dānapati gahaṭṭho, (māghāti bhagavā)
Puññaṭṭhiko yajati puññapekko;
Dadaṃ paresaṃ idha annapānaṃ, ārādhaye dakkhiṇeyyebhi tādi”.
493. “Yo yācayogo dānapati gahaṭṭho, (iti māgho māṇavo)
Puññaṭṭhiko yajati puññapekko;
Dadaṃ paresaṃ idha annapānaṃ, akkhāhi me bhagavā dakkhiṇeyye”.
494. “Ye ve asattā [alaggā (syā.)] vicaranti loke, akiñcanā kevalino yatattā;
Kālena tesu habyaṃ pavecche, yo brāhmaṇo puññapekko yajetha.
495. “Ye sabbasaṃyojanabandhanacchidā, dantā vimuttā anīghā nirāsā;
Kālena tesu habyaṃ pavecche, yo brāhmaṇo puññapekko yajetha.
496. “Ye sabbasaṃyojanavippamuttā, dantā vimuttā anīghā nirāsā;
Kālena tesu habyaṃ pavecche, yo brāhmaṇo puññapekko yajetha.
497. “Rāgañca dosañca pahāya moḥam, khīṇāsavā vūsitabrahmacariyā;
Kālena tesu habyaṃ pavecche, yo brāhmaṇo puññapekko yajetha.
498. “Yesu na māyā vasati na māno, khīṇāsavā vūsitabrahmacariyā;
Kālena tesu habyaṃ pavecche, yo brāhmaṇo puññapekko yajetha.
499. “Ye vītalobhā amamā nirāsā, khīṇāsavā vūsitabrahmacariyā;
Kālena tesu habyaṃ pavecche, yo brāhmaṇo puññapekko yajetha.

500. “Ye ve na taṅhāsu upātipannā, vitareyya oghaṃ amamā caranti;
Kālena tesu habyaṃ pavecche, yo brāhmaṇo puññapekko yajetha.
501. “Yesaṃ taṅhā natthi kuhiñci loke, bhavābhavāya idha vā hurāṃ vā;
Kālena tesu habyaṃ pavecche, yo brāhmaṇo puññapekko yajetha.
502. “Ye kāme hitvā agahā caranti, susaṅghatattā tasaraṃva ujjuṃ;
Kālena tesu habyaṃ pavecche, yo brāhmaṇo puññapekko yajetha.
503. “Ye vītarāgā susamāhitindriyā, candova rāhuggahaṇā pamuttā;
Kālena tesu habyaṃ pavecche, yo brāhmaṇo puññapekko yajetha.
504. “Samitāvino vītarāgā akopā, yesaṃ gatī natthidha vipphāya;
Kālena tesu habyaṃ pavecche, yo brāhmaṇo puññapekko yajetha.
505. “Jahitvā jātimaraṇaṃ asesāṃ, kathaṃkathim sabbamupātivattā;
Kālena tesu habyaṃ pavecche, yo brāhmaṇo puññapekko yajetha.
506. “Ye attadīpā vicaranti loke, akiñcanā sabbadhi vipphamuttā;
Kālena tesu habyaṃ pavecche, yo brāhmaṇo puññapekko yajetha.
507. “Ye hettha jānanti yathā tathā idaṃ, ayamantimā natthi punabbhavoti;
Kālena tesu habyaṃ pavecche, yo brāhmaṇo puññapekko yajetha.
508. “Yo vedagū jhānarato satīmā, sambodhipatto saraṇaṃ bahūnaṃ;
Kālena tamhi habyaṃ pavecche, yo brāhmaṇo puññapekko yajetha”.
509. “Addhā amoghā mama pucchā ahu, akkhāsi me bhagavā dakkhiṇeyye;
Tvañhettha jānāsi yathā tathā idaṃ, tathā hi te vidito esa dhammo.
510. “Yo yācayogo dānapati gahaṅṅho, (iti māgho māṇavo)
Puññatthiko yajati puññapekko;
Dadaṃ paresāṃ idha annapānaṃ,
Akkhāhi me bhagavā yaññasampadaṃ”.
511. “Yajassu yajamāno māghāti bhagavā, sabbattha ca vipphasādehi cittaṃ;
Āramaṇaṃ yajamānassa yañño, etthappatiṅghāya jahāti dosaṃ.
512. “So vītarāgo pavineyya dosaṃ, mettaṃ cittaṃ bhāvayamappamāṇaṃ;
Rattindivaṃ satatamappamatto, sabbā disā pharati appamaññaṃ”.
513. “Ko sujjhāti muccati bajjhatī ca, kenattanā gacchāti [kenatthenā gacchāti (ka.)] brahmalokaṃ;
Ajānato me muni brūhi puṅṅho, bhagavā hi me sakkhi brahmajjādīṅṅho;
Tuvañhi no brahmasamosi saccaṃ, kathaṃ upapajjāti brahmalokaṃ jutima”.
514. “Yo yajati tividhaṃ yaññasampadaṃ, (māghāti bhagavā)
Ārādhaye dakkhiṇeyyebhi tādi;
Evaṃ yajitvā sammā yācayogo,
Upapajjāti brahmalokanti brūmī”ti.

Evaṃ vutte, māgho māṇavo bhagavantaṃ etadavoca – “abhikkantaṃ, bho gotama...pe... ajjatagge pāṇupetaṃ saraṇaṃ gata”nti.

Māghasuttam pañcamam niṭṭhitam.

6. Sabhiyasuttam

Evam me sutam – ekam samayam bhagavā rājagahe viharati veḷuvane kalandakanivāpe. Tena kho pana samayena sabhiyassa paribbājakassa purāṇasālohitāya devatāya pañhā uddiṭṭhā honti – “yo te, sabhiya, samaṇo vā brāhmaṇo vā ime pañhe puṭṭho byākaroti tassa santike brahmacariyam careyyāsī”ti.

Atha kho sabhiyo paribbājako tassā devatāya santike te pañhe uggahetvā ye te samaṇabrāhmaṇā saṅghino gaṇino gaṇācariyā ñātā yasassino titthakarā sādhusammata bahujanassa, seyyathidaṃ – pūraṇo kassapo makkhaligosālo ajito kesakambalo pakudho [kakudho (sī.) pakuddho (syā. kaṃ.)] kaccāno sañcayo [sañjayo (sī. syā. kaṃ. pī.)] belatṭhaputto [bellatṭhiputto (sī. pī.), veḷatṭhaputto (syā.)] nigaṇṭho nāṭaputto [nāṭaputto (sī. pī.)], te upasaṅkamitvā te pañhe pucchati. Te sabhiyena paribbājakena pañhe puṭṭhā na sampāyanti; asampāyantā kopañca dosañca appaccayañca pātukaronti. Api ca sabhiyam yeva paribbājakam paṭipucchanti.

Atha kho sabhiyassa paribbājakassa etadahosi – “ye kho te bhonto samaṇabrāhmaṇā saṅghino gaṇino gaṇācariyā ñātā yasassino titthakarā sādhusammata bahujanassa, seyyathidaṃ – pūraṇo kassapo...pe... nigaṇṭho nāṭaputto, te mayā pañhe puṭṭhā na sampāyanti, asampāyantā kopañca dosañca appaccayañca pātukaronti; api ca maññevettha paṭipucchanti. Yannūnāham hīnāyāvattitvā kāme paribhuñjeyya”nti.

Atha kho sabhiyassa paribbājakassa etadahosi – “ayampi kho samaṇo gotamo saṅghī ceva gaṇī ca gaṇācariyo ca ñāto yasassī titthakaro sādhusammato bahujanassa; yaṃnūnāham samaṇam gotamam upasaṅkamitvā ime pañhe puccheyya”nti.

Atha kho sabhiyassa paribbājakassa etadahosi – “yepi kho te [ye kho te (syā.), yaṃ kho te (ka.)] bhonto samaṇabrāhmaṇā jiṇṇā vuḍḍhā mahallakā addhagatā vayoanuppattā therā rattaññū cirapabbajitā saṅghino gaṇino gaṇācariyā ñātā yasassino titthakarā sādhusammata bahujanassa, seyyathidaṃ – pūraṇo kassapo...pe... nigaṇṭho nāṭaputto, tepi mayā pañhe puṭṭhā na sampāyanti, asampāyantā kopañca dosañca appaccayañca pātukaronti, api ca maññevettha paṭipucchanti; kiṃ pana me samaṇo gotamo ime pañhe puṭṭho byākarissati! Samaṇo hi gotamo daharo ceva jātiyā, navo ca pabbajjāyā”ti.

Atha kho sabhiyassa paribbājakassa etadahosi – “samaṇo kho [samaṇo kho gotamo (syā. ka.)] daharoti na uññātabbo na paribhotabbo. Daharopi cesa samaṇo gotamo mahiddhiko hoti mahānubhāvo, yaṃnūnāham samaṇam gotamam upasaṅkamitvā ime pañhe puccheyya”nti.

Atha kho sabhiyo paribbājako yena rājagaham tena cārikam pakkāmi. Anupubbena cārikam caramāno yena rājagaham veḷuvanam kalandakanivāpo, yena bhagavā tenupasaṅkami; upasaṅkamitvā bhagavatā saddhiṃ sammodi. Sammodanīyam katham saraṇīyam vītisāretvā ekamantaṃ nisīdi. Ekamantaṃ nisinnō kho sabhiyo paribbājako bhagavantaṃ gāthāya ajjhabhāsi –

515. “Kaṅkhī vecikicchī āgamaṃ, (iti sabhiyo)
Pañhe pucchituṃ abhikaṅkhamāno;
Tesantakaro bhavāhi [bhavāhi me (pī. ka.)] pañhe me puṭṭho,
Anupubbaṃ anudhammaṃ byākarohi me”.

516. “Dūrato āgatosi sabhiya, (iti bhagavā)
Pañhe pucchituṃ abhikaṅkhamāno;
Tesantakaro bhavāmi [tesamantakaromi te (ka.)] pañhe te puṭṭho,
Anupubbaṃ anudhammaṃ byākaromi te.

517. “Puccha maṃ sabhiya pañhaṃ, yaṃ kiñci manasicchasi;
Tassa tasseva pañhassa, ahaṃ antaṃ karomi te”ti.

Atha kho sabhiyassa paribbājakassa etadahosi – “acchariyaṃ vata, bho, abbhutaṃ vata, bho! Yaṃ vatāhaṃ aññesu samaṇabrāhmaṇesu okāsakammamattampi [okāsamattampi (sī. pī.)] nālatthaṃ taṃ me idaṃ samaṇena gotamena okāsakammaṃ kata”nti. Attamano pamudito udaggo pītisomanassajāto bhagavantaṃ pañhaṃ apucchi –

518. “Kiṃ pattinamāhu bhikkhunaṃ, (iti sabhiyo)
Sorataṃ kena kathaṇca dantamāhu;
Buddhoti kathaṃ pavuccati,
Puṭṭho me bhagavā byākarohi”.
519. “Pajjena katena attanā, (sabhiyāti bhagavā)
Parinibbānagato vitīṇṇakaṅkho;
Vibhavaṇca bhavaṇca vippahāya,
Vusitavā khīṇapunabbhavo sa bhikkhu.
520. “Sabbattha upekkhako satimā, na so hiṃsati kañci sabbaloke;
Tiṇṇo samaṇo anāvilo, ussadā yassa na santi sorato so.
521. “Yassindriyāni bhāvitāni, ajjhattaṃ bahiddhā ca sabbaloke;
Nibbijjha imaṃ paraṇca lokam, kālaṃ kaṅkhati bhāvito sa danto.
522. “Kappāni viceyya kevalāni, saṃsāraṃ dubhayaṃ cutūpapātaṃ;
Vigatarajamanaṅgaṇaṃ visuddhaṃ, pattaṃ jātikhayaṃ tamāhu buddha”nti.

Atha kho sabhiyo paribbājako bhagavato bhāsitaṃ abhinanditvā anumoditvā attamano pamudito udaggo pītisomanassajāto bhagavantaṃ uttariṃ [uttari (ka.)] pañhaṃ apucchi –

523. “Kiṃ pattinamāhu brāhmaṇaṃ, (iti sabhiyo)
Samaṇaṃ kena kathaṇca nhātakoti;
Nāgoti kathaṃ pavuccati,
Puṭṭho me bhagavā byākarohi”.
524. “Bāhitvā sabbapāpakāni, (sabhiyāti bhagavā)
Vimalo sādhusamāhito ṭhitatto;
Saṃsāramaticca kevalī so,
Asito tādi pavuccate sa brahmā.
525. “Samitāvi pahāya puñṇapāpaṃ, virajo ñatvā imaṃ paraṇca lokam;
Jātimaraṇaṃ upātivatto, samaṇo tādi pavuccate tathattā.
526. “Ninhāya [ninhāya (syā.)] sabbapāpakāni, ajjhattaṃ bahiddhā ca sabbaloke;
Devamanussesu kappiyesu, kappam neti tamāhu nhātakoti”ti.
527. “Āguṃ na karoti kiñci loke, sabbasaṃyoge [sabbayoge (ka.)] visajja bandhanāni;
Sabbattha na sajjatī vimutto, nāgo tādi pavuccate tathattā”ti.

Atha kho sabhiyo paribbājako...pe... bhagavantaṃ uttariṃ pañhaṃ apucchi –

528. “Kaṃ khettajinam vadanti buddhā, (iti sabhiyo)
Kusalam kena kathaṇca paṇḍitoti;
Muni nāma katham pavuccati,
Puṭṭho me bhagavā byākarohi”.
529. “Khetṭāni viceyya kevalāni, (sabhiyāti bhagavā)
Dibbam mānusakaṇca brahmakhettam;
Sabbakhettamūlabandhanā pamutto,
Khettajino tādi pavuccate tathattā.
530. “Kosāni viceyya kevalāni, dibbam mānusakaṇca brahmakosam;
Sabbakosamūlabandhanā pamutto, kusalo tādi pavuccate tathattā.
531. “Dubhayāni viceyya paṇḍarāni, ajjhattam bahiddhā ca suddhipañño;
Kaṇham sukkaṃ upātivatto, paṇḍito tādi pavuccate tathattā.
532. “Asataṇca sataṇca ñatvā dhammam, ajjhattam bahiddhā ca sabbaloke;
Devamanussehi pūjanīyo, saṅgam jālamaticca so muni”’ti.

Atha kho sabhiyo paribbājako...pe... bhagavantam uttariṃ pañham apucchi –

533. “Kiṃ pattinamāhu vedagum, (iti sabhiyo)
Anuviditam kena kathaṇca vīriyavāti;
Ājāniyo kinti nāma hoti,
Puṭṭho me bhagavā byākarohi”.
534. “Vedāni viceyya kevalāni, (sabhiyāti bhagavā)
Samaṇānam yānidhatthi [yānipatthi (sī. syā. pī.)] brāhmaṇānam;
Sabbavedanāsu vītarāgo,
Sabbam vedamaticca vedagū so.
535. “Anuvicca papañcanāmarūpaṃ, ajjhattam bahiddhā ca rogamūlam;
Sabbarogamūlabandhanā pamutto, anuvidito tādi pavuccate tathattā.
536. “Virato idha sabbapāpakehi, nirayadukkham aticca vīriyavā so;
So vīriyavā padhānavā, dhīro tādi pavuccate tathattā.
537. “Yassassu lunāni bandhanāni, ajjhattam bahiddhā ca saṅgamūlam;
Sabbasaṅgamūlabandhanā pamutto, ājāniyo tādi pavuccate tathattā”’ti.

Atha kho sabhiyo paribbājako...pe... bhagavantam uttariṃ pañham apucchi –

538. “Kiṃ pattinamāhu sottiyaṃ, (iti sabhiyo)
Ariyaṃ kena kathaṇca caraṇavāti;
Paribbājako kinti nāma hoti,
Puṭṭho me bhagavā byākarohi”.
539. “Sutvā sabbadhammam abhiññāya loke, (sabhiyāti bhagavā)
Sāvajjānavajjam yadatthi kiñci;
Abhibhum akathamkathim vimuttam,
Anigham sabbadhimāhu sottiyoti.

540. “Chetvā āsavāni ālayāni, vidvā so na upeti gabbhaseyyam;
Saññaṃ tividham panujja paṅkaṃ, kappam neti tamāhu ariyoti.
541. “Yo idha caraṇesu pattipatto, kusalo sabbadā ājānāti [ājāni (syā.)] dhammaṃ;
Sabbattha na sajjati vimuttacitto [vimutto (sī.)], paṭighā yassa na santi caraṇavā so.
542. “Dukkhavepakkaṃ yadatthi kammaṃ, uddhamadho tiriyaṃ vāpi [tiriyañcāpi (syā.)] majjhe;
Paribbājayitvā pariññacārī, māyaṃ mānamathopi lobhakodham;
Pariyantamakāsi nāmarūpaṃ, taṃ paribbājakamāhu pattipatta’’nti.

Atha kho sabhiyo paribbājako bhagavato bhāsitaṃ abhinanditvā anumoditvā attamano pamudito udaggo pītisomanassajāto utthāyāsanaṃ ekaṃsaṃ uttarāsaṅgaṃ karitvā yena bhagavā tenañjalim paṇāmetvā bhagavantam sammukhā sārūpāhi gāthāhi abhitthavi –

543. “Yāni ca tīṇi yāni ca saṭṭhi, samaṇappavādasitāni [samaṇappavādanissitāni (syā. ka.)]
bhūripañña;
Saññakkharasaññanissitāni, osaraṇāni vineyya oghatamagā.
544. “Antagūsi pāragū [pāragūsi (syā. pī. ka.)] dukkhassa, arahāsi sammāsambuddho khīṇāsavaṃ
taṃ maññe;
Jutimā mutimā pahūtapañño, dukkhassantakaraṃ atāresi maṃ.
545. “Yaṃ me kaṅkhitamaññāsi, vicikicchā maṃ tārayi namo te;
Muni monapathesu pattipatta, akhila ādiccabandhu soratosi.
546. “Yā me kaṅkhā pure āsi, taṃ me byākāsi cakkhumā;
Addhā munīsi sambuddho, natthi nīvaraṇā tava.
547. “Upāyāsā ca te sabbe, viddhastā vinaḷīkatā;
Sītībhūto damappatto, dhitimā saccanikkamo.
548. “Tassa te nāganāgassa, mahāvīrassa bhāsato;
Sabbe devānumodanti, ubho nāradapabbatā.
549. “Namo te purisājañña, namo te purisuttama;
Sadevakasmiṃ lokasmiṃ, natthi te paṭipuggalo.
550. “Tuvaṃ buddho tuvaṃ satthā, tuvaṃ mārābhībhū muni;
Tuvaṃ anusaye chetvā, tiṇṇo tāresi maṃ pajam.
551. “Upadhī te samatikkantā, āsavā te padālītā;
Sīhosi anupādāno, pahīnabhayabheravo.
552. “Puṇḍarīkaṃ yathā vaggu, toyena na upalimpati [toyena na upalippati (sī.), toyena na upalippati
(pī.), toyena na upalimpati (ka.)];
Evaṃ puñña ca pāpe ca, ubhaye tvaṃ na limpasi;
Pāde vīra pasārehi, sabhiyo vandati satthuno’’ti.

Atha kho sabhiyo paribbājako bhagavato pādesu sirasā nipatitvā bhagavantam etadavoca –
“abhikkantaṃ, bhante...pe... esāhaṃ bhagavantam saraṇam gacchāmi dhammañca bhikkhusaṅghañca;
labheyyāhaṃ, bhante, bhagavato santike pabbajjam, labheyyam upasampada’’nti.

“Yo kho, sabhiya, aññatitthiyapubbo imasmiṃ dhammavinaye ākaṅkhati pabbajjaṃ, ākaṅkhati upasampadaṃ, so cattāro māse parivasati; catunnaṃ māsānaṃ accayena āraddhacittā bhikkhū pabbājenti, upasampādentī bhikkhubhāvāya. Api ca mettha puggalavemattatā veditā”ti.

“Sace, bhante, aññatitthiyapubbā imasmiṃ dhammavinaye ākaṅkhantā pabbajjaṃ, ākaṅkhantā upasampadaṃ cattāro māse parivasanti, catunnaṃ māsānaṃ accayena āraddhacittā bhikkhū pabbājenti, upasampādentī bhikkhubhāvāya, ahaṃ cattāri vassāni parivasissāmi; catunnaṃ vassānaṃ accayena āraddhacittā bhikkhū pabbājentu upasampādentu bhikkhubhāvāya”ti. Alatta kho sabhiyo paribbājako bhagavato santike pabbajjaṃ alatta upasampadaṃ...pe... aññataro kho panāyasmā sabhiyo arahataṃ ahoṣīti.

Sabhiyasuttaṃ chaṭṭhaṃ niṭṭhitaṃ.

7. Selasuttaṃ

Evam me suttaṃ – ekaṃ samayaṃ bhagavā aṅguttarāpesu cārikaṃ caramāno mahatā bhikkhusaṅghena saddhiṃ aḍḍhateḷasehi bhikkhusatehi yena āpaṇaṃ nāma aṅguttarāpānaṃ nigamo tadavasari. Assosi kho keṇiyo jaṭilo “samaṇo khalu, bho, gotamo sakyaputto sakyakulā pabbajito aṅguttarāpesu cārikaṃ caramāno mahatā bhikkhusaṅghena saddhiṃ aḍḍhateḷasehi bhikkhusatehi āpaṇaṃ anupatto. Taṃ kho pana bhavantaṃ gotamaṃ evaṃ kalyāṇo kittisaddo abhuggato – ‘itipi so bhagavā arahamaṃ sammāsambuddho vijjācaraṇasampanno sugato lokavidū anuttaro purisadammasārathi sathā devamanussānaṃ buddho bhagavā’ti [bhagavā (syā. pī.)]. So imaṃ lokaṃ sadevakaṃ samārakaṃ sabrahmaṃ sassamaṇabrāhmaṇiṃ pajamaṃ sadevamanussaṃ sayamaṃ abhiññā sacchikatvā pavedeti. So dhammaṃ desati ādikalyāṇaṃ majjhakalyāṇaṃ pariyoṣānakalyāṇaṃ sātthaṃ sabyañjanaṃ, kevalaparipuṇṇaṃ parisuddhaṃ brahmacariyaṃ pakāseti. Sādhū kho pana tathārūpānaṃ arahataṃ dassanaṃ hotī”ti.

Atha kho keṇiyo jaṭilo yena bhagavā tenupasaṅkami; upasaṅkamitvā bhagavatā saddhiṃ sammodi. Sammodanīyaṃ kathaṃ sārāṇīyaṃ vītisāretvā ekamantaṃ nisīdi. Ekamantaṃ nisinnaṃ kho keṇiyaṃ jaṭilaṃ bhagavā dhammiyā kathāya sandassesī samādapesī samuttejesī sampahaṃsesī. Atha kho keṇiyo jaṭilo bhagavatā dhammiyā kathāya sandassito samādapito samuttejito sampahaṃsito bhagavantaṃ etadavoca – “adhivāsetu me bhavaṃ gotamo svātanāya bhattaṃ saddhiṃ bhikkhusaṅghenā”ti. Evaṃ vutte, bhagavā keṇiyaṃ jaṭilaṃ etadavoca – “mahā kho, keṇiya, bhikkhusaṅgho aḍḍhateḷasāni bhikkhusatāni; tvaṅca brāhmaṇesu abhippasanno”ti.

Dutiyampi kho keṇiyo jaṭilo bhagavantaṃ etadavoca – “kiñcāpi, bho gotama, mahā bhikkhusaṅgho aḍḍhateḷasāni bhikkhusatāni, ahaṅca brāhmaṇesu abhippasanno; adhvāsetu me bhavaṃ gotamo svātanāya bhattaṃ saddhiṃ bhikkhusaṅghenā”ti. Dutiyampi kho bhagavā keṇiyaṃ jaṭilaṃ etadavoca – “mahā kho, keṇiya, bhikkhusaṅgho aḍḍhateḷasāni bhikkhusatāni; tvaṅca brāhmaṇesu abhippasanno”ti.

Tatiyampi kho keṇiyo jaṭilo bhagavantaṃ etadavoca – “kiñcāpi, bho gotama, mahā bhikkhusaṅgho aḍḍhateḷasāni bhikkhusatāni, ahaṅca brāhmaṇesu abhippasanno, adhvāsetu [adhivāsetveva (sī.)] me bhavaṃ gotamo svātanāya bhattaṃ saddhiṃ bhikkhusaṅghenā”ti. Adhvāsesī bhagavā tuṅhībhāvena. Atha kho keṇiyo jaṭilo bhagavato adhvāsanāṃ veditvā uṭṭhāyāsānā yena sako assamo tenupasaṅkami; upasaṅkamitvā mittāmacce ñātisālohite āmantesī – “suṇantu me bhavanto mittāmaccā ñātisālohitā, samaṇo me gotamo nimantito svātanāya bhattaṃ saddhiṃ bhikkhusaṅghena, yena me kāyaveyyāvaṭikaṃ kareyyāthā”ti. “Evaṃ, bho”ti kho keṇiyassa jaṭilassa mittāmaccā ñātisālohitā keṇiyassa jaṭilassa paṭissutvā appekacce uddhanāni khaṇanti, appekacce kaṭṭhāni phārenti, appekacce bhājanāni dhovanti, appekacce udakamaṇikaṃ patitṭhāpentī, appekacce āsanāni paññāpentī. Keṇiyo pana jaṭilo sāmānyeva maṅḍalamālaṃ paṭiyādeti.

Tena kho pana samayena selo brāhmaṇo āpaṇe paṭivasati, tiṇṇaṃ vedānaṃ pāragū sanighaṇḍukeṭubhānaṃ sākkaṅgappabhedānaṃ itihāsaṇḍakamānaṃ padako veyyākaraṇo lokāyatamahāpurisalakkhaṇesu anavayo, tīṇi ca māṇavakasatāni mante vāceti.

Tena kho pana samayena keṇiyo jaṭilo sele brāhmaṇe abhippasanno hoti. Atha kho selo brāhmaṇo tīhi māṇavakasatehi parivuto jaṅghāvihāraṃ anucaṅkamamāno anuvicaramāno yena keṇiyassa jaṭilassa assamo tenupasaṅkami. Addasā kho selo brāhmaṇo keṇiyassa jaṭilassa assame [keṇissamiye jaṭile (sī. pī.)] appekacce uddhanāni khaṇante...pe... appekacce āsanāni paññapente, keṇiyaṃ pana jaṭilaṃ sāmāmyeva maṇḍalamālaṃ paṭiyādentam. Disvāna keṇiyaṃ jaṭilaṃ etadavoca – “kiṃ nu kho bhoto keṇiyassa āvāho vā bhavissati, vivāho vā bhavissati, mahāyañño vā paccupaṭṭhito, rājā vā māgadho seniyo bimbisāro nimantito svātanāya saddhiṃ balakāyena” ti?

“Na me, bho sela, āvāho vā bhavissati vivāho vā, nāpi rājā māgadho seniyo bimbisāro nimantito svātanāya saddhiṃ balakāyena; api ca kho me mahāyañño paccupaṭṭhito. Atthi samaṇo gotamo sakyaputto sakyakulā pabbajito aṅguttarāpesu cārikaṃ caramāno mahatā bhikkhusaṅghena saddhiṃ aḍḍhateḷasehi bhikkhusatehi āpaṇaṃ anuppatto. Tam kho pana bhavantaṃ gotamaṃ...pe... buddho bhagavāti. So me nimantito svātanāya bhantaṃ saddhiṃ bhikkhusaṅghena” ti. “Buddhoti, bho keṇiya, vadesi”? “Buddhoti, bho sela, vadāmi”. “Buddhoti, bho keṇiya, vadesi”? “Buddhoti, bho sela, vadāmi” ti.

Atha kho selassa brāhmaṇassa etadahosi – “ghosopi kho eso dullabho lokasmiṃ yadidaṃ buddhoti. Āgatāni kho panamhākaṃ mantesu dvattiṃsamahāpurisalakkhaṇāni, yehi samannāgatassa mahāpurisassa dveva gatiyo bhavanti anañña. Sace agāraṃ ajjhāvasati rājā hoti cakkavatti dhammiko dhammarājā caturanto vijitāvī janapadattāvariyappatto sattaratanasamannāgato. Tassimāni satta ratanāni bhavanti, seyyathidaṃ – cakkaratanaṃ, hatthiratanam, assaratanam, maṇiratanam, itthiratanam, gahapatiratanam, pariṇāyakaratanameva sattamaṃ. Parosahassaṃ kho panassa puttā bhavanti sūrā viraṅgarūpā parasenappamaddanā. So imaṃ pathaviṃ sāgarapariyantaṃ adaṇḍena asatthena dhammena abhivijjiya ajjhāvasati. Sace kho pana agārasmā anagāriyaṃ pabbajati, arahaṃ hoti sammāsambuddho loke vivaṭṭacchaddo [vivattacchaddo (sī. pī.)]. Kahaṃ pana, bho keṇiya, etarahi so bhavaṃ gotamo viharati arahaṃ sammāsambuddho” ti?

Evam vutte, keṇiyo jaṭilo dakkhiṇaṃ bāhuṃ paggaḥetvā selaṃ brāhmaṇaṃ etadavoca – “yenesā, bho sela, nīlavanarājī” ti. Atha kho selo brāhmaṇo tīhi māṇavakasatehi saddhiṃ yena bhagavā tenupasaṅkami. Atha kho selo brāhmaṇo te māṇavake āmantesi – “appasaddā bhonto āgacchantu, pade padaṃ nikkhipantā. Durāsadā hi te bhagavanto [bhavanto (syā. ka.)] sīhāva ekacarā. Yadā cāhaṃ, bho, samaṇena gotamena saddhiṃ manteyyūṃ, mā me bhonto antarantarā kathaṃ opāsetha; kathāpariyosānaṃ me bhavanto āgamentū” ti.

Atha kho selo brāhmaṇo yena bhagavā tenupasaṅkami; upasaṅkamtīvā bhagavatā saddhiṃ sammodi. Sammodanīyaṃ kathaṃ saraṇīyaṃ vītisāretvā ekamantaṃ nisīdi. Ekamantaṃ nisinna kho selo brāhmaṇo bhagavato kāye dvattiṃsamahāpurisalakkhaṇāni samannesi [sammanesi (sī. syā.)]. Addasā kho selo brāhmaṇo bhagavato kāye dvattiṃsamahāpurisalakkhaṇāni yebhuyyena ṭhapetvā dve. Dvīsu mahāpurisalakkhaṇesu kaṅkhati vicikicchati nādhimuccati na sampasīdati – kosohite ca vatthaguyhe, pahūtajivhatāya cāti.

Atha kho bhagavato etadahosi – “passati kho me ayaṃ selo brāhmaṇo dvattiṃsamahāpurisalakkhaṇāni yebhuyyena ṭhapetvā dve. Dvīsu mahāpurisalakkhaṇesu kaṅkhati vicikicchati nādhimuccati na sampasīdati – kosohite ca vatthaguyhe, pahūtajivhatāya cā” ti. Atha kho bhagavā tathārūpaṃ iddhābhisaṅkhāraṃ abhisāṅkhāsī [abhisaṅkhāresi (syā. ka.)], yathā addasa selo brāhmaṇo bhagavato kosohitaṃ vatthaguyhaṃ. Atha kho bhagavā jivhaṃ ninnāmetvā ubhopi kaṅṇasotāni anumasi paṭimasi, ubhopi nāsikasotāni anumasi paṭimasi, kevalampi nalāṭamaṇḍalaṃ

jivhāya chādesi.

Atha kho selassa brāhmaṇassa etadahosi – “samannāgato kho samaṇo gotamo dvattiṃsamahāpurisalakkhaṇehi paripuṇṇehi, no apuripuṇṇehi. No ca kho naṃ jānāmi buddho vā no vā. Sutaṃ kho pana metaṃ brāhmaṇānaṃ vuḍḍhānaṃ mahallakānaṃ ācariyapācariyānaṃ bhāsamānānaṃ – ‘ye te bhavanti arahanto sammāsambuddhā, te sake vaṇṇe bhaññamāne attānaṃ pātukarontī’ ti. Yaṃnūnāhaṃ samaṇaṃ gotamaṃ sammukhā sārubbāhi gāthāhi abhitthaveyya’ nti. Atha kho selo brāhmaṇo bhagavantaṃ sammukhā sārubbāhi gāthāhi abhitthavi –

553. “Paripuṇṇakāyo suruci, sujāto cārudassano;
Suvaṇṇavaṇṇosi bhagavā, susukkadāṭhosi vīriyavā.
554. “Narassa hi sujātassa, ye bhavanti viyañjanā;
Sabbe te tava kāyasmim, mahāpurisalakkhaṇā.
555. “Pasannanetto sumukho, brahā uju patāpavā;
Majjhe samaṇasaṅghassa, ādiccova virocasi.
556. “Kalyāṇadassano bhikkhu, kañcanasannibhattaco;
Kiṃ te samaṇabhāvena, evaṃ uttamavaṇṇino.
557. “Rājā arahasi bhavituṃ, cakkavattī rathesabho;
Cāturato vijitāvī, jambusaṇḍassa [jambumaṇḍassa (ka.)] issaro.
558. “Khattiyā bhogirājāno [bhojarājāno (sī. syā.)], anuyantā [anuyuttā (sī.)] bhavantu te;
Rājābhirājā manujindo, rajjaṃ kārehi gotama’.
559. “Rājāhamasmi selāti, (bhagavā) dhammarājā anuttaro;
Dhammena cakkaṃ vattemi, cakkaṃ appaṭivattiyaṃ’.
560. “Sambuddho paṭijānāsi, (iti selo brāhmaṇo) dhammarājā anuttaro;
‘Dhammena cakkaṃ vattemi’, iti bhāsasi gotama.
561. “Ko nu senāpati bho, sāvako sathuranvayo;
Ko te tamanuvatteti, dhammacakkaṃ pavattitaṃ’.
562. “Mayā pavattitaṃ cakkaṃ, (selāti bhagavā) dhammacakkaṃ anuttaraṃ;
Sāriputto anuvatteti, anujāto tathāgataṃ.
563. “Abhiññeyyaṃ abhiññātaṃ, bhāvetabbañca bhāvitaṃ;
Pahātabbaṃ pahīnaṃ me, tasmā buddhosmi brāhmaṇa.
564. “Vinayassu mayi kaṅkhaṃ, adhimuccassu brāhmaṇa;
Dullabhaṃ dassanaṃ hoti, sambuddhānaṃ abhiṇhaso.
565. “Yesaṃ ve [yesaṃ vo (pī.), yassa ve (syā.)] dullabho loke, pātubhāvo abhiṇhaso;
Sohaṃ brāhmaṇa sambuddho, sallakatto anuttaro.
566. “Brahmabhūto atitulo, mārasenappamaddano;
Sabbāmitte vasīkatvā, modāmi akutobhaya’.
567. “Imaṃ bhavanto nisāmetha, yathā bhāsati cakkhumā;

Sallakatto mahāvīro, sīhova nadatī vane.

568. “Brahmabhūtaṃ atitulamaṃ, mārasenappamaddanaṃ;
Ko disvā nappasīdeyya, api kaṇhābhijātiko.
569. “Yo maṃ icchati anvetu, yo vā nicchati gacchatu;
Idhāhaṃ pabbajissāmi, varapaññassa santike”.
570. “Evañce [etañce (sī. pī.)] ruccati bhoto, sammāsambuddhasāsane [sammāsambuddhasāsanam
(sī. syā. kaṃ. pī.)];
Mayampi pabbajissāma, varapaññassa santike”.
571. “Brāhmaṇā tisaṭā ime, yācanti pañjalīkatā;
Brahmacariyaṃ carissāma, bhagavā tava santike”.
572. “Svākkhātaṃ brahmacariyaṃ, (selāti bhagavā) sandiṭṭhikamakālikam;
Yattha amoghā pabbajjā, appamattassa sikkhato”ti.

Alattha kho selo brāhmaṇo sapaṛiso bhagavato santike pabbajjaṃ, alattha upasampadaṃ. Atha kho keṇiyo jaṭilo tassā rattiyā accayena sake assame paṇītaṃ khādanīyaṃ bhojanīyaṃ paṭiyādāpetvā bhagavato kālaṃ ārocāpesi – “kālo, bho gotama, niṭṭhitaṃ bhatta”nti. Atha kho bhagavā pubbaṅhasamayaṃ nivāsetvā pattacīvaramādāya yena keṇiyassa jaṭilassa assamo tenupasaṅkami; upasaṅkamitvā paññatte āsane nisīdi saddhiṃ bhikkhusaṅghena.

Atha kho keṇiyo jaṭilo buddhappamukhaṃ bhikkhusaṅghaṃ paṇītena khādanīyena bhojanīyena sahatthā santappesi sampavāresi. Atha kho keṇiyo jaṭilo bhagavantaṃ bhuttāviṃ onītapattapāṇiṃ aññataraṃ nīcaṃ āsanam gahetvā ekamantaṃ nisīdi. Ekamantaṃ nisinnaṃ kho keṇiyaṃ jaṭilaṃ bhagavā imāhi gāthāhi anumodī –

573. “Aggihuttamukhā yaññā, sāvittī chandaso mukhaṃ;
Rājā mukhaṃ manussānaṃ, nadīnaṃ sāgaro mukhaṃ.
574. “Nakkhattānaṃ mukhaṃ cando, ādicco tapataṃ mukhaṃ;
Puññaṃ ākaṅkhamānānaṃ, saṅgho ve yajataṃ mukha”nti.

Atha kho bhagavā keṇiyaṃ jaṭilaṃ imāhi gāthāhi anumoditvā utṭhāyāsanaṃ pakkāmi. Atha kho āyasmā selo sapaṛiso eko vūpakaṭṭho appamatto ātāpī pahitatto viharanto nacirasse ...pe... aññataro kho paṇāpasmā selo sapaṛiso arahataṃ ahoṣi.

Atha kho āyasmā selo sapaṛiso yena bhagavā tenupasaṅkami, upasaṅkamitvā ekaṃsaṃ cīvaram katvā yena bhagavā tenañjalim paṇāmetvā bhagavantaṃ gāthāya ajjhabhāsi –

575. “Yaṃ taṃ saraṇamāgama [māgamma (sī. syā. ka.)], ito aṭṭhami cakkhuma;
Sattarattena bhagavā, dantamha tava sāsane.
576. “Tuvaṃ buddho tuvaṃ satthā, tuvaṃ mārābhībhū muni;
Tuvaṃ anusaye chetvā, tiṇṇo tāresimaṃ pajam.
577. “Upadhī te samatikkantā, āsavā te padālītā;
Sīhosi [sīhova (ma. ni. 2.401)] anupādāno, pahīnabhayabheravo.

578. “Bhikkhavo tisaṭā ime, tiṭṭhanti pañjalīkatā;
Pāde vīra pasārehi, nāgā vandantu satthuno”’ti.

Selasuttaṃ sattamaṃ niṭṭhitam.

8. Sallasuttaṃ

579. Animittamaññātaṃ, maccānaṃ idha jīvitam;
Kasirañca parittañca, tañca dukkhena saṃyutam.

580. Na hi so upakkamo atthi, yena jātā na miyyare;
Jarampi patvā maraṇam, evaṃdhammā hi paṇino.

581. Phalānamiva pakkānaṃ, pāto patanato [papatato (sī. pī. aṭṭha.)] bhayaṃ;
Evaṃ jātāna maccānaṃ, niccaṃ maraṇato bhayaṃ.

582. Yathāpi kumbhakārassa, katā mattikabhājanā;
Sabbe bhedanapariyantā [bhedapariyantā (syā.)], evaṃ maccāna jīvitam.

583. Daharā ca mahantā ca, ye bālā ye ca paṇḍitā;
Sabbe maccuvasaṃ yanti, sabbe maccuparāyaṇā.

584. Tesam maccuparetānaṃ, gacchataṃ paralokato;
Na pitā tāyate puttaṃ, ñātī vā pana ñātake.

585. Pekkhataṃ yeva ñātīnaṃ, passa lālapataṃ puthu;
Ekamekova maccānaṃ, govajjho viya nīyati [niyyati (bahūsu)].

586. Evamabbhāhato loko, maccunā ca jarāya ca;
Tasmā dhīrā na socanti, viditvā lokapariyāyaṃ.

587. Yassa maggaṃ na jānāsi, āgatassa gatassa vā;
Ubho ante asampassaṃ, niratthaṃ paridevasi.

588. Paridevayamāno ce, kiñcidatthaṃ udabbahe;
Sammūlho hiṃsamattānaṃ, kayirā ce naṃ vicakkhaṇo.

589. Na hi ruṇṇena sokena, santiṃ pappoti cetaso;
Bhiyyassuppajjate dukkhaṃ, sarīraṃ cupahaññati.

590. Kiso vivaṇṇo bhavati, hiṃsamattānamattanā;
Na tena petā pārenti, niratthā paridevanā.

591. Sokamappajahaṃ jantu, bhiyyo dukkhaṃ nigacchati;
Anutthunanto kālaṅkataṃ [kālakatam (sī. syā.)], sokassa vasamanvagū.

592. Aññepi passa gamine, yathākammūpage nare;
Maccuno vasamāgamma, phandantevidha paṇino.

593. Yena yena hi maññanti, tato taṃ hoti aññathā;
Etādiso vinābhāvo, passa lokassa pariyāyaṃ.

594. Api vassasataṃ jīve, bhiyyo vā pana māṇavo;
Ñāṭisaṅghā vinā hoti, jahāti idha jīvitam.
595. Tasmā arahato sutvā, vineyya paridevitaṃ;
Petaṃ kālaṅkataṃ disvā, neso labbhā mayā iti.
596. Yathā saraṇamādittam, vārinā parinibbaye [parinibbuto (sī. ka.)];
Evampi dhīro sapañño, paṇḍito kusalo naro;
Khippamuppatitaṃ sokaṃ, vāto tūlaṃva dhamṣaye.
597. Paridevaṃ pajappañca, domanassañca attano;
Attano sukhamesāno, abbahe sallamattano.
598. Abbulhasallo asito, santiṃ pappuyya cetaso;
Sabbasokaṃ atikkanto, asoko hoti nibbutoti.

Sallasuttaṃ aṭṭhamam niṭṭhitaṃ.

9. Vāseṭṭhasuttaṃ

Evam me suttaṃ – ekaṃ samayaṃ bhagavā icchānaṅgale viharati icchānaṅgalavanasaṅḍe. Tena kho pana samayena sambahulā abhiññātā abhiññātā brāhmaṇamahāsālā icchānaṅgale paṭivasanti, seyyathidaṃ – caṅkī brāhmaṇo, tārukko brāhmaṇo, pokkharasāti brāhmaṇo, jāṇussoṇi [jāṇussoṇi (ka.)] brāhmaṇo, todeyyo brāhmaṇo, aññe ca abhiññātā abhiññātā brāhmaṇamahāsālā. Atha kho vāseṭṭhabhāradvājānaṃ māṇavaṇaṃ jaṅghāvihāraṃ anucaṅkamantānaṃ anuvicarantānaṃ [anucaṅkamamānānaṃ anuvicaramānānaṃ (sī. pī.)] ayamantarākathā udapādi – ‘kathaṃ, bho, brāhmaṇo hoti’ ti?

Bhāradvājo māṇavo evamāha – ‘yato kho, bho, ubhato sujāto hoti mātito ca pitito ca saṃsuddhagahaṇiko yāva sattamā pitāmahayugā akkhitto anupakkuṭṭho jātivādena, ettavatā kho bho brāhmaṇo hoti’ ti.

Vāseṭṭho māṇavo evamāha – ‘yato kho, bho, sīlavā ca hoti vatasampanno [vattasampanno (sī. syā. ma. ni. 2.454)] ca, ettavatā kho, bho, brāhmaṇo hoti’ ti. Neva kho asakkhi bhāradvājo māṇavo vāseṭṭham māṇavaṃ saññāpetuṃ, na pana asakkhi vāseṭṭho māṇavo bhāradvājaṃ māṇavaṃ saññāpetuṃ.

Atha kho vāseṭṭho māṇavo bhāradvājaṃ māṇavaṃ āmantesi – ‘ayaṃ kho, bho [ayaṃ bho (sī. syā. ka.), ayaṃ kho (pī.)] bhāradvāja, samaṇo gotamo sakyaputto sakyakulā pabbajito icchānaṅgale viharati icchānaṅgalavanasaṅḍe; taṃ kho pana bhavantaṃ gotamaṃ evaṃ kalyāṇo kittisaddo abbhuggato – ‘itipi...pe... buddho bhagavā’ ti. Āyāma, bho bhāradvāja, yena samaṇo gotamo tenupasaṅkamissāma; upasaṅkamitvā samaṇaṃ gotamaṃ etamatthaṃ pucchissāma. Yathā no samaṇo gotamo byākarissati tathā naṃ dhāressāma’ ti. ‘Evaṃ, bho’ ti kho bhāradvājo māṇavo vāseṭṭhassa māṇavassa paccassosi.

Atha kho vāseṭṭhabhāradvājā māṇavā yena bhagavā tenupasaṅkamaṃsu; upasaṅkamitvā bhagavatā saddhiṃ sammodiṃsu. Sammodanīyaṃ kathaṃ saraṇīyaṃ vītisāretvā ekamantaṃ nisīdiṃsu. Ekamantaṃ nisinna kho vāseṭṭho māṇavo bhagavantaṃ gāthāhi ajjhabhāsi –

599. ‘‘Anuññātaṭṭhā, tevijjā mayamasmubho;
Ahaṃ pokkharasātissa, tārukkhassāyaṃ māṇavo.
600. ‘‘Tevijjānaṃ yadakkhātaṃ, tatra kevalinosmase;

Padakasma veyyākaraṇā, jappe ācariyasādisā.

601. “Tesam no jātivādasmiṃ, vivādo atthi gotama;
Jātiyā brāhmaṇo hoti, bhāradvājo iti bhāsati;
Ahañca kammunā [[kammanā \(sī. pī.\) evamuparipi](#)] brūmi, evaṃ jānāhi cakkhuma.
602. “Te na sakkoma saññāpetuṃ, aññamaññaṃ mayaṃ ubho;
Bhavantam [[bhagavantam \(ka.\)](#)] puṭṭhumāgamhā, sambuddham itī vissutaṃ.
603. “Candaṃ yathā khayātītaṃ, pecca pañjalikā janā;
Vandamānā namassanti, evaṃ lokasmi gotamaṃ.
604. “Cakkhuṃ loke samuppannaṃ, mayaṃ pucchāma gotamaṃ;
Jātiyā brāhmaṇo hoti, udāhu bhavati kammunā;
Ajānataṃ no pabrūhi, yathā jānesu brāhmaṇaṃ”.
605. “Tesam vo aham byakkhissam, (vāseṭṭhāti bhagavā) anupubbaṃ yathātathaṃ;
Jātivibhaṅgaṃ pāṇānaṃ, aññamañña hi jātiyo.
606. “Tiṇarukkhepi jānātha, na cāpi paṭijānare;
Liṅgaṃ jātimayaṃ tesam, aññamañña hi jātiyo.
607. “Tato kīṭe paṭaṅge ca, yāva kunthakipillike;
Liṅgaṃ jātimayaṃ tesam, aññamañña hi jātiyo.
608. “Catuppadepi jānātha, khuddake ca mahallake;
Liṅgaṃ jātimayaṃ tesam, aññamañña hi jātiyo.
609. “Pādūdarepi jānātha, urage dīghapiṭṭhike;
Liṅgaṃ jātimayaṃ tesam, aññamañña hi jātiyo.
610. “Tato macchepepi jānātha, odake vārigocare;
Liṅgaṃ jātimayaṃ tesam, aññamañña hi jātiyo.
611. “Tato pakkhīpe jānātha, pattayāne vihaṅgame;
Liṅgaṃ jātimayaṃ tesam, aññamañña hi jātiyo.
612. “Yathā etāsu jātīsu, liṅgaṃ jātimayaṃ puthu;
Evaṃ natthi manussesu, liṅgaṃ jātimayaṃ puthu.
613. “Na kesehi na sīsena, na kaṇṇehi na akkhibhi;
Na mukhena na nāsāya, na oṭṭhehi bhamūhi vā.
614. “Na gīvāya na aṃsehi, na udarena na piṭṭhiyā;
Na soṇiyā na urasā, na sambādhe na methune [[na sambādhā na methunā \(syā. ka.\)](#)].
615. “Na hatthehi na pādehi, nāṅgulīhi nakhehi vā;
Na jaṅghāhi na ūrūhi, na vaṇṇena sarena vā;
Liṅgaṃ jātimayaṃ neva, yathā aññāsu jātīsu.
616. “Paccattañca sarīresu [[paccattam sasarīresu \(sī. pī.\)](#)], manussesvetam na vijjati;
Vokārañca manussesu, samaññāya pavuccati.

617. “Yo hi koci manussesu, gorakkhaṃ upajīvati;
Evaṃ vāseṭṭha jānāhi, kassako so na brāhmaṇo.
618. “Yo hi koci manussesu, puthusippena jīvati;
Evaṃ vāseṭṭha jānāhi, sippiko so na brāhmaṇo.
619. “Yo hi koci manussesu, vohāraṃ upajīvati;
Evaṃ vāseṭṭha jānāhi, vāṇijo so na brāhmaṇo.
620. “Yo hi koci manussesu, parapessena jīvati;
Evaṃ vāseṭṭha jānāhi, pessiko [pessako (ka.)] so na brāhmaṇo.
621. “Yo hi koci manussesu, adinnaṃ upajīvati;
Evaṃ vāseṭṭha jānāhi, coro eso na brāhmaṇo.
622. “Yo hi koci manussesu, issatthaṃ upajīvati;
Evaṃ vāseṭṭha jānāhi, yodhājīvo na brāhmaṇo.
623. “Yo hi koci manussesu, porohiccena jīvati;
Evaṃ vāseṭṭha jānāhi, yājako eso na brāhmaṇo.
624. “Yo hi koci manussesu, gāmaṃ raṭṭhañca bhuñjati;
Evaṃ vāseṭṭha jānāhi, rājā eso na brāhmaṇo.
625. “Na cāhaṃ brāhmaṇaṃ brūmi, yonijaṃ mattisambhavaṃ;
Bhovādi nāma so hoti, sace [sa ve (sī. syā.)] hoti sakiñcano;
Akiñcanaṃ anādānaṃ, tamaḥaṃ brūmi brāhmaṇaṃ.
626. “Sabbasaṃyojanaṃ chetvā, so ve na paritassati;
Saṅgātigaṃ viṣaṃyuttaṃ, tamaḥaṃ brūmi brāhmaṇaṃ.
627. “Chetvā naddhiṃ varattañca, sandānaṃ sahanukkamaṃ;
Ukkhittapalighaṃ buddhaṃ, tamaḥaṃ brūmi brāhmaṇaṃ.
628. “Akkosaṃ vadhabandhañca, aduṭṭho yo titikkhati;
Khaṇṭibalaṃ balānīkaṃ, tamaḥaṃ brūmi brāhmaṇaṃ.
629. “Akkodhanaṃ vatavantaṃ, sīlavantaṃ anussadaṃ;
Dantaṃ antimasārīraṃ, tamaḥaṃ brūmi brāhmaṇaṃ.
630. “Vāri pokkharapatteva, āraggeriva sāsapo;
Yo na limpati kāmesu, tamaḥaṃ brūmi brāhmaṇaṃ.
631. “Yo dukkhassa pajānāti, idheva khayamattano;
Pannabhāraṃ viṣaṃyuttaṃ, tamaḥaṃ brūmi brāhmaṇaṃ.
632. “Gambhīrapaññaṃ medhāviṃ, maggāmaggassa kovidaṃ;
Uttamatthamanuppattaṃ, tamaḥaṃ brūmi brāhmaṇaṃ.
633. “Asaṃsaṭṭhaṃ gahaṭṭhehi, anāgārehi cūbhayaṃ;
Anokasārimappicchaṃ, tamaḥaṃ brūmi brāhmaṇaṃ.

634. “Nidhāya daṇḍaṃ bhūtesu, tasesu thāvaresu ca;
Yo na hanti na ghātetī, tamaḥaṃ brūmi brāhmaṇaṃ.
635. “Aviruddhaṃ viruddhesu, attadaṇḍesu nibbutaṃ;
Sādānesu anādānaṃ, tamaḥaṃ brūmi brāhmaṇaṃ.
636. “Yassa rāgo ca doso ca, māno makkho ca pātito;
Sāsaporiva āraggā, tamaḥaṃ brūmi brāhmaṇaṃ.
637. “Akakkasaṃ viññāpaniṃ, giraṃ saccamudīraye;
Yāya nābhisaḥaḥ kañci, tamaḥaṃ brūmi brāhmaṇaṃ.
638. “Yodha dīghaṃ va rassaṃ vā, aṇuṃ thūlaṃ subhāsubhaṃ;
Loke adinnaṃ nādiyati, tamaḥaṃ brūmi brāhmaṇaṃ.
639. “Āsā yassa na vijjanti, asmiṃ loke paramhi ca;
Nirāsāsaṃ [nirāsayaṃ (sī. syā. pī.), nirāsakaṃ (?)] viṣaṃyuttaṃ, tamaḥaṃ brūmi brāhmaṇaṃ.
640. “Yassālayā na vijjanti, aññāya akathaṃkathī;
Amatogadhamanuppattaṃ, tamaḥaṃ brūmi brāhmaṇaṃ.
641. “Yodha puññaṇca pāpaṇca, ubho saṅgamupaccagā;
Asokaṃ virajaṃ suddhaṃ, tamaḥaṃ brūmi brāhmaṇaṃ.
642. “Candaṃva vimalaṃ suddhaṃ, vipasannamanāvilaṃ;
Nandībhavaparikkhīṇaṃ, tamaḥaṃ brūmi brāhmaṇaṃ.
643. “Yomaṃ palipathaṃ duggaṃ, saṃsāraṃ mohamaccagā;
Tiṇṇo pāraṅgato jhāyī, anejo akathaṃkathī;
Anupādāya nibbuto, tamaḥaṃ brūmi brāhmaṇaṃ.
644. “Yodha kāme pahantvāna, anāgāro paribbaje;
Kāmaḥbhavaparikkhīṇaṃ, tamaḥaṃ brūmi brāhmaṇaṃ.
645. “Yodha taṇhaṃ pahantvāna, anāgāro paribbaje;
Taṇhābhavaparikkhīṇaṃ, tamaḥaṃ brūmi brāhmaṇaṃ.
646. “Hitvā mānusaḥaṃ yogaṃ, dibbaṃ yogaṃ upaccagā;
Sabbayogaviṣaṃyuttaṃ, tamaḥaṃ brūmi brāhmaṇaṃ.
647. “Hitvā ratiṇca aratiṃ, sītibhūtaṃ nirūpadhiṃ;
Sabbalokābhibhuṃ vīraṃ, tamaḥaṃ brūmi brāhmaṇaṃ.
648. “Cutīṃ yo vedi [yo’veti (?) itivuttake 99 aṭṭhakathāsaṃvaṇaṇā passitabbā] ttānaṃ,
upapattiṇca sabbaso;
Asattaṃ sugataṃ buddhaṃ, tamaḥaṃ brūmi brāhmaṇaṃ.
649. “Yassa gatiṃ na jānanti, devā gandhabbamānūsā;
Khīṇāsavaṃ arahantaṃ, tamaḥaṃ brūmi brāhmaṇaṃ.
650. “Yassa pure ca pacchā ca, majjhe ca natthi kiñcanaṃ;
Akiñcanaṃ anādānaṃ, tamaḥaṃ brūmi brāhmaṇaṃ.

651. “Usabhaṃ pavaraṃ vīraṃ, mahesiṃ vijitāvinaṃ;
Anejaṃ nhātakamaṃ buddhaṃ, tamahaṃ brūmi brāhmaṇaṃ.
652. “Pubbenivāsaṃ yo vedi [yo’veti (?) itivuttake 99 aṭṭhakathāsaṃvaṇaṇā passitabbā],
saggāpāyañca passati;
Atha jātikkhayaṃ patto, tamahaṃ brūmi brāhmaṇaṃ.
653. “Samañña hesā lokasmiṃ, nāmagottaṃ pakappitaṃ;
Sammuccā samudāgataṃ, tattha tattha pakappitaṃ.
654. “Dīgharattamanusayitaṃ, diṭṭhigatamaajānataṃ;
Ajānantā no [ajānantā te (aṭṭha.) ma. ni. 2.460] pabruvanti, jātiyā hoti brāhmaṇo.
655. “Na jaccā brāhmaṇo hoti, na jaccā hoti abrahmaṇo;
Kammaṇā brāhmaṇo hoti, kammaṇā hoti abrahmaṇo.
656. “Kassako kammaṇā hoti, sippiko hoti kammaṇā;
Vāṇijo kammaṇā hoti, pessiko hoti kammaṇā.
657. “Coropi kammaṇā hoti, yodhājīvopi kammaṇā;
Yājako kammaṇā hoti, rājāpi hoti kammaṇā.
658. “Evametamaṃ yathābhūtaṃ, kammaṃ passanti paṇḍitā;
Paṭiccasamuppādadassā, kammavipākakovidā.
659. “Kammaṇā vattati loko, kammaṇā vattati pajā;
Kammaṇibandhanā sattā, rathassāṇīva yāyato.
660. “Tapena brahmacariyena, saṃyamena damena ca;
Etena brāhmaṇo hoti, etaṃ brāhmaṇamuttamaṃ.
661. “Tīhi vijjāhi sampanno, santo khīṇapunabbhavo;
Evaṃ vāsetṭha jānāhi, brahmā sakko vijānata”nti.

Evamaṃ vutte, vāsetṭhabhāradvājā māṇavā bhagavantaṃ etadavocaṃ – “abhikkantaṃ, bho gotama... pe... upāsake no bhavaṃ gotamo dhāretu ajjatagge pāṇupete [pāṇupetaṃ (ka.)] saraṇaṃ gate”ti.

Vāsetṭhasuttaṃ navamaṃ niṭṭhitaṃ.

10. Kokālikasuttaṃ

Evamaṃ me suttaṃ – ekaṃ samayaṃ bhagavā sāvatthiyaṃ viharati jetavane anāthapiṇḍikassa ārāme. Atha kho kokāliko bhikkhu yena bhagavā tenupasaṅkami; upasaṅkamitvā bhagavantaṃ abhivādetvā ekamantaṃ nisīdi. Ekamantaṃ nisinna kho kokāliko bhikkhu bhagavantaṃ etadavoca – “pāpicchā, bhante, sāriputtamoggallānā, pāpikānaṃ icchānaṃ vasaṃ gatā”ti.

Evamaṃ vutte, bhagavā kokālikaṃ bhikkhuṃ etadavoca – “mā hevaṃ, kokālika, mā hevaṃ, kokālika! Pasādehi, kokālika, sāriputtamoggallānesu cittaṃ. Pesalā sāriputtamoggallānā”ti.

Dutiyampi kho...pe... tatiyampi kho kokāliko bhikkhu bhagavantaṃ etadavoca – “kiñcāpi me, bhante, bhagavā saddhāyiko paccayiko, atha kho pāpicchāva sāriputtamoggallānā, pāpikānaṃ icchānaṃ

vasaṃ gatā”ti. Tatiyampi kho bhagavā kokālikaṃ bhikkhuṃ etadavoca – “mā hevaṃ, kokālika, mā hevaṃ, kokālika! Pasādehi, kokālika, sārīputtamoggallānesu cittaṃ. Pesalā sārīputtamoggallānā”ti.

Atha kho kokālika bhikkhu uṭṭhāyāsanaṃ bhagavantam abhivādetvā padakkhiṇaṃ katvā pakkāmi. Acirappakkantassa ca kokālikassa bhikkhuno sāsapamattīhi piḷakāhi sabbo kāyo phuṭṭho [phuṭṭho (syā.)] ahoṣi; sāsapamattīyo hutvā muggamattīyo ahesuṃ; muggamattīyo hutvā kaḷāyamattīyo ahesuṃ; kaḷāyamattīyo hutvā kolaṭṭhimattīyo ahesuṃ; kolaṭṭhimattīyo hutvā kolamattīyo ahesuṃ; kolamattīyo hutvā āmalakamattīyo ahesuṃ; āmalakamattīyo hutvā beḷuvasalāṭukamattīyo ahesuṃ; beḷuvasalāṭukamattīyo hutvā billamattīyo ahesuṃ; billamattīyo hutvā pabhijjimsu; pubbañca lohitañca paggharimsu. Atha kho kokālika bhikkhu tenevābādhena kālamakāsi. Kālaṅkato ca kokālika bhikkhu padumaṃ nirayaṃ upapajji sārīputtamoggallānesu cittaṃ āghātetvā.

Atha kho brahmā sahampati abhikkantāya rattiyā abhikkantavaṇṇo kevalakappaṃ jetavanaṃ obhāsetvā yena bhagavā tenupasaṅkami; upasaṅkamitvā bhagavantam abhivādetvā ekamantaṃ aṭṭhāsi. Ekamantaṃ, ṭhito kho brahmā sahampati bhagavantam etadavoca – “kokālika, bhante, bhikkhu kālaṅkato; kālaṅkato ca, bhante, kokālika bhikkhu padumaṃ nirayaṃ upapanno sārīputtamoggallānesu cittaṃ āghātetvā”ti. Idamavoca brahmā sahampati; idaṃ vatvā bhagavantam abhivādetvā padakkhiṇaṃ katvā tatthevantaradhāyi.

Atha kho bhagavā tassā rattiyā accayena bhikkhū āmantesi – “imaṃ, bhikkhave, rattim brahmā sahampati abhikkantāya rattiyā...pe... idamavoca, bhikkhave, brahmā sahampati, idaṃ vatvā maṃ padakkhiṇaṃ katvā tatthevantaradhāyī”ti.

Evaṃ vutte, aññataro bhikkhu bhagavantam etadavoca – “kīvadīghaṃ nu kho, bhante, padume niraye āyuppaṃāṇa”nti? “Dīghaṃ kho, bhikkhu, padume niraye āyuppaṃāṇaṃ; taṃ na sukaraṃ saṅkhātum ettakāni vassāni iti vā ettakāni vassasatāni iti vā ettakāni vassasahassāni iti vā ettakāni vassasatasahassāni iti vā”ti. “Sakkā pana, bhante, upamā [upamaṃ (sī. syā. ka.)] kātu”nti? “Sakkā, bhikkhū”ti bhagavā avoca –

“Seyyathāpi, bhikkhu, vīsatickhāriko kosalako tilavāho; tato puriso vassasatassa vassasatassa accayena ekamekaṃ tilaṃ uddhareyya. Khippataraṃ kho so bhikkhu vīsatickhāriko kosalako tilavāho iminā upakkamena parikkhayaṃ pariyādānaṃ gaccheyya, natveva eko abbudo nirayo. Seyyathāpi, bhikkhu, vīsati abbudā nirayā evameko nirabbudo nirayo. Seyyathāpi, bhikkhu, vīsati nirabbudā nirayā evameko ababo nirayo. Seyyathāpi, bhikkhu, vīsati ababā nirayā evameko ahaho nirayo. Seyyathāpi, bhikkhu, vīsati ahahā nirayā evameko aṭaṭo nirayo. Seyyathāpi, bhikkhu, vīsati aṭaṭā nirayā evameko kumudo nirayo. Seyyathāpi, bhikkhu, vīsati kumudā nirayā evameko sogandhiko nirayo. Seyyathāpi, bhikkhu, vīsati sogandhikā nirayā evameko uppalako nirayo. Seyyathāpi, bhikkhu, vīsati uppalakā nirayā evameko puṇḍarīko nirayo. Seyyathāpi, bhikkhu, vīsati puṇḍarīkā nirayā evameko padumo nirayo. Padumaṃ kho pana bhikkhu nirayaṃ kokālika bhikkhu upapanno sārīputtamoggallānesu cittaṃ āghātetvā”ti. Idamavoca bhagavā, idaṃ vatvāna sugato athāparaṃ etadavoca satthā –

662. “Purisassa hi jātassa, kuṭhārī [kudhārī (ka.)] jāyate mukhe;
Yāya chindati attānaṃ, bālo dubbhāsitaṃ bhaṇaṃ.

663. “Yo nindiyam pasamsati, taṃ vā nindati yo pasamsiyo;
Vicināti mukhena so kalim, kalinā tena sukhaṃ na vindati.

664. “Appamatto ayam kali, yo akkhesu dhanaparājayo;
Sabbassāpi sahāpi attanā, ayameva mahattaro [mahantakaro (sī.)] kali;
Yo sugatesu manam padosaye.

665. “Sataṃ sahaṣṣānaṃ nirabbudānaṃ, chaṭṭiṃsati pañca ca abbudāni [abbudānaṃ (ka.)]; Yamariyagarahī nirayaṃ upeti, vācaṃ manañca paṇidhāya pāpakaṃ.
666. “Abhūtavādī nirayaṃ upeti, yo vāpi katvā na karomicāha; Ubhopi te pecca samā bhavanti, nihīnakammā manujā parattha.
667. “Yo appaduṭṭhassa narassa dussati, suddhassa posassa anaṅgaṇassa; Tameva bālaṃ pacceṭi pāpaṃ, sukhumo rajo paṭivātaṃva khitto.
668. “Yo lobhaguṇe anuyutto, so vacasā paribhāsati aññe; Asaddho kadariyo avadaññū, macchari pesuṇiyaṃ [pesuṇiyasmim (bahūsu)] anuyutto.
669. “Mukhadugga vibhūta anariya, bhūnahu [bhunahata (syā. ka.)] pāpaka dukkaṭakārī; Purisanta kalī avajāta, mā bahubhāṇidha nerayikosi.
670. “Rajamākirasī ahitāya, sante garahasi kibbisakārī; Bahūni duccharitāni caritvā, gacchasi kho papataṃ cirarattaṃ.
671. “Na hi nassati kassaci kammaṃ, eti hataṃ labhateva suvāmi; Dukkhaṃ mando paraloke, attani passati kibbisakārī.
672. “Ayosaṅkusamāhataṭṭhānaṃ, tiṇhadhāramayasūlamupeti; Atha tattaayogūlasannibhaṃ, bhojanamatthi tathā patirūpaṃ.
673. “Na hi vaggu vadanti vadantā, nābhijavanti na tāṇamupenti; Aṅgāre santhate sayanti [senti (sī. syā. pī.)], ginisampajjalitaṃ pavisanti.
674. “Jālena ca onahiyāna, tattha hananti ayomayakuṭebhi [ayomayakūṭehi (sī. syā. pī.)]; Andhaṃva timisamāyanti, taṃ vitatañhi yathā mahikāyo.
675. “Atha lohamayaṃ pana kumbhiṃ, ginisampajjalitaṃ pavisanti; Paccanti hi tāsū cirarattaṃ, agginisamāsu [ginissamāsu (ka.)] samuppilavāte.
676. “Atha pubbalohitamisse, tattha kiṃ paccati kibbisakārī; Yaṃ yaṃ disakaṃ [disataṃ (sī. syā. pī.)] adhiseti, tattha kilissati samphusamāno.
677. “Puḷavāvasathe salilasmim, tattha kiṃ paccati kibbisakārī; Gantuṃ na hi tīrapatthi, sabbasamā hi samantakapallā.
678. “Asipattavanaṃ pana tiṇhaṃ, taṃ pavisanti samucchidagattā; Jivhaṃ balisena gahetvā, ārajayārajayā vihananti.
679. “Atha vetaraṇiṃ pana duggaṃ, tiṇhadhārakhuradhāramupenti; Tattha mandā papatanti, pāpakarā pāpāni karitvā.
680. “Khādanti hi tattha rudante, sāmā sabalā kākolagaṇā ca; Soṇā siṅgālā [sigālā (sī. pī.)] paṭigiddhā [paṭigijjhā (syā. pī.)], kulalā vāyasā ca [kulalā ca vāyasā (?)] vitudanti.
681. “Kicchā vatayaṃ idha vutti, yaṃ jano phusati [passati (sī. syā. pī.)] kibbisakārī; Tasmā idha jīvitasese, kiccakaro siyā naro na cappamajje.

682. “Te gaṇitā vidūhi tilavāhā, ye padume niraye upanītā;
Nahutāni hi koṭiyo pañca bhavanti, dvādasa koṭisatāni punaṅṅā [panayye (ka.)].
683. “Yāva dukhā [dukkhā (sī. syā.), dukkha (pī. ka.)] nirayā idha vuttā, tatthapi tāva ciraṃ
vasitabbaṃ;
Tasmā sucipesalasādhuguṇesu, vācaṃ manañ satataṃ [pakataṃ (syā.)] parirakkhe’’ti.

Kokālikasuttaṃ dasamaṃ niṭṭhitaṃ.

11. Nālakasuttaṃ

684. Ānandajāte tidasagaṇe patīte, sakkañca indaṃ sucivasane ca deve;
Dussaṃ gahetvā atiriva thomayante, asito isi addasa divāvihāre.
685. Disvāna deve muditamane udagge, cittiṃ karitvāna idamavoca [karitvā idamavocāsi (sī.)]
tattha;
“Kiṃ devasaṅgho atiriva kalyarūpo, dussaṃ gahetvā ramayatha [bhamayatha (sī.)] kiṃ
paṭicca.
686. “Yadāpi āsī asurehi saṅgamo, jayo surānaṃ asurā parājītā.
Tadāpi netādiso lomahaṃsano, kimabbhutaṃ daṭṭhu marū pamoditā.
687. “Seḷenti gāyanti ca vādayanti ca, bhujāni poṭenti [poṭenti (sī. pī.), pothenti (ka.)] ca
naccayanti ca;
Pucchāmi vohaṃ merumuddhavāsine, dhunātha me saṃsayañ khippa mārisā’’.
688. “So bodhisatto ratanavaro atulyo, manussaloke hitasukhatthāya [hitasukhatāya (sī. syā. pī.)]
jāto;
Sakyāna gāme janapade lumbineyye, tenamha tuṭṭhā atiriva kalyarūpā.
689. “So sabbasattuttamo aggapuggalo, narāsabho sabbapajānamuttamo;
Vattessati cakkamisivhaye vane, nadaṃva sīho balavā migābhibhū’’.
690. Taṃ saddaṃ sutvā turitamavasarī so, suddhodanassa tada bhavanaṃ upāvisi [upāgami (sī.
pī.)];
Nisajja tattha idamavocāsi sakye, “kuhiṃ kumāro ahamapi daṭṭhukāmo’’.
691. Tato kumāraṃ jalitamiva suvaṇṇañ, ukkā mukheva sukusalasampahaṭṭhaṃ [sukusalena
sampaḥaṭṭhaṃ (ka.)];
Daddallamānaṃ [daddaḥamānaṃ (ka.)] siriya anomavaṇṇañ, dassesu puttaṃ asitavhayassa
sakyā.
692. Disvā kumāraṃ sikhimiva pajjalantaṃ, tārāsabhaṃva nabhasigamaṃ visuddhaṃ;
Sūriyaṃ tapantaṃ saradarivabbhamuttaṃ, ānandajāto vipulamalattha pītiṃ.
693. Anekasākhañca sahasamaṇḍalaṃ, chattaṃ marū dhārayumantalikkhe;
Suvaṇṇadaṇḍā vītipatanti cāmarā, na dissare cāmarachattagāhakā.
694. Disvā jaṭi kaṇhasirivhaya isi, suvaṇṇanikkhaṃ viya paṇḍukambale;
Setaṅga chattaṃ dhariyanta [dhāriyanta (syā.), dhārayantaṃ (sī. ka.)] muddhani, udaggacitto
sumano paṭiggāhe.

695. Paṭiggahetvā pana sakyapuṅgavaṃ, jigīsato [jigimsako (sī. syā. pī.)] lakkhaṇamantapāragū;
Pasannacitto giramabbhudīrayi, “anuttarāyaṃ dvipadānamuttamo” [dīpadānamuttamo (sī. syā. pī.)].
696. Athattano gamanamanussaranto, akalyarūpo gaḷayati assukāni;
Disvāna sakyā isimavocum rudantaṃ,
“No ce kumāre bhavissati antarāyo”.
697. Disvāna sakyē isimavoca akalye, “nāhaṃ kumāre ahitamanussarāmi;
Na cāpimassa bhavissati antarāyo, na orakāyaṃ adhimānasā [adhimanasā (sī. syā.)] bhavātha.
698. “Sambodhiyaggaṃ phusissatāyaṃ kumāro, so dhammacakkaṃ paramavisuddhadassī;
Vattessatāyaṃ bahujanahitānukampī, vitthārikassa bhavissati brahmacariyaṃ.
699. “Mamañca āyu na ciramidhāvaseso, athantarā me bhavissati kālakiriya;
Sohaṃ na sossaṃ [sussaṃ (sī. syā.)] asamadhurassa dhammaṃ, tenamhi aṭṭo byasanaṃgato
aghāvi”.
700. So sākiyānaṃ vipulaṃ janetvā pītiṃ, antepurambhā niggamā [niragamā (sī. syā.), nigamā (ka. sī.), niragama (pī.)] brahmacārī;
So bhāgineyyaṃ sayāṃ anukampamāno, samādapesi asamadhurassa dhamme.
701. “Buddhoti ghosaṃ yada [yadi (syā. ka.)] parato suṇāsi, sambodhipatto vivarati
dhammamaggaṃ;
Gantvāna tattha samayaṃ paripucchamāno [sayāṃ paripucchiyāno (sī. syā.)], carassu tasmim
bhagavati brahmacariyaṃ”.
702. Tenānusiṭṭho hitamanena tādinā, anāgate paramavisuddhadassinā;
So nālako upacitapuññañcayo, jinaṃ patikkhaṃ [pati + ikkhaṃ = patikkhaṃ] parivasi
rakkhitindriyo.
703. Sutvāna ghosaṃ jinavaracakkavattane, gantvāna disvā isinisabhaṃ pasanno;
Moneyyasetṭhaṃ munipavaraṃ apucchi, samāgate asitāvhayassa sāsaneti.
- Vatthugāthā niṭṭhitā.
704. “Aññātametaṃ vacanaṃ, asitassa yathātathaṃ;
Taṃ taṃ gotama pucchāmi, sabbadhammāna pārugaṃ.
705. “Anagāriyupetassa, bhikkhācariyaṃ jigīsato;
Muni pabrūhi me puṭṭho, moneyyaṃ uttamaṃ padaṃ”.
706. “Moneyyaṃ te upaññissaṃ, (iti bhagavā) dukkaraṃ durabhisambhavaṃ;
Handa te naṃ pavakkhāmi, santhambhassu daḷho bhava.
707. “Samānabhāgaṃ kubbetha, gāme akkuṭṭhavanditaṃ;
Manopadosaṃ rakkheyya, santo anuṇṇato care.
708. “Uccāvacaṃ niccharanti, dāye aggisikhūpamā;
Nāriyo muniṃ palobhenti, tāsū taṃ mā palobhayuṃ.
709. “Virato methunā dhammā, hitvā kāme paropare [parovare (sī. pī.), varāvare (syā.)];

Aviruddho asāratto, pānesu tasathāvare.

710. “Yathā ahaṃ tathā ete, yathā ete tathā ahaṃ;
Attānaṃ upamaṃ katvā, na haneyya na ghātaye.
711. “Hitvā icchaṅca lobhaṅca, yattha satto puthujjano;
Cakkhumā paṭipajjeyya, tareyya narakamaṃ imaṃ.
712. “Īnūdarō mitāhāro, appicchassa alolupo;
Sadā [sa ve (pī.)] icchāya nicchāto, aniccho hoti nibbuto.
713. “Sa piṇḍacāraṃ caritvā, vanantamabhihāraye;
Upaṭṭhito rukkhamaṃ asmim, āsanūpagato muni.
714. “Sa jhānapasuto dhīro, vanante ramito siyā;
Jhāyetha rukkhamaṃ asmim, attānamabhitosayaṃ.
715. “Tato ratyā vivasāne [vivasane (sī. syā. pī.)], gāmantamabhihāraye;
Avhānaṃ nābhinandeyya, abhihāraṅca gāmato.
716. “Na muni gāmamāgamma, kulesu sahasā care;
Ghāsesanaṃ chinnakatho, na vācaṃ payutaṃ bhaṇe.
717. “Alatthaṃ yadidaṃ sādhu, nālatthaṃ kusalaṃ iti;
Ubhayeneva so tādī, rukkhamaṃvupanivattati [rukkhamaṃvu’pativattati (ka.), rukkhamaṃva
upātivattati (syā.)].
718. “Sa pattapāṇi vicaranto, amūgo mūgasammato;
Appaṃ dānaṃ na hīleyya, dātāraṃ nāvajāniyā.
719. “Uccāvacaṃ hi paṭipadā, samaṇena pakāsītā;
Na pārāṃ diguṇaṃ yanti, nayidaṃ ekaguṇaṃ mutaṃ.
720. “Yassa ca visatā natthi, chinnaśotassa bhikkhuno;
Kiccākiccappahīnassa, pariḷāho na vijjati.
721. “Moneyyaṃ te upaṅṅissaṃ, khuradhārūpamo bhava;
Jivhāya tālumāhacca, udare saṅṅato siyā.
722. “Alīnacitto ca siyā, na cāpi bahu cintaye;
Nirāmagandho asito, brahmacariyaparāyaṇo.
723. “Ekāsanassa sikkhetha, samaṇūpāsanaśca;
Ekattaṃ monamakkhātāṃ, eko ce abhiraśmissasi;
Atha bhāhisi [bhāsihi (sī. syā. pī.)] dasadisā.
724. “Sutvā dhīraṅgaṃ nigghosaṃ, jhāyīnaṃ kāmacāgīnaṃ;
Tato hiraṅga saddhaṅca, bhīyyo kubbetha māmaśko.
725. “Taṃ nadīhi vijānātha, sobbhesu padaresu ca;
Saṅantā yanti kusobbhā [kussubbhā (sī.)], tuṅhīyanti mahodadhī.

726. “Yadūnakam taṃ saṇati, yaṃ pūraṃ santameva taṃ;
Aḍḍhakumbhūpamo bālo, rahado pūrova paṇḍito.
727. “Yaṃ samaṇo bahuṃ bhāsati, upetaṃ atthasañhitaṃ;
Jānaṃ so dhammaṃ deseti, jānaṃ so bahu bhāsati.
728. “Yo ca jānaṃ saṃyatatto, jānaṃ na bahu bhāsati;
Sa munī monamarahati, sa munī monamajjhagā”’ti.

Nālakasuttaṃ ekādasamaṃ niṭṭhitaṃ.

12. Dvayatānupassanāsuttaṃ

Evamaṃ me suttaṃ – ekaṃ samayaṃ bhagavā sāvatthiyaṃ viharati pubbārāme migāramātupāsāde. Tena kho pana samayena bhagavā tadahuposathe pannarase puṇṇāya puṇṇamāya rattiyā bhikkhusaṅghaparivuto abbhokāse nisinno hoti. Atha kho bhagavā tuṇhībhūtaṃ tuṇhībhūtaṃ bhikkhusaṅghaṃ anuviloketvā bhikkhū āmantesi –

“Ye te, bhikkhave, kusalā dhammā ariyā niyyānikā sambodhagāmino, tesam vo, bhikkhave, kusalānaṃ dhammānaṃ ariyānaṃ niyyānikānaṃ sambodhagāmīnaṃ kā upanisā savanāyā’ti iti ce, bhikkhave, pucchitāro assu, te evamassu vacanīyā – ‘yāvadeva dvayatānaṃ dhammānaṃ yathābhūtaṃ ñāṇāyā’ti. Kiñca dvayatānaṃ vadetha?

(1) “Idaṃ dukkhaṃ, ayaṃ dukkhasamudayoti ayamekānupassanā. Ayaṃ dukkhanirodho, ayaṃ dukkhanirodhagāminī paṭipadāti, ayaṃ dutiyānupassanā. Evamaṃ sammā dvayatānupassino kho, bhikkhave, bhikkhuno appamattassa ātāpino pahitattassa viharato dvinnaṃ phalānaṃ aññataraṃ phalaṃ paṭikaṅkhaṃ – diṭṭheva dhamme aññā, satī vā upādisese anāgāmitā”’ti.

Idamavoca bhagavā. Idaṃ vatvāna sugato athāparaṃ etadavoca satthā –

729. “Ye dukkhaṃ nappajānanti, atho dukkhassa sambhavaṃ;
Yattha ca sabbaso dukkhaṃ, asesam uparujjhati;
Tañca maggaṃ na jānanti, dukkhūpasamagāminam.
730. “Cetovimuttihīnā te, atho paññāvimuttiyā;
Abhabbā te antakiriyāya, te ve jātijarūpagā.
731. “Ye ca dukkhaṃ pajānanti, atho dukkhassa sambhavaṃ;
Yattha ca sabbaso dukkhaṃ, asesam uparujjhati;
Tañca maggaṃ pajānanti, dukkhūpasamagāminam.
732. “Cetovimuttisampannā, atho paññāvimuttiyā;
Bhabbā te antakiriyāya, na te jātijarūpagā”’ti.

(2) “Siyā aññenapi pariyāyena sammā dvayatānupassanā’ti, iti ce, bhikkhave, pucchitāro assu; ‘siyā’ tisso vacanīyā. Kathañca siyā? Yaṃ kiñci dukkhaṃ sambhoti sabbam upadhipaccayāti, ayamekānupassanā. Upadhīnaṃ tveva asesavirāganirodhā natthi dukkhassa sambhavoti, ayaṃ dutiyānupassanā. Evamaṃ sammā...pe... athāparaṃ etadavoca satthā –

733. “Upadhīnidānā pabhavanti dukkhā, ye keci lokasmimanekarūpā;
Yo ve avidvā upadhiṃ karoti, punappunaṃ dukkhamupeti mando;

Tasmā pajānaṃ upadhiṃ na kayirā, dukkhassa jātipphavānupassī’ ti.

(3) “Siyā aññenapi pariyāyena sammā dvayatānupassanā’ ti, iti ce, bhikkhave, pucchitāro assu; ‘siyā’ tisso vacanīyā. Kathañca siyā? Yaṃ kiñci dukkhaṃ sambhoti sabbhaṃ avijjāpaccayāti, ayamekānupassanā. Avijjāya tveva asesavirāganirodhā natthi dukkhassa sambhavoti, yaṃ dutiyānupassanā. Evaṃ sammā...pe... athāparaṃ etadavoca satthā –

734. “Jātimaraṇasaṃsāraṃ, ye vajanti punappunaṃ;
Itthabhāvaññathābhāvaṃ, avijjāyeva sā gati.

735. “Avijjā hāyaṃ mahāmoho, yenidaṃ saṃsitaṃ ciraṃ;
Vijjāgatā ca ye sattā, na te gacchanti [nāgacchanti (sī. pī.)] punabbhava’ nti.

(4) “Siyā aññenapi...pe... kathañca siyā? Yaṃ kiñci dukkhaṃ sambhoti sabbhaṃ saṅkhārapaccayāti, ayamekānupassanā. Saṅkhārānaṃ tveva asesavirāganirodhā natthi dukkhassa sambhavoti, yaṃ dutiyānupassanā. Evaṃ sammā...pe... athāparaṃ etadavoca satthā –

736. “Yaṃ kiñci dukkhaṃ sambhoti, sabbhaṃ saṅkhārapaccayā;
Saṅkhārānaṃ nirodhena, natthi dukkhassa sambhavo.

737. “Etamādīnavaṃ ñatvā, dukkhaṃ saṅkhārapaccayā;
Sabbasaṅkhārasamathā, saññānaṃ uparodhanā;
Evaṃ dukkhakkhaya hoti, etaṃ ñatvā yathātathaṃ.

738. “Sammaddasā vedaguno, sammadaññāya paṇḍitā;
Abhibhuyya mārasamyogaṃ, na gacchanti [nāgacchanti (sī. pī.)] punabbhava’ nti.

(5) “Siyā aññenapi...pe... kathañca siyā? Yaṃ kiñci dukkhaṃ sambhoti sabbhaṃ viññāpaccayāti, ayamekānupassanā. Viññāṇassa tveva asesavirāganirodhā natthi dukkhassa sambhavoti, yaṃ dutiyānupassanā. Evaṃ sammā...pe... athāparaṃ etadavoca satthā –

739. “Yaṃ kiñci dukkhaṃ sambhoti, sabbhaṃ viññāpaccayā;
Viññāṇassa nirodhena, natthi dukkhassa sambhavo.

740. “Etamādīnavaṃ ñatvā, dukkhaṃ viññāpaccayā;
Viññāṇūpasamā bhikkhu, nicchāto parinibbuto’ ti.

(6) “Siyā aññenapi...pe... kathañca siyā? Yaṃ kiñci dukkhaṃ sambhoti sabbhaṃ phassapaccayāti, ayamekānupassanā. Phassassa tveva asesavirāganirodhā natthi dukkhassa sambhavoti, yaṃ dutiyānupassanā. Evaṃ sammā...pe... athāparaṃ etadavoca satthā –

741. “Tesaṃ phassaparetānaṃ, bhavasotānusāriṇaṃ;
Kummaggaṇipannānaṃ, ārā saṃyojanakkhaya.

742. “Ye ca phassaṃ pariññāya, aññāyupasame [paññāya upasame (syā.)] ratā;
Te ve phassābhisamayā, nicchātā parinibbutā’ ti.

(7) “Siyā aññenapi...pe... kathañca siyā? Yaṃ kiñci dukkhaṃ sambhoti sabbhaṃ vedanāpaccayāti, ayamekānupassanā. Vedanānaṃ tveva asesavirāganirodhā natthi dukkhassa sambhavoti, yaṃ dutiyānupassanā. Evaṃ sammā...pe... athāparaṃ etadavoca satthā –

743. “Sukhaṃ vā yadi vā dukkhaṃ, adukkhamasukhaṃ saha;
Ajjhattañca bahiddhā ca, yaṃ kiñci atthi veditaṃ.

744. “Etaṃ dukkhanti ñatvāna, mosadhammaṃ palokinaṃ [palokitaṃ (sī.)];
Phussa phussa vayaṃ passaṃ, evaṃ tattha vijānati [virajjati (ka. sī.)];
Vedanānaṃ khayā bhikkhu, nicchāto parinibbuto”ti.

(8) “Siyā aññenapi...pe... kathañca siyā? Yaṃ kiñci dukkhaṃ sambhoti sabbhaṃ taṇhāpaccayāti, ayamekānupassanā. Taṇhāya tveva asesavirāganirodhā natthi dukkhassa sambhavoti, yaṃ dutiyānupassanā. Evaṃ sammā...pe... athāparaṃ etadavoca satthā –

745. “Taṇhādutiyo puriso, dīghamaddhāna saṃsaram;
Itthabhāvaññathābhāvaṃ, saṃsāraṃ nātivattati.

746. “Etamādīnavaṃ ñatvā, taṇhaṃ [taṇhā (bahūsu) itivuttake 15 passitabbaṃ] dukkhassa sambhavaṃ;
Vītataṇho anādāno, sato bhikkhu paribbaje”ti.

(9) “Siyā aññenapi...pe... kathañca siyā? Yaṃ kiñci dukkhaṃ sambhoti sabbhaṃ upādānapaccayāti, ayamekānupassanā. Upādānaṃ [upādānassa (syā. ka.)] tveva asesavirāganirodhā natthi dukkhassa sambhavoti, yaṃ dutiyānupassanā. Evaṃ sammā...pe... athāparaṃ etadavoca satthā –

747. “Upādānapaccayā bhavo, bhūto dukkhaṃ nigacchati;
Jātassa maraṇaṃ hoti, eso dukkhassa sambhavo.

748. “Tasmā upādānakkhaya, sammadaññāya paṇḍitā;
Jātikkhayaṃ abhiññāya, na gacchanti punabbhava”nti.

(10) “Siyā aññenapi...pe... kathañca siyā? Yaṃ kiñci dukkhaṃ sambhoti sabbhaṃ ārambhapaccayāti, ayamekānupassanā. Ārambhānaṃ tveva asesavirāganirodhā natthi dukkhassa sambhavoti, yaṃ dutiyānupassanā. Evaṃ sammā...pe... athāparaṃ etadavoca satthā –

749. “Yaṃ kiñci dukkhaṃ sambhoti, sabbhaṃ ārambhapaccayā;
Ārambhānaṃ nirodhena, natthi dukkhassa sambhavo.

750. “Etamādīnavaṃ ñatvā, dukkhaṃ ārambhapaccayā;
Sabbārambhaṃ paṭinissajja, anārambhe vimuttino.

751. “Ucchinnabhavataṇhassa, santacittassa bhikkhuno;
Vikkhīṇo [vitiṇṇo (sī.)] jātisaṃsāro, natthi tassa punabbhavo”ti.

(11) “Siyā aññenapi...pe... kathañca siyā? Yaṃ kiñci dukkhaṃ sambhoti sabbhaṃ āhārapaccayāti, ayamekānupassanā. Āhārānaṃ tveva asesavirāganirodhā natthi dukkhassa sambhavoti, yaṃ dutiyānupassanā. Evaṃ sammā...pe... athāparaṃ etadavoca satthā –

752. “Yaṃ kiñci dukkhaṃ sambhoti, sabbhaṃ āhārapaccayā;
Āhārānaṃ nirodhena, natthi dukkhassa sambhavo.

753. “Etamādīnavaṃ ñatvā, dukkhaṃ āhārapaccayā;
Sabbāhāraṃ pariññāya, sabbāhāramanissito.

754. “Ārogyaṃ sammadaññāya, āsavānaṃ parikkhayā;
Saṅkhāya sevī dhammaṭṭho, saṅkhyāṃ [saṅkhaṃ (sī. pī.)] nopeti vedagū”ti.

(12) “Siyā aññenapi...pe... kathaṅca siyā? Yaṃ kiñci dukkhaṃ sambhoti sabbāṃ iñjitapaccayāti, ayamekānupassanā. Iñjitānaṃ tveva asesavirāganirodhā natthi dukkhassa sambhavoti, yaṃ dutiyānupassanā. Evaṃ sammā...pe... athāparaṃ etadavoca satthā –

755. “Yaṃ kiñci dukkhaṃ sambhoti, sabbāṃ iñjitapaccayā;
Iñjitānaṃ nirodhena, natthi dukkhassa sambhavo.

756. “Etamādīnavaṃ ñatvā, dukkhaṃ iñjitapaccayā;
Tasmā hi ejaṃ vossajja, saṅkhāre uparundhiya;
Anejo anupādāno, sato bhikkhu paribbaje”ti.

(13) “Siyā aññenapi...pe... kathaṅca siyā? Nissitassa calitaṃ hotīti, ayamekānupassanā. Anissito na calatīti, yaṃ dutiyānupassanā. Evaṃ sammā...pe... athāparaṃ etadavoca satthā –

757. “Anissito na calati, nissito ca upādiyaṃ;
Itthabhāvaññathābhāvaṃ, saṃsāraṃ nātivattati.

758. “Etamādīnavaṃ ñatvā, nissayesu mahabbhayaṃ;
Anissito anupādāno, sato bhikkhu paribbaje”ti.

(14) “Siyā aññenapi...pe... kathaṅca siyā? Rūpehi, bhikkhave, arūpā [ārūppā (sī. pī.)] santatarāti, ayamekānupassanā. Arūpehi nirodho santataroti, yaṃ dutiyānupassanā. Evaṃ sammā...pe... athāparaṃ etadavoca satthā –

759. “Ye ca rūpūpagā sattā, ye ca arūpaṭṭhāyino [ārūppavāsino (sī. pī.)];
Nirodhaṃ appajānantā, āgantāro punabbhavaṃ.

760. “Ye ca rūpe pariññāya, arūpesu asaṅghitā [susaṅghitā (sī. syā. pī.)];
Nirodhe ye vimuccanti, te janā maccuhāyino”ti.

(15) “Siyā aññenapi...pe... kathaṅca siyā? Yaṃ, bhikkhave, sadevakassa lokassa samārakassa sabrahmakassa sassamaṇabrāhmaṇiyā pajāya sadevamanussāya idaṃ saccanti upanijjhāyitaṃ tadamariyānaṃ etaṃ musāti yathābhūtaṃ sammappaññāya sudiṭṭhaṃ, ayamekānupassanā. Yaṃ, bhikkhave, sadevakassa...pe... sadevamanussāya idaṃ musāti upanijjhāyitaṃ, tadamariyānaṃ etaṃ saccanti yathābhūtaṃ sammappaññāya sudiṭṭhaṃ, yaṃ dutiyānupassanā. Evaṃ sammā...pe... athāparaṃ etadavoca satthā –

761. “Anattani attamāniṃ [attamānī (syā.), attamānaṃ (pī. ka.)], passa lokaṃ sadevakaṃ;
Niviṭṭhaṃ nāmarūpasmiṃ, idaṃ saccanti maññati.

762. “Yena yena hi maññanti, tato taṃ hoti aññathā;
Tañhi tassa musā hoti, mosadhammañhi itturaṃ.

763. “Amosadhammaṃ nibbānaṃ, tadariyā saccato vidū;
Te ve saccābhisamayā, nicchātā parinibbutā”ti.

(16) “Siyā aññenapi pariyāyena sammā dvayatānupassanā”ti, iti ce, bhikkhave, pucchitāro assu; ‘siyā’tissu vacanīyā. Kathaṅca siyā? Yaṃ, bhikkhave, sadevakassa lokassa samārakassa sabrahmakassa

sassamaṇabrāhmaṇiyā pajāya sadevamanussāya idaṃ sukhanti upanijjhāyitaṃ, tadamariyānaṃ etaṃ dukkhanti yathābhūtaṃ sammappaññāya sudiṭṭhaṃ, ayamekānupassanā. Yaṃ, bhikkhave, sadevakassa...pe... sadevamanussāya idaṃ dukkhanti upanijjhāyitaṃ tadamariyānaṃ etaṃ sukhanti yathābhūtaṃ sammappaññāya sudiṭṭhaṃ, ayaṃ dutiyānupassanā. Evaṃ sammā dvayatānupassino kho, bhikkhave, bhikkhuno appamattassa ātāpino pahitattassa viharato dvinnaṃ phalānaṃ aññataraṃ phalaṃ pāṭikaṅkhaṃ – diṭṭheva dhamme aññā, sati vā upādisese anāgāmitāti. Idamavoca bhagavā. Idam vadvāna sugato athāparaṃ etadvoca satthā –

764. “Rūpā saddā rasā gandhā, phassā dhammā ca kevalā;
Iṭṭhā kantā manāpā ca, yāvatatthīti vuccati.
765. “Sadevakassa lokassa, ete vo sukhasammatā;
Yattha cete nirujjhanti, taṃ nesaṃ dukkhasammatāṃ.
766. “Sukhanti diṭṭhamariyehi, sakkāyassuparodhanaṃ;
Paccanīkamidaṃ hoti, sabbalokena passataṃ.
767. “Yaṃ pare sukhato āhu, tadariyā āhu dukkhato;
Yaṃ pare dukkhato āhu, tadariyā sukhato vidū.
768. “Passa dhammaṃ durājānaṃ, sampamūlhetthavidvasu [[sampamūlhettha avidvasu \(sī. pī.\)](#),
[sammūlhettha avidvasu \(?\)](#)];
Nivutānaṃ tamo hoti, andhakāro apassataṃ.
769. “Satañca vivaṭaṃ hoti, āloko passatāmiva;
Santike na vijānanti, maggā dhammassa kovidā.
770. “Bhavarāgaparetehi, bhavasotānusāribhi;
Māradheyyānupannehi, nāyaṃ dhammo susambudho.
771. “Ko nu aññatramariyehi, padaṃ sambuddhumarahati;
Yaṃ padaṃ sammadaññāya, parinibbanti anāsavā’ ti.

Idamavoca bhagavā. Attamanā te bhikkhū bhagavato bhāsitaṃ abhinanduntī. Imasmiṃ ca [[imasmiṃ kho \(sī.\)](#)] pana veyyākaraṇasmiṃ bhaññamāne saṭṭhimattānaṃ bhikkhūnaṃ anupādāya āsavehi cittāni vimuccisūti.

Dvayatānupassanāsuttaṃ dvādasamaṃ niṭṭhitaṃ.

Tassuddānaṃ –

Saccaṃ upadhi avijjā ca, saṅkhāre viññāṇapañcamaṃ;
Phassavedaniyā taṇhā, upādānārambhaāhārā;
Iñjitaṃ calitaṃ rūpaṃ, saccaṃ dukkhena soḷasāti.

Mahāvaggo tatiyo niṭṭhito.

Tassuddānaṃ –

Pabbajjā ca padhānañca, subhāsitañca sundari;
Māghasuttaṃ sabhiyo ca, selo sallañca vuccati.

Vāseṭṭho cāpi kokāli, nālako dvayatānupassanā;
Dvādasetāni suttāni, mahāvaggoti vuccatīti.

4. Aṭṭhakavaggo

1. Kāmasuttam

772. Kāmaṃ kāmayamānassa, tassa ce taṃ samijjhati;
Addhā pītimano hoti, laddhā macco yadicchati.
773. Tassa ce kāmayānassa [kāmayamānassa (ka.)], chandajātassa jantuno;
Te kāmā parihāyanti, sallaviddhova ruppati.
774. Yo kāme parivajjeti, sappasseva padā siro;
Somaṃ [so imaṃ (sī. pī.)] visattikaṃ loke, sato samativattati.
775. Khettaṃ vatthuṃ hiraññaṃ vā, gavassaṃ [gavāssaṃ (sī. syā. pī.)] dāsaporisaṃ;
Thiyo bandhū puthu kāme, yo naro anugijjhati.
776. Abalā naṃ balīyanti, maddantenam parissayā;
Tato naṃ dukkhamanveti, nāvaṃ bhinnamivodakaṃ.
777. Tasmā jantu sadā sato, kāmāni parivajjaye;
Te pahāya tare oghaṃ, nāvaṃ sitvāva [siñcitvā (sī.)] pārāgūti.

Kāmasuttam paṭhamam niṭṭhitam.

2. Guhaṭṭhakasuttam

778. Satto gubhāyaṃ bahunābhichanno, tiṭṭham naro mohanasmiṃ pagāḷho;
Dūre vivekā hi tathāvidho so, kāmā hi loke na hi suppahāyā.
779. Icchānidānā bhavasātabaddhā, te duppamuñcā na hi aññaṃokkhā;
Pacchā pure vāpi apekkhamānā, imeva kāme purimeva jappaṃ.
780. Kāmesu gidhā pasutā pamūḷhā, avadāniyā te visame nivīṭṭhā;
Dukkhūpanītā paridevayanti, kiṃsū bhavissāma ito cutāse.
781. Tasmā hi sikkhetha idheva jantu, yaṃ kiñci jañña visamanti loke;
Na tassa hetū visamaṃ careyya, appañhidaṃ jīvitamāhu dhīrā.
782. Passāmi loke pariphandaṃānaṃ, pajam imaṃ taṇhagataṃ bhavesu;
Hīnā narā maccumukhe lapanti, avītataṇhāse bhavābhavesu.
783. Mamāyite passatha phandaṃāne, maccheva appodake khīṇasote;
Etampi disvā amamo careyya, bhavesu āsattimakubbamāno.
784. Ubhosu antesu vineyya chandaṃ, phassaṃ pariññāya anānugiddho;
Yadattagarahī tadakubbamāno, na lippatī [na limpatī (syā. ka.)] diṭṭhasutesu dhīro.
785. Saññaṃ pariññā vitareyya oghaṃ, pariggahesu muni nopalitto;

Abbūḷhasallo caramappamatto, nāsīsati [nāsimsati (sī. syā. pī.)] lokamimaṃ parañcāti.

Guhaṭṭhakasuttaṃ dutiyaṃ niṭṭhitaṃ.

3. Duṭṭhaṭṭhakasuttaṃ

786. Vadanti ve duṭṭhamanāpi eke, athopi ve saccamanā vadanti;
Vādañca jātaṃ muni no upeti, tasmā munī natthi kuliñci.
787. Sakañhi diṭṭhiṃ kathamaccayeyya, chandānunīto ruciyā nivīṭṭho;
Sayam samattāni pakubbamāno, yathā hi jāneyya tathā vadeyya.
788. Yo attano sīlavatāni jantu, anānupuṭṭhova paresa [parassa (ka.)] pāva [pāvā (sī. syā. pī.)];
Anariyadhammaṃ kusalā tamāhu, yo ātumānaṃ sayameva pāva.
789. Santo ca bhikkhu abhinibbutatto, itihanti sīlesu akatthamāno;
Tamariyadhammaṃ kusalā vadanti, yassussadā natthi kuliñci loke.
790. Pakappitā sañkhatā yassa dhammā, purakkhatā [purekkhatā (sī.)] santi avīvadātā;
Yadattani passati ānisamsaṃ, taṃ nissito kuppapaṭicca santiṃ.
791. Diṭṭhīnivesā na hi svātivattā, dhammesu niccheyya samuggahītaṃ;
Tasmā naro tesu nivesanesu, nirassati ādiyaṭi ca dhammaṃ.
792. Dhonassa hi natthi kuliñci loke, pakappitā diṭṭhi bhavābhavesu;
Māyañca mānañca pahāya dhono, sa kena gaccheyya anūpayo so.
793. Upayo hi dhammesu upeti vādaṃ, anūpayam kena kathaṃ vadeyya;
Attā nirattā [attaṃ nirattaṃ (bahūsu)] na hi tassa atthi, adhosi so diṭṭhimidheva sabbanti.

Duṭṭhaṭṭhakasuttaṃ tatiyaṃ niṭṭhitaṃ.

4. Suddhaṭṭhakasuttaṃ

794. Passāmi suddham paramaṃ arogaṃ, diṭṭhena saṃsuddhi narassa hoti;
Evābhijānaṃ [etābhijānaṃ (sī. pī.)] paramanti ñatvā, suddhānupassīti pacceṭi ñāṇaṃ.
795. Diṭṭhena ce suddhi narassa hoti, ñāṇena vā so pajahāti dukkhaṃ;
Aññaṇa so sujjhati sopadhīko, diṭṭhī hi naṃ pāva tathā vadānaṃ.
796. Na brāhmaṇo aññato suddhimāha, diṭṭhe sute sīlavate mute vā;
Puñña ca pāpe ca anūpalitto, attañjaho nayidha pakubbamāno.
797. Purimaṃ pahāya aparaṃ sitāse, ejaṇugā te na taranti saṅgaṃ;
Te uggahāyanti nirassajanti, kapīva sākhaṃ pamuñcaṃ gahāyaṃ [pamukhaṃ gahāya (syā.),
pamuñca gahāya (ka.)].
798. Sayam samādāya vatāni jantu, uccāvacaṃ gacchati saññasatto;
Vidvā ca vedehi samecca dhammaṃ, na uccāvacaṃ gacchati bhūripaṇṇo.
799. Sa sabbadhammesu visenibhūto, yaṃ kiñci diṭṭhaṃ va sutam mutam vā;

Tameva dassiṃ vivaṭaṃ carantaṃ, kenīdha lokasmi vikappayeyya.

800. Na kappayanti na purekkharonti, accantasuddhīti na te vadanti;
Ādānaganthaṃ gathitaṃ visajja, āsaṃ na kubbanti kuhiñci loke.
801. Sīmātigo brāhmaṇo tassa natthi, ñatvā va disvā va [ñatvā ca disvā ca (ka. sī. ka.)]
samuggahītaṃ;
Na rāgarāgī na virāgaratto, tassīdha natthī paramuggahītanti.

Suddhaṭṭhakasuttaṃ catutthaṃ niṭṭhitaṃ.

5. Paramaṭṭhakasuttaṃ

802. Paramanti diṭṭhīsu paribbasāno, yaduttari kurute jantu loke;
Hīnāti aññe tato sabbamāha, tasmā vivādāni avītivatto.
803. Yadattanī passati ānisaṃsaṃ, diṭṭhe sute sīlavate [sīlabbate (syā.)] mute vā;
Tadeva so tattha samuggahāya, nihīnato passati sabbamaññaṃ.
804. Taṃ vāpi ganthaṃ kusalā vadanti, yaṃ nissito passati hīnamaññaṃ;
Tasmā hi diṭṭhaṃ va suttaṃ mutaṃ vā, sīlabbatā bhikkhu na nissayeyya.
805. Diṭṭhimpi lokasmiṃ na kappayeyya, ñāṇena vā sīlavatena vāpi;
Samoti attānamanūpaneyya, hīno na maññetha visesi vāpi.
806. Attaṃ pahāya anupādiyāno, ñāṇepi so nissayaṃ no karoti;
Sa ve viyattesu [vīyuttetu (sī. aṭṭha.), dviyattetu (ka.)] na vaggasārī, diṭṭhimpi [diṭṭhimapi
(ka.)] so na pacceti kiñci.
807. Yassūbhayante pañidhīdha natthi, bhavābhavāya idha vā huraṃ vā;
Nīvesanā tassa na santi keci, dhammesu niccheyya samuggahītaṃ.
808. Tassīdha diṭṭhe va sute mute vā, pakappitā natthi aṇūpi saññā;
Taṃ brāhmaṇaṃ diṭṭhimanādiyānaṃ, kenīdha lokasmiṃ vikappayeyya.
809. Na kappayanti na purekkharonti, dhammāpi tesāṃ na paṭicchitāse;
Na brāhmaṇo sīlavatena neyyo, pāraṅgato na pacceti tādīti.

Paramaṭṭhakasuttaṃ pañcamaṃ niṭṭhitaṃ.

6. Jarāsuttaṃ

810. Appaṃ vata jīvitaṃ idaṃ, oraṃ vassasatāpi miyyati [mīyati (sī. aṭṭha.)];
Yo cepi aticca jīvati, atha kho so jarasāpi miyyati.
811. Socanti janā mamāyite, na hi santi [na hi santā (sī.), na hī santi (katthaci)] niccā pariggahā;
Vinābhāvasantamevidaṃ, iti disvā nāgāramāvase.
812. Maraṇenapi taṃ pahīyati [pahīyati (sī. syā. ka.)], yaṃ puriso mamidanti [mamayidanti (sī.
syā. ka.), mamāyanti (ka.)] maññati;
Etampi vīditvā [etaṃ disvāna (niddese), etampi vīditva (?)] paṇḍito, na mamattāya nametha

māmako.

813. Supinena yathāpi saṅgataṃ, paṭibuddho puriso na passati;
Evampi piyāyitaṃ janaṃ, petaṃ kālakataṃ na passati.
814. Diṭṭhāpi sutāpi te janā, yesaṃ nāmamidaṃ pavuccati [nāmamevā vasissati (sī. syā. pī.)];
Nāmaṃyevāvasissati, akkheyyaṃ petassa jantuno.
815. Sokapparidevamaccharaṃ [sokaparidevamaccharaṃ (sī. syā. pī.), sokaṃ paridevamaccharaṃ
(?)], na jahanti giddhā mamāyite;
Tasmā munayo pariggahaṃ, hitvā acariṃsu khemadassino.
816. Patilīnacarassa bhikkhuno, bhajamānassa vivittamāsaṃ;
Sāmaggiyamāhu tassa taṃ, yo attānaṃ bhavane na dassaye.
817. Sabbattha munī anissito, na piyaṃ kubbati nopi appiyaṃ;
Tasmiṃ paridevamaccharaṃ, paṇṇe vāri yathā na limpata [lippati (sī. pī.)].
818. Udabindu yathāpi pokkhare, padume vāri yathā na limpata;
Evaṃ muni nopalimpata, yadidaṃ diṭṭhasutaṃ mutesu vā.
819. Dhono na hi tena maññati, yadidaṃ diṭṭhasutaṃ mutesu vā;
Nāññaena visuddhimicchati, na hi so rajjati no virajjatīti.

Jarāsuttaṃ chaṭṭhaṃ niṭṭhitaṃ.

7. Tissametteyyasuttaṃ

820. “Methunamanuyuttassa, (iccāyasmā tisso metteyyo) vighātaṃ brūhi mārisa;
Sutvāna tava sāsanaṃ, viveke sikkhissāmase.
821. “Methunamanuyuttassa, (metteyyāti bhagavā) mussate vāpi sāsanaṃ;
Micchā ca paṭipajjati, etaṃ tasmiṃ anāriyaṃ.
822. “Eko pubbe caritvāna, methunaṃ yo nisevati;
Yānaṃ bhantaṃ va taṃ loke, hīnamāhu puthujjanaṃ.
823. “Yaso kitti ca yā pubbe, hāyate vāpi tassa sā;
Etampi disvā sikkhetha, methunaṃ vippahātave.
824. “Saṅkappehi pareto so, kapaṇo viya jhāyati;
Sutvā paresaṃ nigghosaṃ, maṅku hoti tathāvidho.
825. “Atha satthāni kurute, paravādehi codito;
Esa khvassa mahāgedho, mosavajjaṃ pagāhati.
826. “Paṇḍitoti samaññaṭo, ekacariyaṃ adhiṭṭhito;
Athāpi [sa cāpi (niddeṣe)] methune yutto, mandova parikissati [parikilissati (sī.)].
827. “Etamādīnavaṃ ñatvā, muni pubbāpare idha;
Ekacariyaṃ dalhaṃ kayirā, na nisevetha methunaṃ.

828. “Vivekaññeva sikkhetha, etadariyānamuttamaṃ;
Na tena seṭṭho maññetha, sa ve nibbānasantike.
829. “Rittassa munino carato, kāmesu anapekkhino;
Oghatiṇṇassa pihayanti, kāmesu gadhitā [gathitā (sī.)] pajā”ti.

Tissametteyyasuttaṃ sattamaṃ niṭṭhitaṃ.

8. Pasūrasuttaṃ

830. Idheva suddhi iti vādayanti [vidiyanti (sī. pī.)], nāññesu dhammesu visuddhimāhu;
Yaṃ nissitā tatha subhaṃ vadānā, paccekasaccesu puthū niviṭṭhā.
831. Te vādakāmā parisam vigayha, bālaṃ dahantī mithu aññamaññaṃ;
Vadanti te aññasitā kathojjaṃ, pasamsakāmā kusalā vadānā.
832. Yutto kathāyaṃ parisāya majjhe, pasamsamicchaṃ vinighāti hoti;
Apāhatasmiṃ pana maṅku hoti, nindāya so kuppatai randhamesī.
833. Yamassa vādaṃ parihīnamāhu, apāhataṃ pañhavimaṃsakāse;
Paridevati socati hīnavādo, upaccagā manti anutthunāti.
834. Ete vivādā samaṇesu jātā, etesu ugghāti nighāti hoti;
Etampi disvā virame kathojjaṃ, na haññadatthathipasaṃsalābhā.
835. Pasamsito vā pana tatha hoti, akkhāya vādaṃ parisāya majjhe;
So hassatī uṇṇamatī [unnamatī (?)] ca tena, pappuyya tamatthaṃ yathā mano ahu.
836. Yā uṇṇatī [unnatī (?)] sāssa vighātabhūmi, mānātimānaṃ vadate paneso;
Etampi disvā na vivādayetha, na hi tena suddhiṃ kusalā vadanti.
837. Sūro yathā rājakhādāya puṭṭho, abhigajjameti paṭisūramicchaṃ;
Yeneva so tena palehi sūra, pubbeva natthi yadidaṃ yudhāya.
838. Ye diṭṭhimuggayha vivādayanti [vivādiyanti (sī. pī.)], idameva saccanti ca vādayanti;
Te tvaṃ vadassū na hi tedha atthi, vādamhi jāte paṭisenikattā.
839. Visenikatvā pana ye caranti, diṭṭhīhi diṭṭhiṃ avirujjhamānā;
Tesu tvaṃ kiṃ labhetho pasūra, yesīdha natthi paramuggahītaṃ.
840. Atha tvaṃ pavitakkamāgamā, manasā diṭṭhigatāni cintayanto;
Dhonena yugaṃ samāgamā, na hi tvaṃ sakkhasi sampayātaveti.

Pasūrasuttaṃ aṭṭhamaṃ niṭṭhitaṃ.

9. Māgaṇḍiyasuttaṃ

841. “Disvāna taṇhaṃ aratiṃ ragañca [aratiñca rāgaṃ (syā. ka.)], nāhosi chando api methunasmiṃ;
Kimevidaṃ muttakarīsapuṇṇaṃ, pādāpi naṃ samphusituṃ na icche”.
842. “Etādisaṃ ce ratanaṃ na icchasi, nāriṃ narindehi bahūhi patthitaṃ;

Diṭṭhigataṃ sīlavataṃ nu jīvitam [sīlavatānujīvitam (sī. pī. ka.)], bhavūpapattiñca vadesi kīdisaṃ”.

843. “Idaṃ vadāmīti na tassa hoti, (māgaṇḍiyāti [māgandiyāti (sī. syā. pī.)] bhagavā)
Dhammesu niccheyya samuggahītaṃ;
Passañca diṭṭhīsu anuggahāya,
Ajjhattasantiṃ pacinaṃ adassaṃ”.
844. “Vinicchayā yāni pakappitāni, (iti māgaṇḍiyo [māgandiyō (sī. syā. pī.)])
Te ve munī brūsi anuggahāya;
Ajjhattasantiṃ yametamatthaṃ,
Kathaṃ nu dhīrehi paveditaṃ taṃ”.
845. “Na diṭṭhiyā na sutiyā na ñāṇena, (māgaṇḍiyāti bhagavā)
Sīlabbatenāpi na suddhimāha;
Adiṭṭhiyā assutiyā añāṇā,
Asīlatā abbatā nopi tena;
Ete ca nissajja anuggahāya,
Santo anissāya bhavaṃ na jappe”.
846. “No ce kira diṭṭhiyā na sutiyā na ñāṇena, (iti māgaṇḍiyo)
Sīlabbatenāpi na suddhimāha;
Adiṭṭhiyā assutiyā añāṇā,
Asīlatā abbatā nopi tena;
Maññāmahaṃ momuhameva dhammaṃ,
Diṭṭhiyā eke paccenti suddhiṃ”.
847. “Diṭṭhañca nissāya anupucchamāno, (māgaṇḍiyāti bhagavā)
Samuggahītesu pamohamāgā [samohamāgā (syā. ka.)];
Ito ca nāddakki aṇumpi saññaṃ,
Tasmā tuvaṃ momuhato dahāsi.
848. “Samo vīsēi uda vā nihīno, yo maññatī so vivadetha tena;
Tīsu vidhāsu avikampamāno, samo vīsēti na tassa hoti.
849. “Saccanti so brāhmaṇo kiṃ vadeyya, musāti vā so vivadetha kena;
Yasmiṃ samaṃ visamaṃ vāpi natthi, sa kena vādaṃ paṭisaṃyujeyya.
850. “Okam pahāya aniketasārī, gāme akubbaṃ muni santhavāni [sandhavāni (ka.)];
Kāmehi ritto apurekkharāno, kathaṃ na viggayha janena kayirā.
851. “Yehi vivitto vicareyya loke, na tāni uggayha vadeyya nāgo;
Jalambujam [elambujam (sī. syā.)] kaṇḍakam vārijam yathā, jalena paṅkena canūpalittaṃ;
Evaṃ munī santivādo agiddho, kāme ca loke ca anūpalitto.
852. “Na vedagū diṭṭhiyāyako [na vedagū diṭṭhiyā (ka. sī. syā. pī.)] na mutiyā, sa mānameti na hi tammayo so;
Na kammunā nopi sutena neyyo, anūpanīto sa nivesanesu.
853. “Saññāvirattassa na santi ganthā, paññāvimuttassa na santi mohā;
Saññañca diṭṭhiñca ye aggahesum, te ghaṭṭayantā [ghaṭṭamānā (syā. ka.)] vicaranti loke”ti.

Māgaṇḍiyasuttaṃ navamaṃ niṭṭhitaṃ.

10. Purābhedaṣuttaṃ

854. “Kathaṃdassī kathaṃsīlo, upasantoti vuccati;
Taṃ me gotama pabrūhi, pucchito uttamaṃ naraṃ”.
855. “Vītataṅho purā bheda, (iti bhagavā) pubbamantamanissito;
Vemajjhe nupasaṅkheyyo, tassa natthi purakkhataṃ.
856. “Akkodhano asantāsī, avikatthī akukkuco;
Mantabhāṇī [mantābhāṇī (syā. pī.)] anuddhato, sa ve vācāyato muni.
857. “Nirāsatti anāgate, atītaṃ nānusocati;
Vivekadassī phassesu, diṭṭhīsu ca na nīyati [niyyati (bahūsu)].
858. “Patilīno akuhako, apihālu amaccharī;
Appagabbho ajeguccho, pesuṇeyye ca no yuto.
859. “Sātiyesu anassāvī, atimāne ca no yuto;
Saṅho ca paṭibhānavā [paṭibhānavā (syā. pī.)], na saddho na virajjati.
860. “Lābhakamyā na sikkhati, alābhe ca na kuppatti;
Aviruddho ca taṅhāya, rasesu nānugijjhati.
861. “Upekkhako sadā sato, na loke maññate samaṃ;
Na visesī na nīceyyo, tassa no santi ussādā.
862. “Yassa nissayanā [nissayatā (sī. syā. pī.)] natthi, ñatvā dhammaṃ anissito;
Bhavāya vibhavāya vā, taṅhā yassa na vijjati.
863. “Taṃ brūmi upasantoti, kāmesu anapekkhinaṃ;
Ganthā tassa na vijjanti, atarī so visattikaṃ.
864. “Na tassa puttā pasavo, khettaṃ vatthuṅca vijjati;
Attā vāpi nirattā vā [attaṃ vāpi nirattaṃ vā (bahūsu)], na tasmim upalabbhati.
865. “Yena naṃ vajjuṃ puthujjanā, atho samaṇabrāhmaṇā;
Taṃ tassa apurakkhataṃ, tasmā vādesu nejati.
866. “Vītagedho amaccharī, na ussesu vadate muni;
Na samesu na omesu, kappaṃ neti akappiyo.
867. “Yassa loke sakamaṃ natthi, asatā ca na socati;
Dhammesu ca na gacchati, sa ve santoti vuccati”’ti.

Purābhedaṣuttaṃ dasamaṃ niṭṭhitaṃ.

11. Kalahavivādaṣuttaṃ

868. “Kutopahūtā kalahā vivādā, paridevasokā sahamaccharā ca;

Mānātimānā sahapesuṇā ca, kutopahūtā te tadiṅgha brūhi”.

869. “Piyappahūtā kalahā vivādā,
Paridevasokā sahamaccharā ca;
Mānātimānā sahapesuṇā ca,
Maccherayuttā kalahā vivādā;
Vivādajātesu ca pesuṇāni”.
870. “Piyā su [piyānu (syā.), piyassu (ka.)] lokasmiṃ kutonidānā, ye cāpi [ye vāpi (sī. syā. pī.)]
lobhā vicaranti loke;
Āsā ca niṭṭhā ca kutonidānā, ye samparāyāya narassa honti”.
871. “Chandānidānāni piyāni loke, ye cāpi lobhā vicaranti loke;
Āsā ca niṭṭhā ca itonidānā, ye samparāyāya narassa honti”.
872. “Chando nu lokasmiṃ kutonidāno, vinicchayā cāpi [vāpi (sī. syā. pī.)] kutopahūtā;
Kodho mosavajjaṇca kathaṃkathā ca, ye vāpi dhammā samaṇena vuttā”.
873. “Sātaṃ asātanti yamāhu loke, tamūpanissāya pahoti chando;
Rūpesu disvā vibhavaṃ bhavaṇca, vinicchayaṃ kubbatī [kurute (bahūsu)] jantu loke.
874. “Kodho mosavajjaṇca kathaṃkathā ca, etepi dhammā dvayameva sante;
Kathaṃkathī ñāṇapathāya sikkhe, ñatvā pavuttā samaṇena dhammā”.
875. “Sātaṃ asātaṇca kutonidānā, kismiṃ asante na bhavanti hete;
Vibhavaṃ bhavaṇcāpi yametamatthaṃ, etaṃ me pabrūhi yatonidānaṃ”.
876. “Phassanidānaṃ sātaṃ asātaṃ, phasse asante na bhavanti hete;
Vibhavaṃ bhavaṇcāpi yametamatthaṃ, etaṃ te pabrūmi itonidānaṃ”.
877. “Phasso nu lokasmi kutonidāno, pariggahā cāpi kutopahūtā;
Kismiṃ asante na mamattamatthi, kismiṃ vibhūte na phusanti phassā”.
878. “Nāmaṇca rūpaṇca paṭicca phasso, icchānidānāni pariggahāni;
Icchāyasantyā na mamattamatthi, rūpe vibhūte na phusanti phassā”.
879. “Kathaṃsametassa vibhoti rūpaṃ, sukhaṃ dukhaṇcāpi [dukhaṃ vāpi (sī. syā.)] kathaṃ
vibhoti;
Etaṃ me pabrūhi yathā vibhoti, taṃ jāniyāmāti [jāniṣṣāmāti (sī. ka.)] me mano ahu”.
880. “Na saññaṣaṇṇī na visaññaṣaṇṇī, nopi asaṇṇī na vibhūtasañṇī;
Evaṃsametassa vibhoti rūpaṃ, saññaṇidānā hi papaṇcasañkhā”.
881. “Yaṃ taṃ apucchimha akittayī no,
Aññaṃ taṃ pucchāma tadiṅgha brūhi;
Ettāvataggaṃ nu [no (sī. syā.)] vadanti heke,
Yakkhassa suddhiṃ idha paṇḍitāse;
Udāhu aññaṃpi vadanti etto.
882. “Ettāvataggampi vadanti heke, yakkhassa suddhiṃ idha paṇḍitāse;
Tesaṃ paneke samayaṃ vadanti, anupādisese kusalā vadānā.

883. “Ete ca ñatvā upanissitāti, ñatvā munī nissaye so vimamsī;
Ñatvā vimutto na vivādameti, bhavābhavāya na sameti dhīro”ti.

Kalahavivādasuttaṃ ekādasamaṃ niṭṭhitam.

12. Cūlabyūhasuttaṃ [cūlavīyūhasuttaṃ (sī. syā. niddesa)]

884. Sakaṃsakamdiṭṭhiparibbasānā, viggayha nānā kusalā vadanti;
Yo evaṃ jānāti sa vedi dhammaṃ, idaṃ paṭikkosamakevalī so.

885. Evampi viggayha vivādayanti, bālo paro akkusaloti [akusaloti (sī. syā. pī.)] cāhu;
Sacco nu vādo katamo imesaṃ, sabbeva hīme kusalā vadānā.

886. Parassa ce dhammamanānujānaṃ, bālomako [bālo mago (sī. syā. ka.)] hoti nihīnapañño;
Sabbeva bālā sunihīnapaññā, sabbevime diṭṭhiparibbasānā.

887. Sandiṭṭhiyā ceva na vīvadātā, saṃsuddhapaññā kusalā mutīmā;
Na tesam koci parihīnapañño [kocipi nihīnapañño (sī. syā. ka.)], diṭṭhī hi tesampi tathā samattā.

888. Na vāhametaṃ tathiyanti [tathivanti (syā. ka.)] brūmi, yamāhu bālā mithu aññamaññaṃ;
Sakaṃsakamdiṭṭhimakamsu saccam, tasmā hi bāloti paraṃ dahanti.

889. Yamāhu saccam tathiyanti eke, tamāhu aññe [aññepi (syā.), aññe ca (?)] tucchaṃ musāti;
Evampi vīgayha vivādayanti, kasmā na ekaṃ samaṇā vadanti.

890. Ekañhi saccam na dutīyamatthi, yasmim pajā no vivade pajānaṃ;
Nānā te [nānāto (ka.)] saccāni sayam thunanti, tasmā na ekaṃ samaṇā vadanti.

891. Kasmā nu saccāni vadanti nānā, pavādiyāse kusalā vadānā;
Saccāni sutāni bahūni nānā, udāhu te takkamanussaranti.

892. Na heva saccāni bahūni nānā, aññatra saññāya niccāni loke;
Takkañca diṭṭhīsu pakappayitvā, saccam musāti dvayadhammāhu.

893. Diṭṭhe sute sīlavate mute vā, ete ca nissāya vimānadassī;
Vinicchaye thatvā pahassamāno, bālo paro akkusaloti cāha.

894. Yeneva bāloti paraṃ dahāti, tenātumānaṃ kusaloti cāha;
Sayamattanā so kusalo vadāno, aññaṃ vimāneti tadeva pāva.

895. Atisāradiṭṭhiyāva so samatto, mānena matto paripuṇṇamānī;
Sayameva sāmaṃ manasābhisitto, diṭṭhī hi sā tassa tathā samattā.

896. Parassa ce hi vacasā nihīno, tumo sahā hoti nihīnapañño;
Atha ce sayam vedagū hoti dhīro, na koci bālo samaṇesu atthi.

897. Aññaṃ ito yābhivadanti dhammaṃ, aparaddhā suddhimakevalī te [suddhimakevalīno (sī.)];
Evampi titthyā puthuso vadanti, sandiṭṭhirāgena hi tebhirattā [tyābhirattā (syā. ka.)].

898. Idheva suddhi iti vādayanti, nāññesu dhammesu visuddhimāhu;
Evampi titthyā puthuso nivīṭṭhā, sakāyane tattha daḷhaṃ vadānā.

899. Sakāyane vāpi daḷhaṃ vadāno, kamettha bālota paraṃ daheyya;
Sayameva so medhagamāvaheyya [medhakam āvaheyya (sī. pī.)], paraṃ vadaṃ
bālamasuddhidhammaṃ.
900. Vinicchaye thatvā sayam pamāya, uddham sa [uddam so (sī. syā. pī.)] lokasmiṃ vivādameti;
Hitvāna sabbāni vinicchayāni, na medhagam kubbati jantu loketi.

Cūḷabyūhasuttaṃ dvādasamaṃ niṭṭhitaṃ.

13. Mahābyūhasuttaṃ

901. Ye kecime diṭṭhiparibbasānā, idameva saccanti vivādayanti [vivādiyanti (sī. pī.)];
Sabbeva te nindamanvānāyanti, atho pasamsampi labhanti tattha.
902. Appaṇhi etaṃ na alaṃ samāya, duve vivādassa phalāni brūmi;
Etampi disvā na vivādayetha, khemābhipassaṃ avivādabhūmiṃ.
903. Yā kācimā sammutiyo puthujjā, sabbāva etā na upeti vidvā;
Anūpayo so upayaṃ kimeyya, diṭṭhe sute khantimakubbamāno.
904. Sīluttamā saññamenāhu suddhiṃ, vataṃ samādāya upaṭṭhitāse;
Idheva sikkhema athassa suddhiṃ, bhavūpanitā kusalā vadānā.
905. Sace cuto sīlavatato hoti, pavedhatī [sa vedhati (sī. pī.)] kamma virādhayitvā;
Pajappatī patthayatī ca suddhiṃ, satthāva hīno pavasaṃ gharamhā.
906. Sīlabbatam vāpi pahāya sabbaṃ, kammañca sāvajjanavajjametaṃ;
Suddhiṃ asuddhinti apatthayāno, virato care santimanuggahāya.
907. Tamūpanissāya jigucchitaṃ vā, athavāpi diṭṭham va sutam mutaṃ vā;
Uddhamsarā suddhimanutthunanti, avītataṇhāse bhavābhavesu.
908. Patthayamānassa hi jappitāni, pavedhitaṃ vāpi pakappitesu;
Cutūpapāto idha yassa natthi, sa kena vedheyya kuhiṃva jappe [kuhiñci jappe (sī. syā. ka.),
kuhiṃ pajappe (pī.) niddeso passitabbo].
909. Yamāhu dhammaṃ paramanti eke, tameva hīnanti panāhu aññe;
Sacco nu vādo katamo imesaṃ, sabbeva hīme kusalā vadānā.
910. Sakañhi dhammaṃ paripuṇṇamāhu, aññassa dhammaṃ pana hīnamāhu;
Evampi viggayha vivādayanti, sakaṃ sakaṃ sammutimāhu saccaṃ.
911. Parassa ce vambhayitena hīno, na koci dhammesu visesi assa;
Puthū hi aññassa vadanti dhammaṃ, nihīnato samhi daḷhaṃ vadānā.
912. Saddhammapūjāpi nesam tatheva, yathā pasamsanti sakāyanāni;
Sabbeva vādā [sabbe pavādā (syā.)] tathiyā [tathivā (sabbattha)] bhavyeyum, suddhī hi nesam
paccattameva.
913. Na brāhmaṇassa paraneyyamatthi, dhammesu niccheyya samuggahītaṃ;
Tasmā vivādāni upātivatto, na hi seṭṭhato passati dhammamaññaṃ.

914. Jānāmi passāmi tatheva etaṃ, diṭṭhiyā eke paccenti suddhiṃ;
Addakkhi ce kiñhi tumassa tena, atisitvā aññena vadanti suddhiṃ.
915. Passaṃ naro dakkhati [dakkhiti (sī.)] nāmarūpaṃ, disvāna vā ñassati tānimeva;
Kāmaṃ bahuṃ passatu appakaṃ vā, na hi tena suddhiṃ kusalā vadanti.
916. Nivissavādī na hi subbināyo, pakappitaṃ diṭṭhi purekkharāno;
Yaṃ nissito tattha subhaṃ vadāno, suddhiṃvado tattha tathaddasā so.
917. Na brāhmaṇo kappamupeti saṅkhā [saṅkhaṃ (sī. syā. pī.)], na diṭṭhisārī napi ñāṇabandhu;
Ñatvā ca so sammutiyo [sammatiyo (syā.)] puthujjā, upekkhatī uggahaṇanti maññe.
918. Vissajja ganthāni munīdha loke, vivādajātesu na vaggasārī;
Santo asantesu upekkhako so, anuggaho uggahaṇanti maññe.
919. Pubbāsave hitvā nave akubbaṃ, na chandagū nopi nivissavādī;
Sa vippamutto diṭṭhigatehi dhīro, na limpāti [na lippati (sī. pī.)] loke anattagarahī.
920. Sa sabbadhammesu visenibhūto, yaṃ kiñci diṭṭhaṃ va suttaṃ mutaṃ vā;
Sa pannabhāro muni vippamutto, na kappiyo nūparato na patthiyoti.

Mahābyūhasuttaṃ terasamaṃ niṭṭhitaṃ.

14. Tuvaṭṭakasuttaṃ

921. “Pucchāmi taṃ ādiccabandhu [ādiccabandhuṃ (sī. syā.)], vivekaṃ santipadañca mahesi;
Kathaṃ disvā nibbāti bhikkhu, anupādiyāno lokasmiṃ kiñci”.
922. “Mūlaṃ papañcasāṅkhāya, (iti bhagavā)
Mantā asmīti sabbamuparundhe [sabbamuparuddhe (syā. pī. ka.)];
Yā kāci taṇhā ajjhattaṃ,
Tāsaṃ vinayā [vinayāya (?)] sadā sato sikkhe.
923. “Yaṃ kiñci dhammamabhijaññā, ajjhattaṃ athavāpi bahiddhā;
Na tena thāmaṃ [mānaṃ (sī. ka.)] kubbetha, na hi sā nibbuti satamaṃ vuttā.
924. “Seyyo na tena maññeyya, nīceyyo athavāpi sarikkho;
Phuṭṭho [phuṭṭho (sī. syā. ka.)] anekarūpehi, nātumānaṃ vikappayaṃ tiṭṭhe.
925. “Ajjhattamevupasame, na aññato bhikkhu santimeseyya;
Ajjhattaṃ upasantassa, natthi attā kuto nirattā vā.
926. “Majjhe yathā samuddassa, ūmi no jāyatī ṭhito hoti;
Evaṃ ṭhito anejassa, ussadaṃ bhikkhu na kareyya kuhiñci”.
927. “Akittayī vivaṭṭacakku, sakkhidhammaṃ parissayavinayaṃ;
Paṭipadaṃ vadehi bhaddante, pātimokkhaṃ athavāpi samādhim”.
928. “Cakkhūhi neva lolassa, gāmakathāya āvaraye sotamaṃ;
Rase ca nānugijjheyya, na ca mamāyetha kiñci lokasmiṃ.
929. “Phassena yadā phuṭṭhassa, paridevaṃ bhikkhu na kareyya kuhiñcācci;

Bhavañca nābhijappeyya, bheravesu ca na sampavedheyya.

930. “Annānamatho pānānaṃ, khādaniyānaṃ athopi vatthānaṃ;
Laddhā na sannidhiṃ kayirā, na ca parittase tāni alabhamāno.
931. “Jhāyī na pādaloḷassa, virame kukkuccā nappamajjeyya;
Athāsanesu sayanesu, appasaddesu bhikkhu vihareyya.
932. “Niddaṃ na bahulīkareyya, jāgariyaṃ bhajeyya ātāpī;
Tandiṃ māyaṃ hassaṃ khiḍḍaṃ, methunaṃ vippajahe savibhūsaṃ.
933. “Āthabbaṇaṃ supinaṃ lakkhaṇaṃ, no vidahe athopi nakkhattaṃ;
Virutañca gabbhakaṇaṃ, tikicchaṃ māmako na seveyya.
934. “Nindāya nappavedheyya, na uṇṇameyya pasamsito bhikkhu;
Lobhaṃ saha macchariyena, kodhaṃ pesuñiyañca panudeyya.
935. “Kayavikkaye na tiṭṭheyya, upavādaṃ bhikkhu na kareyya kuhiñci;
Gāme ca nābhisaṃjeyya, lābhakamyā janaṃ na lapayeyya.
936. “Na ca katthitā siyā bhikkhu, na ca vācaṃ payuttaṃ bhāseyya;
Pāgabbhiyaṃ na sikkheyya, kathaṃ viggāhikaṃ na kathayeyya.
937. “Mosavajje na nīyetha, sampajāno saṭhāni na kayirā;
Atha jīvitena paññāya, sīlabbatena nāññamatimaññe.
938. “Sutvā rusito bahuṃ vācaṃ, samañānaṃ vā puthujanānaṃ [[puthuvacanānaṃ \(sī. syā. pī.\)](#)];
Pharusena ne na paṭivajjā, na hi santo paṭisenikaronti.
939. “Etañca dhammamaññāya, vicinaṃ bhikkhu sadā sato sikkhe;
Santīti nibbutiṃ ñatvā, sāsane gotamassa na pamajjeyya.
940. “Abhibhū hi so anabhibhūto, sakkhidhammamanītihamadassī;
Tasmā hi tassa bhagavato sāsane, appamatto sadā namassamanusikkhe’’ti.

Tuvaṭakasuttaṃ cuddasamaṃ niṭṭhitaṃ.

15. Attadaṇḍasuttaṃ

941. “Attadaṇḍā bhayaṃ jātaṃ, janaṃ passatha medhagaṃ;
Saṃvegaṃ kittayissāmi, yathā saṃvijitaṃ mayā.
942. “Phandamānaṃ paṃaṃ disvā, macche appodake yathā;
Aññamaññehi byāruddhe, disvā maṃ bhayamāvisi.
943. “Samantamasāro loko, disā sabbā sameritā;
Icchaṃ bhavanamattano, nāddasāsiṃ anositaṃ.
944. “Osānetveva byāruddhe, disvā me aratī ahu;
Athettha sallamaddakkiṃ, duddasaṃ hadayanissitaṃ.

945. “Yena sallena otiṇṇo, disā sabbā vidhāvati;
Tameva sallamabbuyha, na dhāvati na sīdati.
946. “Tattha sikkhānugīyanti [sikkhānukiriyanti (ka.)], yāni loke gadhitāni;
Na tesu pasuto siyā, nibbijjha sabbaso kāme;
Sikkhe nibbānamattano.
947. “Sacco siyā appagabbho, amāyo rittapesuṇo;
Akkodhano lobhapāpaṃ, vevicchaṃ vitare muni.
948. “Niddaṃ tandiṃ sahe thīnaṃ, pamādena na saṃvase;
Atimāne na tiṭṭheyya, nibbānamanaso naro.
949. “Mosavajje na nīyetha, rūpe snehaṃ na kubbaye;
Mānañca parijāneyya, sāhasā virato care.
950. “Purāṇaṃ nābhinandeyya, nave khantiṃ na kubbaye;
Hiyyamāne na soceyya, ākāsaṃ na sito siyā.
951. “Gedhaṃ brūmi mahoghoti, ājavaṃ brūmi jappaṇaṃ;
Ārammaṇaṃ pakappaṇaṃ, kāmapaṅko duraccayo.
952. “Saccā avokkamma [avokkamaṃ (niddesa)] muni, thale tiṭṭhati brāhmaṇo;
Sabbhaṃ so [sabbaso (syā. ka.)] paṇinissajja, sa ve santoti vuccati.
953. “Sa ve vidvā sa vedagū, ñatvā dhammaṃ anissito;
Sammā so loke iriyāno, na pihetiḍha kassaci.
954. “Yodha kāme accatari, saṅgaṃ loke duraccayaṃ;
Na so socati nājjheti, chinnaṃ so abandhano.
955. “Yaṃ pubbe taṃ visosehi, pacchā te māhu kiñcanaṃ;
Majjhe ce no gahessasi, upasanto carissasi.
956. “Sabbaso nāmarūpasmiṃ, yassa natthi mamāyitaṃ;
Asatā ca na socati, sa ve loke na jīyati.
957. “Yassa natthi idaṃ meti, paresaṃ vāpi kiñcanaṃ;
Mamattaṃ so asaṃvindaṃ, natthi meti na socati.
958. “Aniṭṭhurī ananugiddho, anejo sabbadhī samo;
Tamānisaṃsaṃ pabrūmi, pucchito avikampinaṃ.
959. “Anejassa vijānato, natthi kāci nisaṅkhati [nisaṅkhiti (sī. pī.)].
Virato so viyārabbhā, khemaṃ passati sabbadhi.
960. “Na samesu na omesu, na ussesu vadate muni;
Santo so vītamaccharo, nādeti na nirassatī”ti.

Attadaṇḍasuttaṃ pannarasamaṃ niṭṭhitaṃ.

16. Sāriputtasuttaṃ

961. “Na me diṭṭho ito pubbe, (iccāyasmā sārīputto)
Na suto uda kassaci;
Evaṃ vagguvado satthā,
Tusitā gaṇimāgato.
962. “Sadevakassa lokassa, yathā dissati cakkhumā;
Sabbam̐ tamaṃ vinodetvā, ekova ratimajjhagā.
963. “Taṃ buddham̐ asitam̐ tādīm̐, akuham̐ gaṇimāgataṃ;
Bahūnamidha baddhānaṃ, atthi pañhena āgamaṃ.
964. “Bhikkhuno vijigucchato, bhajato rittamāsanam̐;
Rukkhamūlam̐ susānam̐ vā, pabbatānam̐ guhāsu vā.
965. “Uccāvacesu sayanesu, kīvanto tattha bheravā;
Yehi bhikkhu na vedheyya, nigghose sayanāsane.
966. “Katī parissayā loke, gacchato agataṃ disaṃ;
Ye bhikkhu abhisambhave, pantamhi sayanāsane.
967. “Kyāssa byappathayo assu, kyāssassu idha gocarā;
Kāni sīlabbatānāssu, pahitattassa bhikkhuno.
968. “Kaṃ so sikkham̐ samādāya, ekodi nipako sato;
Kammāro rajatasseva, niddhame malamattano”.
969. “Vijigucchamānassa yadidaṃ phāsu, (sārīputtāti bhagavā)
Rittāsanam̐ sayanam̐ sevato ce;
Sambodhikāmassa yathānudhammaṃ,
Taṃ te pavakkhāmi yathā pajānam̐.
970. “Pañcannaṃ dhīro bhayānam̐ na bhāye, bhikkhu sato sapariyantacārī;
Daṃsādhipātānam̐ sarīsapānam̐, manussaphassānam̐ catuppadānam̐.
971. “Paradhammikānampi na santaseyya, disvāpi tesam̐ bahubheravāni;
Athāparāni abhisambhaveyya, parissayāni kusalānuesī.
972. “Ātaṅkaphassena khudāya phuṭṭho, sītam̐ atuṅham̐ [accuṅham̐ (sī. syā.)] adhvīvasayeyya;
So tehi phuṭṭho bahudhā anoko, vīriyam̐ parakkammadaḷham̐ kareyya.
973. “Theyyam̐ na kāre [na kareyya (sī. syā. ka.)] na musā bhaṇeyya, mettāya phasse
tasathāvarāni;
Yadāvilattaṃ manaso vijaññā, kaṅhassa pakkhoti vinodayeyya.
974. “Kodhātīmānassa vasaṃ na gacche, mūlampi tesam̐ palikhañña tiṭṭhe;
Athappiyam̐ vā pana appiyam̐ vā, addhā bhavanto abhisambhaveyya.
975. “Paññaṃ purakkhatvā kalyāṇapīti, vikkhambhaye tāni parissayāni;
Aratim̐ sahetha sayanamhi pante, caturo sahetha paridevadhamme.
976. “Kimsū asissāmi kuvaṃ vā [kudha vā (ka.), kutha vā (niddeśa)] asissam̐, dukkham̐ vata settha
kvajja sessam̐;

Ete vitakke paridevaneyye, vinayetha sekho aniketacārī.

977. “Annañca laddhā vasanañca kāle, mattaṃ so jaññā idha tosanatthaṃ;
So tesu gutto yatacārī gāme, rusitopi vācaṃ pharusaṃ na vajjā.
978. “Okkhittacakkhu na ca pādalolo, jhānānuyutto bahujāgarassa;
Upekkhamārabbha samāhitatto, takkāsayāṃ kukkuciyūpachinde.
979. “Cudito vacībhi satimābhinande, sabrahmacārīsu khilaṃ pabhinde;
Vācaṃ pamuñce kusalaṃ nātivelāṃ, janavādadhammāya na cetayeyya.
980. “Athāparaṃ pañca rajāni loke, yesaṃ satīmā vinayāya sikkhe;
Rūpesu saddesu atho rasesu, gandhesu phassesu sahetha rāgaṃ.
981. “Etesu dhammesu vineyya chandaṃ, bhikkhu satimā suvimuttacitto;
Kālena so sammā dhammaṃ parivīmaṃsamāno,
Ekodibhūto vihane tamaṃ so’ti.

Sāriputtasuttaṃ soḷasamaṃ niṭṭhitaṃ.

Aṭṭhakavaggo catuttho

Niṭṭhito.

Tassuddānaṃ –

Kāmaṃ guhañca duṭṭhā ca, suddhañca paramā jarā;
Metteyyo ca pasūro ca, māgaṇḍī purābhedaṇaṃ.

Kalaṃ dve ca byūhāni [byūhāni (sī.)], punadeva tuvaṭṭakaṃ;
Attadaṇḍavaraṃ suttaṃ, therapuṭṭhena [therapañhena (sī.), sāriputtena (syā.)] soḷasa;
Iti etāni suttāni, sabbānaṭṭhakavaggikāti.

5. Pārāyanavaggo

Vatthugāthā

982. Kosalānaṃ purā rammā, agamā dakkhiṇāpathaṃ;
Ākiñcaññaṃ patthayāno, brāhmaṇo mantapāragū.
983. So assakassa visaye, aḷakassa [muḷakassa (syā.), mūḷhakassa (ka.), maḷakassa (niddeśa)]
samāsane;
Vasi godhāvarīkūle, uñchena ca phalena ca.
984. Tasseva upanissāya, gāmo ca vipulo ahu;
Tato jātena āyena, mahāyaññaṃmakappayī.
985. Mahāyaññaṃ yajitvāna, puna pāvīsi assamaṃ;
Tasmaṃ paṭipaviṭṭhamhi, añño āgañchi brāhmaṇo.

986. Ugghaṭṭapādo tasito [tassito (ka.)], paṅkadanto rajassiro;
So ca naṃ upasaṅkamma, satāni pañca yācati.
987. Tameṇaṃ bāvarī disvā, āsanena nimantayi;
Sukhañca kusalaṃ pucchi, idaṃ vacanamabravi.
988. “Yaṃ kho mama deyyadhammaṃ, sabbamaṃ visajjitaṃ mayā;
Anujānāhi me brahme, natthi pañcasatāni me”.
989. “Sace me yācamānassa, bhavaṃ nānupadassati;
Sattame divase tuyhaṃ, muddhā phalatu sattadhā”.
990. Abhisāṅkharitvā kuhako, bheravaṃ so akittayi;
Tassa taṃ vacanaṃ sutvā, bāvarī dukkhito ahu.
991. Ussussati anāhāro, sokasallasamappito;
Athopi evaṃ cittassa, jhāne na ramatī mano.
992. Utrastaṃ dukkhitaṃ disvā, devatā atthakāminī;
Bāvarim upasaṅkamma, idaṃ vacanamabravi.
993. “Na so muddhaṃ pajānāti, kuhako so dhanatthiko;
Muddhani muddhapāte vā, ñāṇaṃ tassa na vijjati”.
994. “Bhotī carahi jānāsi, taṃ me akkhāhi pucchitā;
Muddhaṃ muddhādhipātañca, taṃ suṇoma vaco tava”.
995. “Ahampetaṃ na jānāmi, ñāṇamettha na vijjati;
Muddhani muddhādhipāte ca, jinānaṃ hettha [muddhaṃ muddhādhipāto ca, jinānaṃ heta (sī. syā. pī.)] dassanaṃ”.
996. “Atha ko carahi jānāti, asmiṃ pathavimaṇḍale [pathavimaṇḍale (sī. pī.)];
Muddhaṃ muddhādhipātañca, taṃ me akkhāhi devate”.
997. “Purā kapilavatthumhā, nikkhanto lokanāyako;
Apacco okkākarājassa, sakyaputto pabhaṅkaro.
998. “So hi brāhmaṇa sambuddho, sabbadhammāna pāragū;
Sabbābhiññābalappatto, sabbadhammesu cakkhumā;
Sabbakammakkhayaṃ patto, vimutto upadhikkhaye.
999. “Buddho so bhagavā loke, dhammaṃ deseti cakkhumā;
Taṃ tvaṃ gantvāna pucchassu, so te taṃ byākarissati”.
1000. Sambuddhoti vaco sutvā, udaggo bāvarī ahu;
Sokassa tanuko āsi, pītiñca vipulaṃ labhi.
1001. So bāvarī attamano udaggo, taṃ devataṃ pucchati vedajāto;
“Katamamhi gāme nigamamhi vā pana, katamamhi vā janapade lokanātho;
Yattha gantvāna passemu [gantvā namassemu (sī. syā. pī.)], sambuddhaṃ
dvipaduttamaṃ” [dvipaduttamaṃ (sī. syā. pī.)].

- 1002:**“Sāvattھیyaṃ kosalamandire jino, pahūtapañño varabhūrimedhaso;
So sakyaputto vidhuro anāsavo, muddhādhipātassa vidū narāsabho”.
- 1003:**Tato āmantayī sisse, brāhmaṇe mantapārage;
“Etha māṇavā akkhissaṃ, suṇātha vacanaṃ mama.
- 1004:**“Yasseso dullabho loke, pātubhāvo abhiṇhaso;
Svājja lokamhi uppanno, sambuddho iti vissuto;
Khippaṃ gantvāna sāvattiṃ, passavho dvipaduttamaṃ”.
- 1005:**“Kathaṃ carahi jānemu, disvā buddhoti brāhmaṇa;
Ajānataṃ no pabrūhi, yathā jānemu taṃ mayamaṃ”.
- 1006:**“Āgatāni hi mantesu, mahāpurisalakkhaṇā;
Dvattiṃsāni ca [dvittiṃsā ca (sī. syā. pī.), dvittiṃsa tāni (?)] byākkhātā, samattā anupubbaso.
- 1007:**“Yassete honti gattesu, mahāpurisalakkhaṇā;
Dveyeva tassa gatiyo, tatiyā hi na vijjati.
- 1008:**“Sace agāraṃ āvasati [ajjhāvasati (ka.)], vijeyya pathaviṃ imaṃ;
Adaṇḍena asatthena, dhammenamanusāsati.
- 1009:**“Sace ca so pabbajati, agārā anagāriyaṃ;
Vivattacchaddo [vivattachaddo (sī.)] sambuddho, arahā bhavati anuttaro.
- 1010:**“Jātiṃ gottaṇca lakkhaṇaṃ, mante sisse punāpare;
Muddhaṃ muddhādhipātaṇca, manasāyeva pucchatha.
- 1011:**“Anāvaraṇadassāvī, yadi buddho bhavissati;
Manasā pucchite pañhe, vācāya vissajessati”.
- 1012:**Bāvarissa vaco sutvā, sissā soḷasa brāhmaṇā;
Ajīto tissametteyyo, puṇṇako atha mettagū.
- 1013:**Dhotako upasīvo ca, nando ca atha hemako;
Todeyyakappā dubhayo, jatukaṇṇī ca paṇḍito.
- 1014:**Bhadrāvudho udayo ca, posālo cāpi brāhmaṇo;
Mogharājā ca medhāvī, piṅgiyo ca mahāisi.
- 1015:**Paccekaḡaṇino sabbe, sabbalokassa vissutā;
Jhāyī jhānaratā dhīrā, pubbavāsanavāsītā.
- 1016:**Bāvariṃ abhivādetvā, katvā ca naṃ padakkhiṇaṃ;
Jaṭājinadharā sabbe, pakkāmuṃ uttarāmukhā.
- 1017:**Aḷakassa patitṭhānaṃ, purimāhissatiṃ [purimaṃ māhissatiṃ (sī. pī.), puramaṃ māhissatiṃ
(syā.)] tadā;
Ujjeniñcāpi gonaddhaṃ, vedisaṃ vanasavhayaṃ.
- 1018:**Kosambiñcāpi sāketamaṃ, sāvattiñca puruttamaṃ;
Setabyaṃ kapilavatthumaṃ, kusinārañca mandiraṃ.

- 1019** Pāvañca bhoganagaram, vesāliṃ māgadham puram;
Pāsānakam cetiyañca, ramañiyam manoramam.
- 1020** Tasitovudakam sītam, mahālābhamva vāñijo;
Chāyam dhammābhitattova, turitā pabbatamāruham.
- 1021** Bhagavā tamhi samaye, bhikkhusaṅghapurakkhato;
Bhikkhūnam dhammam deseti, sīhova nadatī vane.
- 1022** Ajito addasa buddham, sataramsim [vītaramsimva (syā.), sataramsīva (ka.), pītaramsīva (niddeśa)] va bhānumam;
Candaṃ yathā pannarase, pāripūriṃ upāgataṃ.
- 1023** Athassa gatte disvāna, paripūrañca byañjanam;
Ekamantaṃ ṭhito haṭṭho, manopañhe apucchatha.
- 1024**: ‘Ādissa jammanam [jappanam (ka.)] brūhi, gottam brūhi salakkhaṇam [brūhissa lakkhaṇam (niddeśa)];
Mantesu pāramiṃ brūhi, kati vāceti brāhmaṇo’.
- 1025**: ‘Vīsam vassasataṃ āyu, so ca gottena bāvarī;
Tīṇissa lakkhaṇā gatte, tiṇṇam vedāna pāragū.
- 1026**: ‘Lakkhaṇe itihāse ca, sanighaṇḍusakeṭubhe;
Pañcasatāni vāceti, sadhamme pāramiṃ gato’.
- 1027**: ‘Lakkhaṇānam pavicayam, bāvarissa naruttama;
Kaṅkhacchida [taṅhacchida (bahūsu)] pakāsehi, mā no kaṅkhāyitam ahu’.
- 1028**: ‘Mukham jivhāya chādeti, uṇṇassa bhamukantare;
Kosohitam vatthaguyham, evaṃ jānāhi māṇava’.
- 1029** Pucchañhi kiñci asuṇanto, sutvā pañhe viyākate;
Vicinteti jano sabbo, vedajāto katañjalī.
- 1030**: ‘Ko nu devo vā brahmā vā, indo vāpi sujampati;
Manasā pucchite pañhe, kametaṃ paṭibhāsati.
- 1031**: ‘Muddham muddhādhipātañca, bāvarī paripucchati;
Taṃ byākarohi bhagavā, kaṅkham vinaya no ise’.
- 1032**: ‘Avijjā muddhāti jānāhi, vijjā muddhādhipatīnī;
Saddhāsatisamādhīhi, chandavīriyena saṃyutā’.
- 1033** Tato vedena mahatā, santhambhitvāna māṇavo;
Ekamsam ajinam katvā, pādesu sirasā pati.
- 1034**: ‘Bāvarī brāhmaṇo bhoto, saha sissehi mārisa;
Udaggacitto sumano, pāde vandati cakkhuma’.
- 1035**: ‘Sukhito bāvarī hotu, saha sissehi brāhmaṇo;
Tvañcāpi sukhito hohi, ciraṃ jīvāhi māṇava.

1036:“Bāvarissa ca tuyhaṃ vā, sabbesaṃ sabbasaṃsayamaṃ;
Katāvakaṣā pucchavho, yaṃ kiñci manasicchatha”.

1037:“Sambuddhena katokāso, nisīditvāna pañjalī;
Ajito paṭhamaṃ pañhaṃ, tattha pucchi tathāgataṃ.

Vatthugāthā niṭṭhitā.

1. Ajitamāṇavapucchā

1038:“Kenassu nivuto loko, (iccāyasmā ajito)
Kenassu nappakāsati;
Kissābhilepanaṃ brūsi, kiṃsu tassa mahabbhayaṃ”.

1039:“Avijjāya nivuto loko, (ajitāti bhagavā)
Vevicchā pamādā nappakāsati;
Jappābhilepanaṃ brūmi, dukkhamassa mahabbhayaṃ”.

1040:“Savanti sabbadhi sotā, (iccāyasmā ajito)
Sotānaṃ kiṃ nivāraṇaṃ;
Sotānaṃ saṃvaramṃ brūhi, kena sotā pidhiyyare” [pithiyyare (sī. syā. pī.), pithīyare (sī. atṭha.),
pidhīyare (?)].

1041:“Yāni sotāni lokasmiṃ, (ajitāti bhagavā)
Sati tesāṃ nivāraṇaṃ;
Sotānaṃ saṃvaramṃ brūmi, paññāyete pidhiyyare”.

1042:“Paññā ceva sati yañca [satī ceva (sī.), satī ca (syā.), satī cāpi (pī. niddesa), sati cāpi
(niddesa)], (iccāyasmā ajito)
Nāmarūpañca mārisa;
Etaṃ me puṭṭho pabrūhi, katthetaṃ uparujjhati”.

1043:“Yametaṃ pañhaṃ apucchi, ajita taṃ vadāmi te;
Yattha nāmañca rūpañca, asesāṃ uparujjhati;
Viññāṇassa nirodhena, etthetaṃ uparujjhati”.

1044:“Ye ca saṅkhātadhammāse, ye ca sekhā puthū idha;
Tesaṃ me nipako iriyaṃ, puṭṭho pabrūhi mārisa”.

1045:“Kāmesu nābhigijjheyya, manasānāvilo siyā;
Kusalo sabbadhamānaṃ, sato bhikkhu paribbaje”ti.

Ajitamāṇavapucchā paṭhamā niṭṭhitā.

2. Tissametteyyamāṇavapucchā

1046:“Kodha santusito loke, (iccāyasmā tissametteyyo)
Kassa no santi iñjitā;
Ko ubhantamabhiññāya, majjhe mantā na lippati [limpati (ka.)];
Kaṃ brūsi mahāpurisoti, ko idha sibbinimaccagā”.

1047: ‘Kāmesu brahmacariyavā, (metteyyāti bhagavā)
Vītataṅho sadā sato;
Saṅkhāya nibbuto bhikkhu, tassa no santi iñjitā.

1048: ‘So ubhantamabhiññāya, majjhe mantā na lippati;
Taṃ brūmi mahāpurisoti, so idha sibbinimaccagā’’ti.

Tissametteyyamāṇavapucchā dutiyā niṭṭhitā.

3. Puṇṇakamāṇavapucchā

1049: ‘Anejaṃ mūladassāvīṃ, (iccāyasmā puṇṇako)
Atthi [atthī (syā.)] pañhena āgamaṃ;
Kiṃ nissitā isayo manujā, khattiyā brāhmaṇā devatānaṃ;
Yaññamakappayīṃsu puthūdha loke, pucchāmi taṃ bhagavā brūhi me taṃ’’.

1050: ‘Ye kecime isayo manujā, (puṇṇakāti bhagavā)
Khattiyā brāhmaṇā devatānaṃ;
Yaññamakappayīṃsu puthūdha loke, āsīsamānā puṇṇaka itthattaṃ [itthabhāvaṃ (sī. syā.)];
Jaraṃ sitā yaññamakappayīṃsu’’.

1051: ‘Ye kecime isayo manujā, (iccāyasmā puṇṇako)
Khattiyā brāhmaṇā devatānaṃ;
Yaññamakappayīṃsu puthūdha loke, kaccissu te bhagavā yaññapathe appamattā;
Atāruṃ jātiñca jarañca mārīsa, pucchāmi taṃ bhagavā brūhi me taṃ’’.

1052: ‘Āsīsanti thomayanti, abhijappanti juhanti; (Puṇṇakāti bhagavā)
Kāmābhijappanti paṭicca lābhaṃ, te yājayogā bhavarāgarattā;
Nātarīṃsu jātijaranti brūmi’’.

1053: ‘Te ce nātarīṃsu yājayogā, (iccāyasmā puṇṇako)
Yaññehi jātiñca jarañca mārīsa;
Atha ko carahi devamanussaloke, atāri jātiñca jarañca mārīsa;
Pucchāmi taṃ bhagavā brūhi me taṃ’’.

1054: ‘Saṅkhāya lokasmi paroparāni [parovarāni (sī. syā.)], (puṇṇakāti bhagavā)
Yassiñjitaṃ natthi kuhiñci loke;
Santo vidhūmo anīgho nirāso, atāri so jātijaranti brūmi’’ti.

Puṇṇakamāṇavapucchā tatiyā niṭṭhitā.

4. Mettagūmāṇavapucchā

1055: ‘Pucchāmi taṃ bhagavā brūhi me taṃ, (iccāyasmā mettagū)
Maññāmi taṃ vedaguṃ bhāvitattaṃ;
Kuto nu dukkhā samudāgatā ime, ye keci lokasmimanekarūpā’’.

1056: ‘Dukkassa ve maṃ pabhavaṃ apucchasi, (mettagūti bhagavā)
Taṃ te pavakkhāmi yathā pajānaṃ;
Upadhiniḍānā pabhavanti dukkhā, ye keci lokasmimanekarūpā.

- 1057:**“Yo ve avidvā upadhiṃ karoti, punappunaṃ dukkhamupeti mando;
Tasmā pajānaṃ upadhiṃ na kayirā, dukkhassa jātippabhavānupassī”.
- 1058:**“Yaṃ taṃ apucchimha akittayī no, aññaṃ taṃ pucchāma [pucchāmi (sī. pī.)] tadingha brūhi;
Kathaṃ nu dhīrā vitaranti oghaṃ, jātiṃ jaraṃ sokapariddavañca;
Taṃ me muni sādhu viyākarohi, tathā hi te vidito esa dhammo”.
- 1059:**“Kittayissāmi te dhammaṃ, (mettagūti bhagavā)
Diṭṭhe dhamme anītihaṃ;
Yaṃ viditvā sato caraṃ, tare loke visattikaṃ”.
- 1060:**“Tañcāhaṃ abhinandāmi, mahesi dhammamuttamaṃ;
Yaṃ viditvā sato caraṃ, tare loke visattikaṃ”.
- 1061:**“Yaṃ kiñci sampajānāsi, (mettagūti bhagavā)
Uddhaṃ adho tiriyañcāpi majjhe;
Etesu nandiñca nivesanañca, panujja viññāṇaṃ bhava na tiṭṭhe.
- 1062:**“Evaṃvihārī sato appamatto, bhikkhu caraṃ hitvā mamāyitāni;
Jātiṃ jaraṃ sokapariddavañca, idheva vidvā pajaheyya dukkhaṃ”.
- 1063:**“Etābhinandāmi vaco mahesino, sukittitaṃ gotamanūpadhīkaṃ;
Addhā hi bhagavā pahāsi dukkhaṃ, tathā hi te vidito esa dhammo.
- 1064:**“Te cāpi nūnappajaheyyu dukkhaṃ, ye tvaṃ muni aṭṭhitaṃ ovadeyya;
Taṃ taṃ namassāmi samecca nāga, appeva maṃ bhagavā aṭṭhitaṃ ovadeyya”.
- 1065:**“Yaṃ brāhmaṇaṃ vedagumābhijaññā, akiñcanaṃ kāmabhava asattaṃ;
Addhā hi so oghamimaṃ atāri, tiṇṇo ca pāraṃ akhilo akañkho.
- 1066:**“Vidvā ca yo [so (sī. syā. pī.)] vedagū naro idha, bhavābhava saṅgamimaṃ visajja;
So vītataṅho anīgho nirāso, atāri so jātijaranti brūmī”ti.

Mettagūmāṇavapucchā catutthī niṭṭhitā.

5. Dhotakamāṇavapucchā

- 1067:**“Pucchāmi taṃ bhagavā brūhi me taṃ, (iccāyasmā dhotako)
Vācābhikañkhāmi mahesi tuyhaṃ;
Tava sutvāna nigghosaṃ, sikkhe nibbānamattano”.
- 1068:**“Tenahātappaṃ karohi, (dhotakāti bhagavā) idheva nipako sato;
Ito sutvāna nigghosaṃ, sikkhe nibbānamattano”.
- 1069:**“Passāmahaṃ devamanussaloke, akiñcanaṃ brāhmaṇamiriyamānaṃ;
Taṃ taṃ namassāmi samantacakkhu, pamañca maṃ sakka kathaṃkathāhi”.
- 1070:**“Nāhaṃ sahissāmi [samissāmi (syā.), gamissāmi (sī.), samīhāmi (pī.)] pamocanāya,
kathaṃkathiṃ dhotaka kañci loke;
Dhammañca seṭṭhaṃ abhijānamāno [ājānamāno (sī. syā. pī.)], evaṃ tuvaṃ oghamimaṃ
taresi”.

1071:“Anusāsa brahme karuṇāyamāno, vivekadhammaṃ yamaṃ vijaññaṃ;
Yathāhaṃ ākāsova abyāpajjamāno, idheva santo asito careyyaṃ”.

1072:“Kittayissāmi te santiṃ, (dhotakāti bhagavā) diṭṭhe dhamme anītihaṃ;
Yaṃ viditvā sato caraṃ, tare loka visattikaṃ”.

1073:“Tañcāhaṃ abhinandāmi, mahesi santimuttamaṃ;
Yaṃ viditvā sato caraṃ, tare loka visattikaṃ”.

1074:“Yaṃ kiñci sampajānāsi, (dhotakāti bhagavā)
Uddhaṃ adho tiriyañcāpi majjhe;
Etaṃ viditvā saṅgoti loka, bhavābhavāya mākāsi taṇha”’nti.

Dhotakamāṇavapucchā pañcamī niṭṭhitā.

6. Upasīvamāṇavapucchā

1075:“Eko ahaṃ sakka mahantamoghaṃ, (iccāyasmā upasīvo)
Anissito no visahāmi tārituṃ;
Ārammaṇaṃ brūhi samantacakkhu, yaṃ nissito oghamimaṃ tareyyaṃ”.

1076:“Ākiñcaññaṃ pekkhamāno satimā, (upasīvāti bhagavā)
Natthīti nissāya tarassu oghaṃ;
Kāme pahāya virato kathāhi, taṇhakkhayaṃ nattamahābhipassa” [rattamahābhipassa (syā.),
rattamaṃ vipassa (ka.)].

1077:“Sabbesu kāmesu yo vītarāgo, (iccāyasmā upasīvo)
Ākiñcaññaṃ nissito hitvā maññaṃ;
Saññāvimokkhe parame vimutto [dhimutto (ka.)], tiṭṭhe nu so tattha anānuyāyī” [anānuyāyī
(syā. ka.)].

1078:“Sabbesu kāmesu yo vītarāgo, (upasīvāti bhagavā)
Ākiñcaññaṃ nissito hitvā maññaṃ;
Saññāvimokkhe parame vimutto, tiṭṭheyya so tattha anānuyāyī”.

1079:“Tiṭṭhe ce so tattha anānuyāyī, pūgampi vassānaṃ samantacakkhu;
Tattheva so sītisiyā vimutto, cavetha viññāṇaṃ tathāvidhassa”.

1080:“Accī yathā vātavegena khittā [khittam (syā.), khitto (pī.)], (upasīvāti bhagavā)
Atthaṃ paleti na upeti saṅkhaṃ;
Evaṃ munī nāmakāyā vimutto, atthaṃ paleti na upeti saṅkhaṃ”.

1081:“Atthaṅgato so uda vā so natthi, udāhu ve sassatiyā arogo;
Taṃ me munī sādhu viyākarohi, tathā hi te vidito esa dhammo”.

1082:“Atthaṅgatassa na pamāṇamatthi, (upasīvāti bhagavā)
Yena naṃ vajjuṃ taṃ tassa natthi;
Sabbesu dhammesu samohatesu, samūhatā vādapathāpi sabbe”’ti.

Upasīvamāṇavapucchā chaṭṭhī niṭṭhitā.

7. Nandamāṇavapucchā

- 1083:**“Santi loke munayo, (iccāyasmā nando)
Janā vadanti tayidaṃ kathaṃsu;
Ñānūpapannaṃ no muniṃ [muni no (syā. ka.)] vadanti, udāhu ve jīvitenūpapannaṃ”.
- 1084:**“Na diṭṭhiyā na sutiyā na ñāṇena, (na sīlabbatena) [() natthi sī.-pī potthakesu]
Munīdha nanda kusalā vadanti;
Visenikatvā anīghā nirāsā, caranti ye te munayoti brūmi”.
- 1085:**“Ye kecime samaṇabrāhmaṇāse, (iccāyasmā nando)
Diṭṭhassutenāpi [diṭṭhena sutenāpi (sī.), diṭṭhe sutenāpi (syā. pī. ka.)] vadanti suddhiṃ;
Sīlabbatenāpi vadanti suddhiṃ, anekarūpena vadanti suddhiṃ;
Kaccissu te bhagavā tattha yatā carantā, atāru jātiñca jarañca mārisa;
Pucchāmi taṃ bhagavā brūhi me taṃ”.
- 1086:**“Ye kecime samaṇabrāhmaṇāse, (nandāti bhagavā)
Diṭṭhassutenāpi vadanti suddhiṃ;
Sīlabbatenāpi vadanti suddhiṃ, anekarūpena vadanti suddhiṃ;
Kiñcāpi te tattha yatā caranti, nāriṃsu jātijaranti brūmi”.
- 1087:**“Ye kecime samaṇabrāhmaṇāse, (iccāyasmā nando)
Diṭṭhassutenāpi vadanti suddhiṃ;
Sīlabbatenāpi vadanti suddhiṃ, anekarūpena vadanti suddhiṃ;
Te ce muni [sace muni (sī.)] brūsi anoghatinṇe, atha ko carahi devamanussaloke;
Atāri jātiñca jarañca mārisa, pucchāmi taṃ bhagavā brūhi me taṃ”.
- 1088:**“Nāhaṃ sabbe samaṇabrāhmaṇāse, (nandāti bhagavā)
Jātijarāya nivutāti brūmi;
Ye sīdha diṭṭhaṃva sutāṃ mutaṃ vā, sīlabbataṃ vāpi pahāya sabbāṃ;
Anekarūpampi pahāya sabbāṃ, taṇhaṃ pariññāya anāsavāse;
Te ve narā oghatiṇṇāti brūmi”.
- 1089:**“Etābhinandāmi vaco mahesino, sukittitaṃ gotamanūpadhīkaṃ;
Ye sīdha diṭṭhaṃ va sutāṃ mutaṃ vā, sīlabbataṃ vāpi pahāya sabbāṃ;
Anekarūpampi pahāya sabbāṃ, taṇhaṃ pariññāya anāsavāse;
Ahampi te oghatiṇṇāti brūmi”’ti.

Nandamāṇavapucchā sattamā niṭṭhitā.

8. Hemakamāṇavapucchā

- 1090:**“Ye me pubbe viyākaṃsu, (iccāyasmā hemako)
Huraṃ gotamasāsanā;
Iccāsi iti bhavissati, sabbāṃ taṃ itihītihaṃ;
Sabbāṃ taṃ takkavaḍḍhanaṃ, nāhaṃ tattha abhiramiṃ.
- 1091:**“Tvañca me dhammakkhāhi, taṇhānigghātanaṃ muni;
Yaṃ viditvā sato caraṃ, tare loke visattikaṃ”.
- 1092:**“Idha diṭṭhasutamutaviññātesu, piyarūpesu hemaka;
Chandarāgavinodanaṃ, nibbānapadamaccutaṃ.

1093: ‘Etadaññāya ye satā, diṭṭhadhammābhiniibbutā;
Upasantā ca te sadā, tiṇṇā loke visattika’’nti.

Hemakamāṇavapucchā aṭṭhamā niṭṭhitā.

9. Todeyyamāṇavapucchā

1094: ‘Yasmiṃ kāmā na vasanti, (iccāyasmā todeyyo)
Taṇhā yassa na vijjati;
Kathaṃkathā ca yo tiṇṇo, vimokkho tassa kīdiso’’.

1095: ‘Yasmiṃ kāmā na vasanti, (todeyyāti bhagavā)
Taṇhā yassa na vijjati;
Kathaṃkathā ca yo tiṇṇo, vimokkho tassa nāparo’’.

1096: ‘Nirāsaso so uda āsasāno, paññāṇavā so uda paññakappī;
Muniṃ ahaṃ sakka yathā vijaññaṃ, taṃ me viyācikkha samantacakkhu’’.

1097: ‘Nirāsaso so na ca āsasāno, paññāṇavā so na ca paññakappī;
Evampi todeyya muniṃ vijāna, akiñcanaṃ kāmabhava asatta’’nti.

Todeyyamāṇavapucchā navamā niṭṭhitā.

10. Kappamāṇavapucchā

1098: ‘Majjhe sarasmiṃ tiṭṭhatam, (iccāyasmā kappo)
Oghe jāte mahabbhaye;
Jarāmaccuparetānaṃ, dīpaṃ pabrūhi mārisa;
Tvañca me dīpamakkhāhi, yathāyidaṃ nāparaṃ siyā’’.

1099: ‘Majjhe sarasmiṃ tiṭṭhatam, (kappāti bhagavā)
Oghe jāte mahabbhaye;
Jarāmaccuparetānaṃ, dīpaṃ pabrūmi kappa te.

1100: ‘Akiñcanaṃ anādānaṃ, etaṃ dīpaṃ anāparaṃ;
Nibbānaṃ iti [nibbānamīti (sī.)] naṃ brūmi, jarāmaccuparikkhayaṃ.

1101: ‘Etadaññāya ye satā, diṭṭhadhammābhiniibbutā;
Na te māravasānugā, na te mārasa paddhagū’’ti [paṭṭhagūti (syā. ka.)].

Kappamāṇavapucchā dasamā niṭṭhitā.

11. Jatukaṇṇimāṇavapucchā

1102: ‘Sutvānaṃ vīramakāmākāmiṃ, (iccāyasmā jatukaṇṇi)
Oghātiṃ puṭṭhumakāmamāgamaṃ;
Santipadaṃ brūhi sahaṇṇa, yathācchaṃ bhagavā brūhi me taṃ.

1103: ‘Bhagavā hi kāme abhibhuyya iriyati, ādiccova pathaviṃ tejī tejasā;
Parittapaññassa me bhūripañña, ācikkha dhammaṃ yamaṃ vijaññaṃ;
Jātijarāya idha vippahānaṃ’’.

- 1104: ‘Kāmesu vinaya gedhaṃ, (jatukaṇṇīti bhagavā) nekkhammaṃ daṭṭhu khemato;
Uggahītaṃ nirattaṃ vā, mā te vijjittha kiñcanaṃ.
- 1105: ‘Yaṃ pubbe taṃ visosehi, pacchā te māhu kiñcanaṃ;
Majjhe ce no gahessasi, upasanto carissasi.
- 1106: ‘Sabbaso nāmarūpasmim, vītagedhassa brāhmaṇa;
Āsavāssa na vijjanti, yehi maccuvasaṃ vaje’’ti.

Jatukaṇṇimāṇavapucchā ekādasamā niṭṭhitā.

12. Bhadrāvudhamāṇavapucchā

- 1107: ‘Okañjahaṃ taṇhacchidaṃ anejaṃ, (iccāyasmā bhadrāvudho)
Nandiñjahaṃ oghatiṇṇaṃ vimuttaṃ;
Kappañjahaṃ abhiyāce sumedhaṃ, sutvāna nāgassa apanamissanti ito.
- 1108: ‘Nānājanā janapadehi saṅgatā, tava vīra vākyam abhikaṅkhamānā;
Tesaṃ tuvaṃ sādhu viyākarohi, tathā hi te vidito esa dhammo’’.
- 1109: ‘Ādānataṇhaṃ vinayetha sabbam, (bhadrāvudhāti bhagavā)
Uddham adho tiriyañcāpi majjhe;
Yaṃ yañhi lokasmimupādiyanti, teneva māro anveti jantaṃ.
- 1110: ‘Tasmā pajānaṃ na upādiyetha, bhikkhu sato kiñcanaṃ sabbaloke;
Ādānasatte iti pekkhamāno, paṇaṃ imaṃ maccudheyye visatta’’nti.

Bhadrāvudhamāṇavapucchā dvādasamā niṭṭhitā.

13. Udayamāṇavapucchā

- 1111: ‘Jhāyim virajamāsīnaṃ, (iccāyasmā udayo) katakiccaṃ anāsavaṃ;
Pāraguṃ sabbadhammānaṃ, atthi pañhena āgamaṃ;
Aññāvimokkhaṃ pabrūhi, avijjāya pabhedanaṃ’’.
- 1112: ‘Pahānaṃ kāmacchandānaṃ, (udayāti bhagavā) domanassāna cūbhayaṃ;
Thinassa ca panūdanaṃ, kukkuccānaṃ nivāraṇaṃ.
- 1113: ‘Upekkhāsatisaṃsuddhaṃ, dhammatakkapurejavaṃ;
Aññāvimokkhaṃ pabrūmi, avijjāya pabhedanaṃ’’.
- 1114: ‘Kiṃsu saṃyojano loko, kiṃsu tassa vicāraṇaṃ;
Kissassa vippahānena, nibbānaṃ iti vuccati’’.
- 1115: ‘Nandisaṃyojano loko, vitakkassa vicāraṇaṃ;
Taṇhāya vippahānena, nibbānaṃ iti vuccati’’.
- 1116: ‘Kathaṃ satassa carato, viññāṇaṃ uparujjhati;
Bhagavantaṃ puṭṭhumāgama, taṃ suṇoma vaco tava’’.
- 1117: ‘Ajjhattañca bahiddhā ca, vedanaṃ nābhinandato;

Evam satassa carato, viññāṇaṃ uparujjhatī’ ti.

Udayamāṇavapucchā terasamā niṭṭhitā.

14. Posālamāṇavapucchā

1118: ‘Yo atītaṃ ādisati, (iccāyasmā posālo) anejo chinnaśamsayo;
Pāraguṃ sabbadhammānaṃ, atthi pañhena āgamaṃ.

1119: ‘Vibhūtarūpasaññissa, sabbakāyappahāyino;
Ajjhattaṅca bahiddhā ca, natthi kiñcīti passato;
Ñāṇaṃ sakkānupucchāmi, kathaṃ neyyo tathāvidho’.

1120: ‘Viññāṇaṭṭhitiyo sabbā, (posālāti bhagavā) abhijānaṃ tathāgato;
Tiṭṭhantameṇaṃ jānāti, vimuttaṃ tapparāyaṇaṃ.

1121: ‘Ākiñcaññasambhavaṃ ñatvā, nandī saṃyojanaṃ iti;
Evametam abhiññāya, tato tattha vipassati;
Etaṃ [evam (syā. ka.)] ñāṇaṃ tathaṃ tassa, brāhmaṇassa vusīmato’ ti.

Posālamāṇavapucchā cuddasamā niṭṭhitā.

15. Mogharājamāṇavapucchā

1122: ‘Dvāhaṃ sakkam apucchissaṃ, (iccāyasmā mogharājā)
Na me byākāsi cakkhumā;
Yāvatiyaṅca devīsi, byākarotīti me sutam.

1123: ‘Ayaṃ loko paro loko, brahmaloko sadevako;
Diṭṭhiṃ te nābhijānāti, gotamassa yasassino.

1124: ‘Evaṃ abhikkantadassāvīṃ, atthi pañhena āgamaṃ;
Kathaṃ lokaṃ avekkhantaṃ, maccurājā na passati’.

1125: ‘Suññato lokaṃ avekkhassu, mogharāja sadā sato;
Attānudiṭṭhiṃ ūhacca, evaṃ maccutaro siyā;
Evaṃ lokaṃ avekkhantaṃ, maccurājā na passati’ ti.

Mogharājamāṇavapucchā pannarasamā niṭṭhitā.

16. Piṅgiyamāṇavapucchā

1126: ‘Jiṇṇohamasmi abalo vītavaṇṇo, (iccāyasmā piṅgiyo)
Nettā na suddhā savanaṃ na phāsu;
Māhaṃ nassaṃ momuho antarāva
Ācikkha dhammaṃ yamaṃ vijaññaṃ;
Jātijarāya idha vipphānaṃ’.

1127: ‘Disvāna rūpesu vihaññaṃāne, (piṅgiyāti bhagavā)
Ruppanti rūpesu janā pamattā;
Tasmā tuvaṃ piṅgiya appamatto,

Jahassu rūpaṃ apunabbhavāya’’.

1128‘Disā catasso vidisā catasso, uddhaṃ adho dasa disā imāyo;
Na tuyhaṃ adiṭṭhaṃ asutaṃ amutaṃ [asutaṃ amutaṃ vā (sī.), asutāmutaṃ vā (syā.),
asutaṃ’mutaṃ vā (pī.)], atho aviññātaṃ kiñcinamatthi [kiñci matthi (syā.), kiñci natthi (pī.),
kiñcinamatthi (ka.)] loke;
Ācikkha dhammaṃ yamaṃ vijaññaṃ, jātijarāya idha vippahānaṃ’’.

1129‘Taṇhāhipanne manuje pekkhamāno, (piṅgiyāti bhagavā)
Santāpajāte jarasā parete;
Tasmā tuvaṃ piṅgiya appamatto, jahassu taṇhaṃ apunabbhavāya’’ti.

Piṅgiyamāṇavapucchā soḷasamā niṭṭhitā.

Pārāyanatthutīgāthā

Idamavoca bhagavā magadhesu viharanto pāsāṇake cetiye, paricārakasolaṣānaṃ
[paricārakasolaṣanaṃ (syā. ka.)] brāhmaṇānaṃ ajiḥṭṭho puṭṭho puṭṭho pañhaṃ [pañhe (sī. pī.)] byākāsi.
Ekamekassa cepi pañhassa atthamaññāya dhammamaññāya dhammānudhammaṃ paṭipajjeyya,
gaccheyyeva jarāmaṇassa pāraṃ. Pāraṅgamanīyā ime dhammāti, tasmā imassa dhammapariyāyassa
pārāyananteva [pārāyaṇaṃteva (sī. aṭṭha.)] adhivacanaṃ.

1130Ajito tissametteyyo, puṇṇako atha mettagū;
Dhotako upasīvo ca, nando ca atha hemako.

1131Todeyya-kappā dubhayo, jatukaṇṇī ca paṇḍito;
Bhadrāvudho udayo ca, posālo cāpi brāhmaṇo;
Mogharājā ca medhāvī, piṅgiyo ca mahāisi.

1132Ete buddhaṃ upāgacchum, sampannacaraṇaṃ isim;
Pucchantā nipuṇe pañhe, buddhaseṭṭhaṃ upāgamum.

1133Tesaṃ buddho pabyākāsi, pañhe puṭṭho yathātathaṃ;
Pañhānaṃ veyyākaraṇena, tosesi brāhmaṇe muni.

1134Te tositā cakkhumatā, buddhenādiccabandhunā;
Brahmacariyamacarimsu, varapaññassa santike.

1135Ekamekassa pañhassa, yathā buddhena desitaṃ;
Tathā yo paṭipajjeyya, gacche pāraṃ apārato.

1136Apārā pāraṃ gaccheyya, bhāvento maggamuttamaṃ;
Maggo so pāraṃ gamanāya, tasmā pārāyanaṃ iti.

Pārāyanānugītīgāthā

1137‘Pārāyanamanugāyissaṃ, (iccāyasmā piṅgiyo)
Yathāddakkhi tathākkhāsi, vimalo bhūrimedhaso;
Nikkāmo nibbano [nibbuto (syā.)] nāgo, kissa hetu musā bhaṇe.

1138‘Pahīnamalamohassa, mānamakkhappahāyino;

Handāhaṃ kittayissāmi, giram vaṇṇūpasañhitam.

- 1139:**“Tamonudo buddho samantacakkhu, lokantagū sabbabhavātivatto;
Anāsavo sabbadukkhapahīno, saccavhayo brahme upāsito me.
- 1140:**“Dijo yathā kubbanakaṃ pahāya, bahupphalaṃ kānanamāvaseyya;
Evaṃ pahaṃ appadasse pahāya, mahodadhiṃ hamsoriva ajjhapatto.
- 1141:**“Yeme pubbe viyākaṃsu, huram gotamasāsanā;
Iccāsi iti bhavissati;
Sabbam taṃ itihitimaṃ, sabbam taṃ takkavaḍḍhanaṃ.
- 1142:**“Eko tamanudāsino, jutimā so pabhaṅkaro;
Gotamo bhūripaññaṇo, gotamo bhūrimedhaso.
- 1143:**“Yo me dhammadesesi, sandiṭṭhikamakālikam;
Taṇhakkhayamanītikam, yassa natthi upamā kvaci”.
- 1144:**“Kiṃnu tamhā vipavasasi, muhuttamapi piṅgiya;
Gotamā bhūripaññaṇā, gotamā bhūrimedhasā.
- 1145:**“Yo te dhammadesesi, sandiṭṭhikamakālikam;
Taṇhakkhayamanītikam, yassa natthi upamā kvaci”.
- 1146:**“Nāham tamhā vipavasāmi, muhuttamapi brāhmaṇa;
Gotamā bhūripaññaṇā, gotamā bhūrimedhasā.
- 1147:**“Yo me dhammadesesi, sandiṭṭhikamakālikam;
Taṇhakkhayamanītikam, yassa natthi upamā kvaci.
- 1148:**“Passāmi naṃ manasā cakkhunāva, rattindivam brāhmaṇa appamatto;
Namassamāno vivasemi rattim, teneva maññaṃ avippavāsam.
- 1149:**“Saddhā ca pīti ca mano sati ca, nāpenti me gotamasāsanamhā;
Yaṃ yaṃ disaṃ vajati bhūripaññaṇo, sa tena teneva natohamasmi.
- 1150:**“Jiṇṇassa me dubbalathāmakassa, teneva kāyo na paleti tattha;
Saṃkappayantāya [saṃkappayattāya (sī.)] vajāmi niccam, mano hi me brāhmaṇa tena yutto.
- 1151:**“Paṅke sayāno pariphandaṃ, dīpā dīpaṃ upaplaviṃ [upallaviṃ (syā. niddesa)];
Athaddasāsiṃ sambuddham, oghatiṇṇamanāsavam”.
- 1152:**“Yathā ahū vakkali muttasaddho, bhadrāvudho āḷavi gotamo ca;
Evameva tvampi pamuñcassu saddham,
Gamissasi tvam piṅgiya maccudheyassa pāram” [maccudheyapāram (sī.)].
- 1153:**“Esa bhiyyo pasīdāmi, sutvāna munino vaco;
Vivaṭṭacchado sambuddho, akhilo paṭibhānavā.
- 1154:**“Adhideve abhiññaṇāya, sabbam vedi varovaram [paro varam (sī. syā.), paro param (niddesa)];
Pañhānantakaro satthā, kaṅkhīnam paṭijānatam.

1155: ‘Asaṃhīraṃ asaṅkappaṃ, yassa natthi upamā kvaci;
Addhā gamissāmi na mettha kaṅkhā, evaṃ maṃ dhārehi adhimuttacitta’nti.

Pārāyanavaggo pañcamaṃ niṭṭhito.

Suttuddānaṃ –

1. Urago [imā uddānagāthāyo sī. pī. potthakesu na santi] dhaniyopi ca, khaggavisāṇo kasi ca;
Cundo bhavo punadeva, vasalo ca karaṇīyañca;
Hemavato atha yakkho, vijayasuttaṃ munisuttavaranti.
2. Paṭhamakaṭṭhavarō varavaggo, dvādasasuttadharo suvibhatto;
Desito cakkhumatā vimalena, suyyati vaggavaro uragoti.
3. Ratanāmagandho hirimaṅgalanāmo, sucilomakapilo ca brāhmaṇadhammo;
Nāvā [nātha (ka.)] kiṃsīlauṭṭhahano ca, rāhulo ca punapi vaṅgīso.
4. Sammāparibbājanīyopi cettha, dhammikasuttavaro suvibhatto;
Cuddasasuttadharo dutiyamhi, cūḷakavaggavaroti tamāhu.
5. Pabbajjapadhānasubhāsitanāmo, pūraḷāso punadeva māgho ca;
Sabhiyaṃ keṇiyameva sallanāmo, vāsetṭhavarō kālikopi ca.
6. Nālakasuttavaro suvibhatto, taṃ anupassī tathā punadeva;
Dvādasasuttadharo tatiyamhi, suyyati vaggavaro mahānāmo.
7. Kāmaguṭṭhakaduṭṭhakanāmā, suddhavaro paramaṭṭhakanāmo;
Jarā mettiyavaro suvibhatto, pasūramāgaṇḍiyā purābhedo.
8. Kalahavivādo ubho viyuhā ca, tuvaṭakaattadaṇḍasāriputtā;
Soḷasasuttadharo catutthamhi, aṭṭhakavaggavaroti tamāhu.
9. Magadhe janapade ramaṇīye, desavare katapuññanivese;
Pāsāṇakacetiyavare suvibhatte, vasi bhagavā gaṇasetṭho.
10. Ubhayavāsamāgatiyamhi [ubhayaṃ vā puṇṇasamāgataṃ yamhi (syā.)], dvādasayojanīyā
parisāya;
Soḷasabrāhmaṇānaṃ kira puṭṭho, pucchāya soḷasapañhakammīyā;
Nippakāsaya dhammamadāsi.
11. Atthapakāsakabyañjanapuṇṇaṃ, dhammamadesesi parakhemajaniyaṃ [varam khamanīyaṃ
(ka.)];
Lokahitāya jino dvīpadaggo, suttavaraṃ bahudhammavicitraṃ;
Sabbakilesapamocanahetuṃ, desayaṃ suttavaraṃ dvīpadaggo.
12. Byañjanamatthapadaṃ samayuttaṃ [byañjanamatthapadasamayuttaṃ (syā.)],
akkharasaññītaopamaḡaḷhaṃ;
Lokavicāraṇañāpabhaggaṃ, desayaṃ suttavaraṃ dvīpadaggo.
13. Rāgamale amalaṃ vimalaggaṃ, dosamale amalaṃ vimalaggaṃ;
Mohamale amalaṃ vimalaggaṃ, lokavicāraṇañāpabhaggaṃ;
Desayaṃ suttavaraṃ dvīpadaggo.

14. Klesamale amalaṃ vimalaggaṃ, duccharitamale amalaṃ vimalaggaṃ;
Lokavicāraṇañāpabhaggaṃ, desayi suttavaraṃ dvipadaggo.
15. Āsavabandhanayogākilesaṃ, nīvaraṇāni ca tīṇi malāni;
Tassa kilesapamocanahetuṃ, desayi suttavaraṃ dvipadaggo.
16. Nimmalasabbakilesapanūdaṃ, rāgavirāgamanejamasokaṃ;
Santapaṇītasuddhasadhammaṃ, desayi suttavaraṃ dvipadaggo.
17. Rāgañca dosakamabhañjitasantaṃ [dosañca bhañjitasantaṃ (syā.)],
yonicatuggatipañcaviññāṇaṃ;
Taṇhāratācchadanatāṇalatāpamokkhaṃ [taṇhātaratācchedanatāpamokkhaṃ (syā.)], desayi
suttavaraṃ dvipadaggo.
18. Gambhīraduddasasaṇhanipuṇaṃ, paṇḍitavedaniyaṃ nipuṇatthaṃ;
Lokavicāraṇañāpabhaggaṃ, desayi suttavaraṃ dvipadaggo.
19. Navaṅgakusumamālagīveyyaṃ, indriyajhānavimokkhavibhattaṃ;
Aṭṭhaṅgamaggadharaṃ varayānaṃ, desayi suttavaraṃ dvipadaggo.
20. Somupamaṃ vimalaṃ parisuddhaṃ, aṇṇavamūpamaratanasucittaṃ;
Pupphasamaṃ ravimūpamatejaṃ, desayi suttavaraṃ dvipadaggo.
21. Khemasivaṃ sukhasītalasantaṃ, maccutatāṇaparaṃ paramatthaṃ;
Tassa sunibbutadassanahetuṃ, desayi suttavaraṃ dvipadaggo.

Suttanipātapāli niṭṭhitā.